



di Mazzoni

Julio Charon, v.
Casanova, Memoirs
III, 63.

Gr. iv, II, 366.

Sainte-Beuve,
Causeries de Lundi,
tome XI, pag. 236.
& seq.



D E L A
S A G E S S E.

↔ ————— ↔
T O M E P R E M I E R.
↔ ————— ↔





N. De Lamoignon sc.

DE LA
SAGESSE,
TROIS LIVRES.

Par PIERRE CHARRON, Parisien,
Docteur es Droïts.

Suivant la vraye copie de Bourdeaux.

—> —<
TOME PREMIER.
—> —<



A GENÈVE.

—> —<
M. DCC. LXXVII.

6.10.386



P R E F A C E

*Où est parlé du nom , subject , deſſein ;
& methode de ceſt œuvre.*

IL eſt requis auant tout œuvre , ſçauoir que c'eſt que ſageſſe , & comment nous entendons la traiter en ce liure , puis qu'il en porte le nom & le tiltre. Or dès l'entrée nouſ aduertifſons , que nous ne prenons icy ce mot ſubtilement au ſens haultain & eſleué des Theologiens & Philoſophes (qui prennent plaifir à deſcrire & faire peinture des choſes qui n'ont encores eſté veuës , & les releuer à telle perfection , que la nature humaine ne ſ'en trouue capable , que par imagination) pour vne cognoiſſance parfaite des choſes diuines & humaines , ou bien des premieres & plus hautes cauſes & reſſorts de toutes choſes : laquelle reſide en l'entendement ſeul , peut eſtre ſans probité (qui eſt principalement en la

volonté) sans vtilité, vsage, action, sans compagnee & en solitude; & est plus que tres-rare & difficile, c'est le souverain bien & la perfection de l'entendement humain; ni au sens trop court, bas & populaire, pour discretion, circonspection, comportement aduisé & bien réglé en toutes choses, qui se peut trouuer avec peu de pieté & prud'homie, & regarde plus la compagnee & l'autrui que soy-mesme. Mais nous le prenons en sens plus vniuersel, commun & humain, comprenant tant la volonté que l'entendement, voire tout l'homme en son dedans & son dehors, en soy seul, en compagnee, cognoissant & agissant. Ainsi nous disons, que Sageste est preu de prudence, c'est à dire prud'homie avec habilité, probité bien aduisée. Nous sçauons que preud'homie sans prudence est sotte & indiscrete; prudence sans prud'homie n'est que finesse: ce sont deux choses les meilleures & plus excellentes, & les chefs de tout bien; mais seules & separees sont defaillantes, imparfaites. La

Sageſſe les accouple, c'eſt vne droicte & belle compoſition de tout l'homme. Or elle conſiſte en deux choſes ? Bien ſe cognoiſtre & conſtamment eſtre bien réglé & moderé en toutes choſes par toutes choſes ; l'entens non ſeulement les externes , qui apparoifſent au monde , faiſts & dicts : mais premierement & principalement les internes ; penſées , opinions , creances deſquelles (ou la faute eſt bien grande , & qui enfin ſe deſcouure) ſourdent les externes. Je diſ conſtamment , car les fols par fois contrefont , & ſemblent eſtre bien ſages. Il ſembleroit peut eſtre à aucuns , qu'il ſuffiroit de dire , que la Sageſſe conſiſte à eſtre conſtamment bien réglé & moderé en toutes choſes , ſans y adjouſter bien ſe cognoiſtre : mais je ne ſuis pas de ceſt aduis. Car aduenant que par vne grande bonté , douceur & ſoupleſſe de nature , ou par vne attentiuë imitation d'autrui , quelqu'un ſe comportant moderement en toutes choſes , ignorant cependant & meſcognoiſſant ſoy-meſme , & l'humaine

condition, ce qu'il a & ce qu'il n'a pas, il ne seroit pourtant sage, veu que sagesse n'est pas sans cognoissance, sans discours, & sans estude. L'on n'accordera pas, peut estre ceste proposition, car il semble bien que l'on ne peut reglement & constamment se comporter par tout sans se cognoistre; & suis de cest aduis. Mais je dis, que combien qu'ils aillent inseparablement ensemble, si ne laissent ils d'estre deux choses distinctes, dont il les faut separement exprimer en la description de sagesse, comme ses deux offices: dont se cognoistre est le premier, & est dict le commencement de Sagesse, Parquoy nous disons sage, celuy qui, cognoissant bien ce qu'il est, son bien & son mal, combien & jusques où nature l'a estrené & fauorisé, & où elle luy a deffailly, estude par le benefice de la Philosophie, & par l'effort de la vertu, à corriger & redresser ce qu'elle luy a donné de mauuais; resueiller & roidir ce qui est de foible & languissant; faire valoir ce qui est bon; adjouster ce qui

defaut : & tant que faire se peut la secourir : & par tel estude se regle & conduict bien en toutes choses.

Suyuant ceste briefue declaration , nostre dessein en cest œuvre de trois liures , est premierement enseigner l'homme à se bien cognoistre , & l'humaine condition , le prenant en tout sens , & regardant à tous visages ; c'est au premier liure : puis l'instruire à se bien regler & moderer en toutes choses ; ce que nous ferons en gros par aduis & moyens generaux & communs au second livre ; & particulierement au troisieme par les quatre vertus morales , sous lesquelles est comprise toute l'instruction de la vie humaine ; & toutes les parties du deuoir & de l'honeste. Voylà pourquoy cest œuvre , qui instruit la vie & les mœurs à bien viure & bien mourir , est intitulé Sageffe , comme le nostre precedent , qui instruait à bien croire , a esté appellé Verité , ou bien les trois Veritez , y ayant trois liures en cestuy-cy , comme en celuy

là. l'adjouste icy deux ou trois mots de bonne foy, l'un que i'ay questé par cy par là, & tiré la plus part des materiaux de cest ouurage, des meilleurs auteurs qui ont traité ceste matiere morale & politique, vraye science de l'homme, tant anciens, spécialement Seneque & Plutarque, grands docteurs en icelle, que modernes. C'est le recueil d'une partie de mes estudes: la forme & l'ordre sont à moy. Si je l'ay arrangé & agencé avec jugement & à propos, les Sages en jugeront, car meshuy en ce subject autres ne peuvent estre mes juges, & de ceux là volontiers receuray la reprimende: & ce que i'ay prins d'autrui, je l'ay mis en leurs propres termes, ne le pouvant dire mieux qu'eux. Le second que j'ay icy vsé d'une grande liberté & franchise à dire mes aduis, & à heurter les opinions contraires, bien que toutes vulgaires & communement receues, & trop grandes, ce m'ont dict aucuns de mes amis: auxquels i'ay respondu, que je ne formois icy ou inf-

truisois vn homme pour le cloistre, mais pour le monde, la vie commune & ciuile; ny ne faisois icy le Theologien, ny le cathedrant, ou dogmatifant, ne m'assubjettissant scrupuleusement à leurs formes, regles, stile, ains vsois de la liberté Accademique & Philosophique. La foiblesse populaire, & delicateffe feminine, qui s'offense de ceste hardiesse & liberté de paroles, est indigne d'entendre chose qui vaille. A la suite de cecy, je dis encores, que je traite & agis icy non pedantesquement selon les regles ordinaires de l'escole, ny avec estendue de discours, & appareil d'eloquence, ou aucun artifice. La Sageffe, *quæ si oculis ipsis cerneretur, mirabiles excitaret amores sui*, n'a que faire de toutes ces façons, pour la recommandation, elle est trop noble & glorieuse : les veritez & propositions y sont espees; mais souuent toutes seches & crues, comme aphorismes, ouvertures & semences de discours. I'y ay parsemé des sentences Latines, mais courtes, fortes & poëtiques tirées de

tres-bonne part , & qui n'interrompent ny ne troublent le fil du texte Francois. Car je n'ay peu encores estre induict à trouver meilleur de tourner toutes telles allegations en Francois (comme aucuns veulent) avec tel deschet & perte de la grâce & energie qu'elles ont en leur naturel & original, qui ne se peut jamais bien représenter en autre langage.

LE CONTENU DU TOME PREMIER.

PREFACE, où est parlé du titre, sujet, dessein, & Methode de tout cest oeuvre.

LIVRE PREMIER, Qui est de la cognoissance de soy & de l'humaine condition. Pag. 1

Premiere consider. de l'homme en soy & en gros. 11


Seconde consideration de l'homme qui est par comparaison de luy avec les autres creatures. 73

Troisiesme consideration de l'homme qui est en detail par toutes les pieces dont il est composé & establi. 91

Quatriesme consideration de l'homme, qui est par sa vie. 210

Cinquiesme & derniere consideration de l'homme par la grande diversité de ses naturels, suffisances, estats, professions, vacations. 219

D E



DE LA
SAGESSE.



LIVRE PREMIER,
Qui est la cognoissance de Soy, & de
l'humaine condition.

Exhortation a s'estudier & cognoistre.



CHAPITRE PREMIER,

Et praface à tout ce livre premier.

LE plus excellent & diuin conseil, le meilleur
& plus vtile aduertissement de tous, mais le plus
mal pratiqué, est de s'estudier & apprendre à
se cognoistre ; c'est le fondement de sagesse &

Tome I.

A

& acheminement à tout bien : folie non pareille que d'estre attentif & diligent à cognoistre toutes autres choses plustost que foy mesme : la vraye science & le vray estude de l'homme , c'est l'homme.

Dieu , nature , les sages , & tout le monde presche l'homme & l'exhorte de faict & de parole , à s'estudier & cognoistre. Dieu eternellement & sans cesse se regarde , se considere & se cognoist. Le monde a toutes ses veuës contraintes au dedans , & ses yeux ouuerts à se voir & regarder. Autant est obligé & tenu l'homme de s'estudier & cognoistre , comme il luy est naturel de penser , & il est proche à foy-mesme. Nature taille à tous ceste besogne. **Le mediter & entretenir ses pensées est chose sur toutes facile , ordinaire , naturelle , la pasture , l'entretien , la vie de l'esprit ,** *Cuius viuere est cogitare* : Or par où commencera , & puis continuera il à mediter , à s'entretenir plus justement & naturellement que par foy-mesme ? y a il chose qui luy touche de plus pres ? Certes aller ailleurs & s'oublier est chose dénaturée & tres-iniuste. C'est à chascun sa vraye principale vacation , que se penser & bien tenir à foy. Aussi voyons nous que chasque chose pense à foy , s'estudie la premiere , a des limites à ses occupations & desirs. Et toy homme , qui veux embrasser l'vnivers , tout cognoistre , contreroller & juger,

ne te cognois & n'y estudies : & ainsi en voulant faire l'habile & le scindic de nature, tu demeures le seul sot au monde. Tu es la plus vuide & necessiteuse, la plus vaine & miserable de toutes, & neantmoins la plus fiere & orgueilleuse. Parquoy regarde dedans toy, recognois toy, tiens toy à toy ; ton esprit & ta volonté, qui se consomme ailleurs, ramene le à soy mesme. Tu t'oublie, tu te responds, & te perds au dehors, tu te trahis & te desrobes à toy-mesme, tu regardes toujours deuant toy, ramasse toy & t'enferme dedans toy : examine toy, espie toy, cognoy toy.

Nosce teipsum, nec te quæseris extra.

Respue quod non es, tecum habita, &

Noris quam fit tibi curta supellex.

Tute consule.

Te ipsum concute, nunquid vitiorum

Insuerit olim natura, aut etiam consuetudo mala.

Par la cognoissance de soy l'homme monte & arriue plustost & mieux à la cognoissance de Dieu, que par tout autre chose, tant pour ce qu'il trouue en soy plus de quoy le cognoistre, plus de marques & traicts de la diuinité, qu'en tout le reste, qu'il peust cognoistre ; que pource qu'il peut mieux sentir, & sçauoir ce qui est & se remue en soy, qu'en toute autre chose.

Formasti me & posuisti super me manum tuam, ideo

mirabilis facta est scientia tua t. tui, ex me : Dont estoit grauée en lettres d'or sur le frontispice du temple d'Apollon Dieu (selon les payens) de science & de lumiere, ceste sentence, *Cognois toy*, comm'vne salutation & vn aduertissement de Dieu à tous, leur signifiant que pour auoir accez à la diuinité & entrée en son temple, il se faut cognoistre : qui se mescognoist en doit estre debouté, *sic te ignoras o pulcherrima egredere; & abi post hados tuos.*

Pour deuenir sage & mener vne vie plus réglée & plus douce, il ne faut point d'instruction d'ailleurs, que de nous. Si nous estions bons Escholiers, nous apprendrions mieux de nous, que de tous les liures. Qui remet en sa memoire & remarque bien l'excez de sa cholere passée, jusques ou ceste fieure l'a emporté, verra mieux beaucoup la laideur de ceste passion, & en aura horreur & hayne plus juste, que de tout ce qu'en dient Aristote & Platon : & ainsi de toutes les autres passions, & de tous les bransles & mouuemens de son ame. Qui se souuiendra de s'estre tant de fois mesconté en son jugement, & de tant de mauuais tours que luy a fait sa memoire, apprendra à ne s'y fier plus. Qui notera combien de fois il luy est aduenü de penser bien tenir & entendre vne chose, jusques à la vouloir pleuoir, & en respondre à autruy & à soy-mesme, & que le temps luy a puis fait

voir du contraire , apprendra à se deffaire de ceste arrogance importune & quereleuse presumption , ennemie capitale de discipline & de verité. Qui remarquera bien tous les maux qu'il a couru , ceux qui l'ont menacé , les legeres occasions , qui l'ont remué d'un estat en un autre , combien de repentirs lui sont venus en la teste , se preparera aux mutations futures , & à la recognoissance de sa condition , gardera modestie , se contiendra en son rang , ne heurtera personne , ne troublera rien , n'entreprendra chose , qui passe ses forces : Et voila justice & paix par tout. Bref nous n'auons point de plus beau miroir & de meilleur liure que nous mesmes , si nous y voulions bien estudier comme nous devons , tenant tousiours l'œil ouuert sur nous & nous espiant de pres.

Mais c'est à quoy nous pensons le moins, *nemo in sese tentat descendere*. Dont il aduient que nous donnons mille fois du nais en terre , & retombons tousiours en mesme faute , sans le sentir , ou nous en donner beaucoup. Nous faisons bien les fots à nos despens : les difficultez ne s'apperçoient en chasque chose , que par ceux , qui s'y cognoissent : Car encore faut il quelque degré d'intelligence à pouuoir remarquer son ignorance : Il faut pousser à vne porte , pour sçauoir qu'elle nous est close. Ainsi de ce que chascun se voit si resolu & satisfait ; & que chascun pense estre suffisamment entendu ,

signifie que chascun n'y entend rien du tout: Car si nous nous cognoissions bien, nous pouruoyrions bien mieux à nos affaires; Nous aurions honte de nous & nostre estat: & nous rendrions bien autres que ne sommes. Qui ne cognoist ses defauts, ne se soucie de les amender; qui ignore ses necessitez ne soucie d'y pouruoir, qui ne sent son mal & sa misere, n'aduise point aux reparations, & ne court aux remedes, *deprehendas te oportet priusquam emendes: sanitatis initium sentire sibi opus esse remedio.* Et voicy nostre malheur: car nous pensons toutes choses aller bien & estre en seureté. Nous sommes tant contents de nous mesmes, & ainsi doublement miserables. Socrate fust jugé le plus sage des hommes, non pour estre le plus sçauant & plus habille, ou pour auoir quelque suffisance par dessus les autres, mais pour mieux se cognoistre que les autres, en se tenant en son rang, faire bien l'homme. Il estoit le Roy des hommes, comme on dict que les borgnes sont rois parmy les aueugles, c'est-à-dire doublement priuez de sens: Car ils sont de nature foibles & miserables, & avec ce ils sont orgueilleux, & ne sentent pas leur mal. Socrates n'estoit que borgne: car estant homme comme les autres, foible & miserable, il le sçauoit bien, & recognoissoit de bonne foy sa condition, se regloit & viuoit selon elle. C'est ce que vouloit dire la verité à ceux qui pleins de

presumption par moquerie luy ayant dict, nous sommes donc à ton dire aueugles? si vous l'estiez, dict il, c'est-à-dire le pensez estre, vous y verriez; mais pource que vous pensez bien y voir, vous demeurez du tout aueugles: Car ceux qui voyent à leur opinion, sont aueugles en verité; & qui sont aueugles à leur opinion, ils voyent. C'est vne miserable folie à l'homme de se faire beste pour ne se cognoistre pas bien homme, *homo enim cum sis, id fac semper intelligas.* Plusieurs grands pour leur seruir de bride & de regle, ont ordonné, que l'on leur sonnast souuent aux oreilles, qu'ils estoient hommes. O le bel estude, s'il leur entroit dedans le cœur comm'il frappe à leur oreille! le mot des Atheniens à Pompeius le grand, *autant ex tu Dieu comme tu te recognois homme*, n'estoit pas trop mal dict, au moins cest estre homme excellent de se bien cognoistre homme.

La cognoissance de soy (chose tres-difficile & rare, comme se mesconter & tromper tres-facile) ne s'acquiert pas par autrui, c'est-à-dire par comparaisn, mesure, ou exemple d'autrui :

Plus alijs de te quam tu tibi credere noli.

moins encore par son dire & son jugement, qui souuent est court à voir, & desloyal ou craintif à parler. Ny par quelque acte singulier, qui fera quelquesfois eschappé sans y avoir

pensé , pouffé par quelque nouuelle , rare , & forte occasion , & qui fera plustost vn coup de fortune , ou vne faillie de quelque extraordinaire enthousiasme , qu'une production vrayement nostre. L'on n'estime pas la grandeur , grosseur , roideur d'une riuere , de l'eau qui luy est aduenue par vne subite alluion & débordement des prochains torrens & ruisseaux. Vn fait courageux ne conclud pas vn homme vaillant , ny vn œuvre de justice l'homme juste : Les circonstances & le vent des occasions & accidens nous emportent & nous changent : & souuent l'on est pouffé à bien faire par le vice mesme. Ainsi l'homme est il tres-difficile à cognoistre. Ny aussi par toutes les choses externes & adjacentes au dehors ; offices , dignitez , richesses , noblesses , grace , & applaudissement des grands ou du peuple. Ny par ses desportemens faits en publicq , car comme estant en eschec l'on se tient sur ses gardes , se retient , se contrainct. La crainte , la honte , l'ambition , & autres passions luy font jouer ce personnage , que vous voyez. Pour le bien cognoistre il le faut voir en son priué , & en son à tous les jours. Il est bien souuent tout autre en la maison , qu'en la rue , au palais , en la place ; autre avec ses domestiques qu'avec les estrangers. Sortant de la maison pour aller en publicq , il va jouer vne farce : ne vous arrestez pas là ; ce n'est pas luy , c'est tout vn autre ; vous ne le cognoistriez pas.

La cognoissance de foy ne s'acquiert point par tous ces quatre moyens, & ne deuons nous y fier; mais par vn vray, long, & assidu estude de foy, vne serieuse & attentifue examination non seulement des ses paroles & actions, mais de ses pensées plus secretes (leur naissance, progres, durée, repetition) de tout ce qui se remuë en foy, jusques aux songes de nuict, en s'espiant de pres, en se tastant souuent & à toute heure, pressant & pinssant jusques au vif. Car il y a plusieurs vices en nous cachez, & ne se sentent à faute de force & de moyen, ainsi que le serpent venimeux, qui engourdi de froid se laisse manier sans danger. Et puis il ne suffist pas de recognoistre sa faute en destail & en indiuidu, & tacher de la reparer; il faut en general recognoistre sa foiblesse, sa misere, & en venir à vne reformation & amandement universel.

Or il nous faut estudier serieusement en ce liure premier à cognoistre l'homme, le prenant en tout sens, le regardant à tous visages, luy tastant le poux, le sondant jusques au vif, entrant dedans avec la chandelle & l'esprouuette, fouillant & furettant partous les trous, coings, recoings, destours, cachots & secrets, & non sans cause: Car c'est le plus fin & feinct, le plus couuert & fardé de tous, & presque incognoissable. Nous le considererons donc en

cinq manieres representées en ceste table , qui est le sommaire de ce liure.

Cinq confi- dera- tions de l'hom- me & de l'hu- maine condi- tion.	1. en foy & en gros par	la generale peinture , ses cinq qua- litez plus essentiellles, qui sont	Vanité, Foiblesse, Inconstance, Misere , Presumption.
	2. Par comparaison de luy avec les bestes.		
	3. par tou- tes les pie- ces dont il est com- posé	Corps & ses appartenan- ces.	santé, beauté, sens naturels, vestemens.
		Esprit & ses parties.	entendement, raison, ima- gination, vo- lonté , opi- nion, passions
	4. Par sa vie en blot.		
	5. Par les differen- ces qui sont entre les hom- mes, sça- voir en leurs.	1. Naturels , 2. esprits & suffisances , 3. charges & degrez de su- periorité & inferiorité , 4. professions & conditions de vie , 5. avantages & desadvan- tages naturels, aquis , & fotuits.	



P R E M I E R E
C O N S I D E R A T I O N

DE L'HOMME EN SOY ET EN GROS.



C H A P I T R E I I.

Generale peinture de l'homme.

TOVTES les peintures & descriptions que les sages & ceux, qui ont fort estudié en ceste science humaine ont donné de l'homme, semblent toutes s'accorder & revenir à marquer en l'homme quatre choses, vanité, foiblesse, inconstance, misere, l'appellant despouille du tems, iouët de la fortune, image d'inconstance, exemple, & monstre de foiblesse, trebuchet d'enuie & de misere, longe, fantosme, cendre, vapeur, rosée de matin, fleur incontinent espounouye & fanée, vent, foin, vessie, ombres, feuilles d'arbres emportées par le vent; orde semence en son commencement, esponge d'ordures, & sac de miseres en son milieu, puantise & viande de vers en sa fin, bref la plus calamiteuse & miserable chose du monde. Iob vn des plus sursisians en ceste matiere, tant en

theorique qu'en pratique, l'a fort au long depinct, & apres luy Salomon en leurs liures. Pline pour estre court semble l'avoir bien promptement representé le disant estre le plus miserable, & ensemble le plus orgueilleux de tout ce qui est au monde, *solum ut certum fit nihil esse certi, nec miseriùs quicquam homine aut superbiùs*. Par le premier mot (de miserable) il comprend toutes ces precedentes peintures, & tout ce que les autres ont dit: mais en l'autre (le plus orgueilleux) il touche vn autre grand chef bien important: & semble en ces deux mots auoir tout dit. Ce sont deux choses qui semblent bien se heurter & empescher que misere & orgueil, vanité & presomption: voila vne estrange & monstreuse cousture que l'homme.

D'autant que l'homme est composé de deux pieces fort diuerfes, esprit & corps, il est malaisé de le bien descrire entier & en blot. Aucuns rapportent au corps tout ce que l'on peut dire de mauuais de l'homme: le font excellent & l'esleuent par dessus tout pour le regard de l'esprit: mais au contraire, tout ce qu'il y a de mal, non seulement en l'homme, mais au monde, est forgé & produit par l'esprit: & y a bien plus de vanité, inconstance, misere, presomption en l'esprit, dont Democrite appelle cest esprit vn monde caché de miseres, & Plutarque le prouue bien par vn liure expres, & de ce subject. Or ceste premiere generale

consideration de l'homme , qui est en soy & en gros , sera en ces cinq points , vanité , foiblesse , inconstance , misere , presumption , qui sont ses plus naturelles & uniuerselles qualitez : mais les deux dernieres le touchent plus au vif. Au reste il y a des choses communes à plusieurs des cinq , que l'on ne fait bien , à laquelle l'attribuer plustost & specialement la foiblesse & la misere.

CHAPITRE III.

I. Vanité.

LA vanité est la plus essentielle & propre qualité de l'humaine nature. Il n'y a point d'autre chose en l'homme , soit malice , malheur , inconstance , irresolution (& de tout cela y en a tousjours à foison) tant comme de vile inanité , sottise & ridicule vanité. Dont rencontroit mieux Democrite se riant & mocquant par desdain de l'humaine condition , qu'Heraclite qui ploroit & s'en donnoit peine , par où il tesmoignoit d'en faire compte & estime : Et Diogenes qui donnoit du nais , que Tymon le hayneux & fuiard des hommes. Pindare l'a exprimé plus au vif , que tout autre , par les deux plus vaines choses du monde , l'appellant

songe de l'ombre. C'est ce qui a poussé les sages à vn si grand mespris des hommes , dont leur estant parlé de quelque grand dessein & belle entreprise , la iugeans telle , souloient dire , que le monde ne valoit pas , que l'on se mist en peine pour luy (ainsi respondit Statilius à Brutus luy parlant de la conspiration contre Cæsar) que le sage ne doit rien faire que pour soy , que ce n'est raison que les sages & la sagesse se mettent en danger pour les fots.

Ceste vanité se demonstre & tesmoigne en plusieurs manieres , premierement en nos pensées & entretiens priuez , qui sont bien souuent plus que vains , friuoles , & ridicules : auxquels toutesfois nous consommons grand temps , & ne le sentons point. Nous y entrons , y seiournons , & en sortons insensiblement , qui est bien double vanité , & grande inaduerrence de soy. L'un se promenant en vne salle regarde à compasser ses pas d'une certaine façon sur les carreaux ou tables du plancher : Cest autre discours en son esprit longuement & avec attention comment il se comporteroit s'il estoit Roy , Pape ou autre chose , qu'il fait ne pouuoir iamais estre : ainsi se paist de vent , & encore de moins , car de chose qui n'est & ne fera point : Cestui-cy songe fort comment il composera son corps, ses contenance, son maintien , ses paroles d'une façon affectée , & se plaist à le faire , comme de chose qui luy sied.

ford bien , & à quoy tous doiuent prendre plaisir. Et quelle vanité & sorte inanité en nos desirs & souhaits , d'où naissent les creances , & esperances encores plus vaines , & tout cecy n'aduient pas seulement lors que n'auons rien à faire , & que sommes engourdis d'oisiuété , mais souuent au milieu & plus fort des affaires : Tant est naturelle & puissante la vanité , qu'elle nous desrobe & nous arrache des mains de la verité , solidité & substance des choses , pour nous mettre au vent & au rien.

Mais la plus sorte vanité de toutes est ce soin penible de qui se fera icy , apres qu'en seront partis. Nous estendons nos desirs & affections au dela de nous & de nostre estre ; voulons pouruoir à nous estre fait des choses lors que ne ferons plus. Nous desirons estre louëz apres nostre mort ; quelle plus grande vanité ? Ce n'est pas ambition , comme l'on pourroit penser , qui est vn desir d'honneur sensible & perceptible ; Si ceste louange de nostre nom peut accommoder & seruir en quelque chose à nos enfans , parens , & amis suruiuans , bien soit , il y a de l'vtilité. Mais desirer comme bien vne chose qui ne nous touchera point , & dont n'en sentirons rien , c'est pure vanité , comme de ceux qui craignent que leurs femmes se marient apres leur decez , desirent avec grande passion qu'elles demeurent vefues , & l'achètent bien chere-

ment en leurs testamens , leur laissant vne grande partie de leurs biens à cette condition. Quelle folle vanité , & quelquefois injustice ? c'est bien au rebours de ces grands hommes du temps passé , qui mourans exhortoient leurs femmes à se marier tost , & engendrer des enfans à la republique. D'autres ordonnent que pour l'amour d'eux on porte telle & telle chose sur foy , ou que l'on face telle chose à leur corps mort : nous consentons peut estre d'eschaper à la vie , mais non à la vanité.

Voicy vne autre vanité , nous ne vivons que par relation à autrui : nous ne nous soucions pas tant quels nous soyons en nous , en effet & en verité , comme quels nous soyons en la cognoissance publique ; tellement que nous nous defraudons souuent , & nous priuons de nos commoditez & biens , & nous gehennons pour former les apparences à l'opinion commune. Cecy est vray , non seulement aux choses externes , & du corps , & en la despence & emploitte de nos moyens , mais encore aux biens de l'esprit , qui nous semblent estre sans fruit , s'il ne se produisent à la veüe & approbation estrangere , & si les autres n'en iouissent.

Nostre vanité n'est pas seulement aux simples pensées , desirs , discours ; mais encore elle agite secouë & tourmente & l'esprit & le corps : souuent les hommes se remuent & se tourmentent plus pour des choses legeres & de

neant , que pour des grandes & importantes.

Nostre ame est souvent agitée par de petites fantasies , songes , ombres & reueries sans corps & sans subiect , elle s'embroüille & se trouble de cholere , despit , tristesse , ioye , faisant des chasteaux en Espagne. Le souuenir d'un adieu , d'une action & grace particuliere nous frappe & afflige plus , que tout le discours de la chose importante. Le son des noms & de certains mots prononcez piteusement , voire des souspirs & exclamations nous penetre jusques au vif , comme sçauent & practiquent bien les harengueurs , affronteurs , & vendeurs de vent & de fumée. Et ce vent surprend & emporte quelquefois les plus fermes & assurez , s'ils ne se tiennent sur leur garde , tant est puissante la vanité sur l'homme. Et non seulement les choses petites & legeres nous secouent & agitent : mais encores les faussetez & impostures , & que nous sçauons telles (chose estrange) de façon que nous prenons plaisir à nous piper nous-mesmes à escient , nous paistre de fausseté & de rien (*ad fallendum nosmetipsos ingeniosissimi sumus*) telmoins ceux qui pleurent & s'affligent à ouir des contes , & à voir des Tragedies , qu'ils savent estre inventées & faictes à plaisir , & souuent des fables , qui ne furent iamais : diray-ie encore , de tel qui est coiffé & meurt apres vne , qu'il sçait estre laide , vieille , souillée , & ne l'aimer point , mais

pource qu'elle est bien peinte & plaistrée , ou caqueteresse , ou fardée d'autre imposture , laquelle il sçait & recognoist tout au long & au vray.

Venons du particulier de chacun à la vie commune , pour voir combien la vanité est attachée à la nature humaine , & non seulement vn vice priué & personnel. Quelle vanité & perte de tems aux visites , salutations , accueils & entretiens mutuels , aux offices de courtoisie , harangues , ceremonies , aux offres , promesses , loüanges ? Combien d'hyperboles d'hypocrisie , de fausseté d'imposture au veu & sceu de tous , de qui les donne , qui les reçoit , & qui les oyt , tellement que c'est vn marché & complot faict ensemble de se mocquer , mentir & piper les vns les autres. Et faut que celuy-la , qui sçait que l'on luy ment impudemment , dise grand mercy : & cestui-cy , qui sçait que l'autre ne l'en croit pas , tienne bonne mine effrontée , s'attendant & se guettant l'un l'autre , qui commensera , qui finira , bien que tous deux voudroyent estre retirez. Combien souffre l'on d'incommodité ? l'on endure le serain , le chaud , le froid ? l'on trouble son repos , sa vie pour ces vanitez courtisanes ; & laisse on affaires de poids pour du vent ? Nous sommes vains aux despans de nostre aise , voire de nostre santé & de nostre vie. L'accident & tres-leger foule aux pieds la substance , & le vent emporte le corps ,

tant l'on est esclaué de la vanité : & qui feroit autrement seroit tenu pour vn sot & mal entendant son monde : c'est habileté de bien louer ceste farce & sottise de n'estre pas vain. Estans venus aux propos & deuis familiers , combien de vains & inutiles , faux , fabuleux , controuuez (sans dire les meschans & pernicious qui ne font de ce conte) combien de vanteries & de vaines jactances ? L'on cherche & se plait-on tant à parler de soy , & de ce qui est sien , si l'on croit auoir faict ou dict , ou posseder quelque chose , que l'on estime , l'on n'est point à son aise , que l'on ne le face sçauoir ou sentir aux autres. A la premiere commodité l'on la conte , l'on la faict valoir , l'on l'encherist , voire l'on n'attend pas la commodité , l'on la cherche industrieusement. Dequoy que lon parle , nous nous y meslons tousiours , avec quelque auantage : nous voulons que l'on nous sente , que l'on nous estime , & tout ce que nous estimons.

Mais pour monstrier encores mieux combien l'inanité a de credit & d'empire sur la nature humaine , souuenons nous que les plus grands remuemens du monde , les plus generales & effroyables agitations des estats & des empires , armées , batailles , meurtres , proces & querelles ont leurs causes bien logeres , ridicules , & vaines , tesmoins les guerres de Troye & de Grece , de Sylla &

Marius , d'où sont ensuiuies celles de Cæsar , Pompée , Auguste & Antoine. Les Poètes ont bien signifié cela, qui ont mis pour vne pomme la Grece & l'Asie à feu & à sang: les premiers ressorts & motifs sont de neant , puis ils groïssissent , tesmoins de la vanité & folie humaine. Souuent l'accident faict plus que le principal , les circonstances menuës piquent & touchent plus viuement , que le gros de la chose , & le subiect mesme. La robe de Cæsar troubla plus Rome , que ne fist sa mort , & les vingt & deux coups du poignard qui luy furent donnez.

Finalement la couronne & la perfection de la vanité de l'homme se monstre en ce qu'il cherche , se plaist , & met sa felicité en des biens vains & friuoles , sans lesquels il peust bien & commodement viure : & ne se soucie pas comme il faut des vrays & essentiels , son cas n'est que vent ; tout son bien n'est qu'en opinion & en songe : il n'y a rien de pareil ailleurs. Dieu a tous biens en essence , & les maux en intelligence ; l'homme au contraire possède ses biens par fantasie , & les maux en essence. Les bestes ne se contentent , ny ne se paissent d'opinions & de fantasies , mais de ce qui est present , palpable & en verité. La vanité a esté donnée à l'homme en partage : il court , il bruißt , il meurt , il fuit , il chasse , il prend vne

ombre, il adore le vent. Va leſtu eſt le gaing de ſon iour.

C H A P I T R E I V.

I I. Foibleſſe.

VOICY le ſecond chef de la conſidération & cognoiſſance humaine ; comment la vanité feroit-elle autre que foible & freſle ? Ceſte foibleſſe eſt bien confeſſée & aduouée de tous, qui en comptent pluſieurs choſes aiſées, à apperceuoir de tous : mais n'eſt pas remarquée telles ny ès choſes qu'il faut, comme ſont celles, où il ſemble eſtre plus fort & moins foible, au deſir, au iour, & vſer des choſes qu'il a, & qu'il tient, à tout bien & mal : bref celles où il ſe glorifie, en quoy il penſe ſe preualoir & eſtre quelque choſe, ſont les vrays teſmoins de ſa foibleſſe ; voyons cecy mieux par le menu.

Premierement au deſirer, l'homme ne peut aſſoir ſon contentement en aucune choſe, & par deſir meſme & imagination. Il eſt hors noſtre puiſſance de choiſir ce qu'il nous faut, quoy que nous ayons deſiré, & qu'il nous aduienne ? il ne nous ſatisfaict point, & allons beants apres les choſes incognuës & aduenir,

d'autant que les presentes ne nous saoulent point, & estimons plus les absentes. Que l'on baille à l'homme la carte blanche, que l'on le mette à mesme de choisir, tailler, & prescrire, il est hors de sa puissance de le faire tellement, qu'il ne s'en desdise bien tost, enquoy il ne trouue à redire, & ne vueille adiouster, oster, ou changer; il desire ce qu'il ne sçauroit dire. Au bout du compte rien ne le contente, se fasche & s'ennuye de soy-mesme.

Sa foiblesse est encore plus grande au iouir & vser des choses, & ce en plusieurs manieres; premierement en ce qu'il ne peust manier & se seruir d'aucune chose en sa pureté & simplicité naturelle. Il les faut desguiser, alterer, & corrompre pour l'accommoder à nostre main: les elemens, les metaux, & toutes choses en leur naturel ne sont propres à nostre vsage; les biens, les voluptez & plaisirs ne se peuuent laisser iouir sans meslange de mal & d'incommodité, *medio de fonte leporum surgit amari aliquid, quod in ipsis floribus angat.* L'extreme volupté a vn air de gémissement & de plainte, estant venue à sa perfection c'est foiblesse, defaillance, langueur: vn extreme & plein contentement à plus de feuerité raffise, que de gayeté eniouée: *Ipsa felicitas se nisi temperat, gregit?* D'ou disoit vn Ancien, que Dieu

nous vend tous les biens, qu'il nous enuoye. c'est à dire, qu'il ne nous en donne aucun pur, que nous ne l'achetions au poids de quelque mal. Aussi la tristesse n'est point pure & sans quelque alliage de plaisir, *labor voluptasque dissimilima natura, societate quadam naturali inter se sunt iuncta, est quadam fiere voluptas.* Ainsi toutes choses en ce monde sont mixtionnées & destrempées avec leur contraire : les mouuemens & plis du visage qui seruent au rire, seruent aussi au pleurer, comme les peintres nous apprennent. Et nous voyons que l'extremité du rire se mesle aux larmes. Il n'y a point de bonté en nous, qu'il n'y aye quelque teincture vicieuse, comme se dira tantost en son lieu. Il n'y a aussi aucun mal sans quelque bien : *nullum sine auctoramento malum est.* Toujours à quelque chose sert malheur, nul mal sans bien, nul bien sans mal en l'homme ; tout est meslé, rien de pur en nos mains. Secondement tout ce qui nous aduient, nous le prenons & en iouissons de mauuaise main, nostre goust est irrésolu & incertain : Il ne sçait rien tenir ny iouir de bonne façon ; De la est venue la question interminable du souverain bien. Les choses meilleures souuent en nos mains par nostre foiblesse, vice, & insuffisance s'empirent, se corrompent, deuiennent à rien ; nous sont inutiles, voire quelquefois contraires & dommageables.

Mais la foiblesse humaine se montre richement au bien & au mal , en la vertu & au vice , c'est que l'homme ne peult estre , quand bien il voudroit , du tout bon ny du tout meschant. Il est impuissant à tout. Sur ce propos considerons trois poincts , le premier est , que l'on ne peut faire tout bien , ny exercer toute vertu , d'autant que plusieurs vertus sont incompatibles , & ne peuuent demeurer ensemble , comme la continence filiale & viduale , qui sont entierement differentes , le coelibat & le mariage , estans les deux seconds estats de viduité & de mariage bien plus penibles & affaireux , & ayans plus de difficulté & de vertu , que les deux premiers de filiage & de coelibat : qui ont aussi plus de pureté , de grace , & d'aisance. La constance qui est en la pauureté , indigence , aduersité , & celle qui est en l'abondance & prosperité , la patience de mendicité & la liberalité. Cecy est encore plus vray des vices , qui sont opposites les vnes aux autres.

Le second est que bien souuent l'on ne peult accomplir ce qui est d'une vertu , sans le hurt & offence d'une autre vertu , ou d'elle mesme , d'autant qu'elles s'entre-empeschent : d'ou vient que l'on ne peut satisfaire à l'une qu'aux despens de l'autre. C'est tousiours decouurer vn autel pour en couvrir un autre , tant est courte & foible toute la suffisance humaine ,

humaine , qu'elle ne peut bailler ny receuoir vn reglement certain , vniuersel , & constant à estre homme de bien : & ne peut si bien aduiser & pouruoir que les moyens de bien faire ne s'entr'empeschent souuent. La charité & la iustice se contredisent : si ie recontre mon parent & amy en la guerre de contraire party , par iustice ie le doibs tuer , par charité l'espargner & sauuer. Si vn homme est blessé à la mort où n'y aye aucun remede , & n'y reste qu'un languir tres-douloureux , c'est œuvre de charité de l'acheuer , mais qui seroit puny par iustice : voire estre trouué pres de luy en lieu escarté , ou y a doute du meurtrier , bien que ce soit pour luy faire office d'humanité , est tres-dangereux : & n'y peut aller de moins que d'estre trauaillé par la iustice , pour respondre de cest accident , dont l'on est innocent. Et voila comment la iustice non seulement heurte la charité , mais elle mesme s'entraue. & s'empesche , *summum ius summa iniuria.*

Le troisieme plus notable de tous , l'on est contrainct souuent de se seruir & vser de mauuais moyens , pour euitier & sortir d'un plus grand mal , ou pour paruenir à vne bonne fin , tellement qu'il faut quelquefois legitimer & autoriser non seulement les choses , qui ne sont point bonnes , mais encores les mauuaises , comme si pour estre bon , il

falloit estre vn peu meschant. Et cecy se void non seulement au faict de la police & de la iustice : mais encores en la religion , qui monstre bien que toute la cousture & conduite humaine est bastie & faicte de pieces maladifues.

En la police, combien de choses mauuaises permises & en vsage public, non seulement par conuiuence ou permission, mais encore par approbation des loix ? comme se dira apres en son lieu, *ex senatusconsultis & plebiscitis scelera exercentur*. Pour descharger vn estat & republique de trop de gent, ou de gens bouillants à la guerre, qu'elle ne peut plus porter, comme vn corps replet de mauuaises ou trop d'humeurs, l'on les enuoye ailleurs, s'accommoder aux despens d'autrui, comme les François, Lombards, Goths, Vandales, Tartares, Turcs : pour éviter vne guerre ciuile l'on en entretient vne estrange. Pour instruire à temperance, Licurgus faisoit enyurer les Ilotes serfs, pour par ce desbordement faire prendre horreur de ce vice. Les Romains pour dresser le peuple à la vaillance & mespris des dangers & de la mort, dressoyent les spectacles furieux des gladiateurs & escrimeurs à outrance. Ce qu'ils firent au commencement des criminels, puis des serfs innocens, enfin des libres qui se donnoyent à cela ; les bourdeaux aux grandes

villes, les vsures, les diuorces en la loy de Moyse, & plusieurs autres nations & religions, permis pour éuiter de plus grands maux.

En la iustice, laquelle ne peut subsister & estre en exercice sans quelque meſlange d'iniustice, non seulement la commutative, cela n'est pas estrange, il est aucunement neceſsaire & ne ſçauroit on viure, & trafiquer ensemble, sans læſion, offence, & dommage mutuel, & les loix permettent de se tromper au deſſous la moitié de iuste pris : mais la distributive, comme elle meſme confeſſe, *summum ius summa iniuria* : & *omne magnum exemplum habet aliquid ex iniquo, quod contra singulos utilitate publica rependitur*. Platon permet & le ſtile est tel en plusieurs endroits d'attirer par fraudes & fauſſes eſperances de faueur ou pardon le criminel à deſcouvrir ſon faiſt. C'est par iniustice, piperie, & impudence vouloir arriuer à la iustice. Et que dirons nous de l'inuention des gehennés, qui est pluſtoſt vn eſſay de patience, que de verité ? Car celuy, qui les peut ſouffrir, & ne les peut ſouffrir, cachera la verité. Pourquoi la douleur fera-elle pluſtoſt dire ce qui est, que ce qui n'est pas ? ſi l'on penſe que l'innocent eſt aſſez patient pour ſupporter les tourments, & pourquoi ne le fera celuy qui eſt coupable, eſtant queſtion de ſauuer ſa vie ? Pour excuſe

on diët que la torture estonne la coupable , l'affoiblit , & luy fait confesser sa fausseté ; & au rebours fortifie l'innocent : mais il s'est tant souuent veu le contraire , cecy est captieux , & à dire vray vn poure moyen , plein d'incertitude & de doute. Que ne diroit & ne feroit-on pour fuir à telles douleurs ? *etenim innocentes mentiri cogit dolor* , tellement qu'il aduient que le iuge , qui donne la gehenne , afin de ne faire mourir l'innocent , il le fait mourir & innocent & gehenné. Mille & mille ont chargé leurs testes de fausses accusations : mais au bout du conte est ce pas grande iniustice & cruauté de tourmenter & rompre vn homme , de la faute duquel on doute encore ? Pour ne le tuer sans occasion , l'on luy fait pire que le tuer : s'il est innocent & supporte la peine , quelle raison luy est-il faicte du tourment iniuste ? Il sera absous , grand mercy. Mais quoy c'est le moins mal que la foiblesse humaine aye peu inuenter : toutesfois n'est pas en pratique par tout. Il semble que commettre au combat les parties , quand l'on ne peut descourir la verité (moyen condamné par la Chrestienté , & iadis fort en vsage) soit moins iniuste & cruel.

En la Religion , les plus grandes & solempnelles actions sont marques honteuses & remedes aux maladies humaines. Les sacrifices

qui ont esté anciennement en si grande reuerence par tout le monde vniuersel , voire en la religion Iudaique , & encore sont en vſage en plusieurs endroicts du monde , non ſeulement des beſtes , mais encore des hommes viuans , voire des innocens : Quelle plus grande rage & manie peut entrer en l'imagination , que de penſer appaiſer & gratifier Dieu par le maſſacre & ſang des beſtes ? *non ſanguine colendus Deus ; quæ enim ex trucidatione immerentium voluptas eſt ?* Quelle folie de penſer faire ſeruiſſe à Dieu en luy donnant & preſentant , & non pluſtoſt en luy demandant & implorant ? Car c'eſt grandeur de donner & non de prendre. Certes les ſacrifices eſtoient ordonnez en la loy de Moyſe , non pource que Dieu priſt plaſiſr , ou que ce fuſt choſe par aucune raiſon bonne de foy , *ſi voluiſſes ſacrificium dediſſem , utique holocauſtis non delectaberis , ſacrificium & oblationem noluiſti , holocauſtum pro peccato non poſtulaſti* ; mais pour ſ'accommoder à la foibleſſe humaine : car il eſt permis de folier avec les petits enfans. La pénitence eſt la choſe là plus recommandée , & des principales de la religion ; mais qui preſuppoſe peché , & eſt remede contre iceluy , ſans lequel ce ſeroit de foy choſe mauuiſe : car le repentir , la triſteſſe , & affliction d'eſprit eſt mal. Le iurement de meſme , cauſé par l'infidelité & meſſiance humaine , & remede contre icelle , ce ſont tous biens non

de foy, mais comme remedes aux maux. Ce sont biens pource qu'ils sont vtiles & necessaires, & non au rebours. Ce sont biens comme l'esternuemment & la medecine, bons signes venans de mauuaise garison de maux : ce sont biens, mais tels qu'il seroit beaucoup meilleur qu'il n'y en eust jamais, & qu'il n'en fust point besoin.

Si l'homme est foible à la vertu, comme il vient d'estre montré, il l'est encore plus à la verité. C'est chose estrange, l'homme desire naturellement sçauoir la verité, & pour y paruenir remuë toute chose : neantmoins il ne la peut souffrir : quand elle se presente, son esclat l'estonne, son esclat l'atterre, ce n'est point de sa faute, car elle est tres-belle, tres-amiable & tres-conuenable à l'homme, & peut-on d'elle dire encore mieux, que de la vertu & sagesse : que si elle se pouuoit bien voir, elle rauiroit & embraseroit tout le monde en son amour. Mais c'est la foiblesse de l'homme qui ne peut recevoir & porter vne telle splendeur, voire elle l'offense. Et celuy qui la luy presente est souuent tenu pour ennemy, *veritas odium parit*. C'est acte d'hostilité que de luy montrer ce qu'il ayme & cherche tant. L'homme est fort à desirer, & foible à recevoir. Les deux principaux moyens qu'il employe, pour paruenir à la cognoissance de la verité, sont la raison & l'experience. Or tous deux sont si foi-

bles & incertains (bien que l'experience beaucoup plus) que n'en pouuons rien tirer de certain. La raison a tant de formes , est tant ployable , ondoyante , comme sera dit amplement en son lieu. L'experience n'en a pas moins, les euenemens sont tousiours dissemblables. Il n'y a rien si vniuersel en la nature , que la diuersité , rien si rare & difficile , voire quasi impossible , que la similitude. Et si l'on ne peut remarquer la dissemblance , c'est ignorance & foiblesse. Ce qui s'entend de parfaicte & entiere semblance & dissemblance. Car à vray dire tous les deux sont par tout : il n'y a chose aucune qui soit entierement semblable & dissemblable à vne autre. C'est un ingenieux meslange de nature.

Tout ce que dessus montre combien est grande la foiblesse humaine au bien , à la vertu & à la verité : mais qui est plus estrange , elle est aussi grande au mal. Car voulant estre meschant , encore ne le peut-il estre du tout , & n'y laisser rien à faire. Il y a tousiours quelque remords , & craintifue consideration , qui ramolit & relasche la volonté , & reserue encores quelque chose à faire : ce qui a causé à plusieurs leur ruine , bien qu'ils eussent projecté là dessus leur salut. C'est foiblesse & sottise , dont est venu le proverbe à leurs despens , *Qu'il ne faut iamais folier à demy.*

Remarquons encore plusieurs autres effects

& tesmoignages de la foiblesse humaine. C'est foiblesse & relative de n'oser, ny pouuoir reprendre autrui ni estre reprins volontiers; qui est foible ou courageux en l'un, l'est aussi en l'autre. Or c'est vne grande delicateffe se priuer, ou autrui d'un si grand fruit, pour vne si legere & superficielle piqueure, qui ne fait que toucher & pinsser l'oreille. A ce pareil est voisin cet autre de ne pouuoir refuser avec raison, ny aussi recevoir & souffrir doucement un refus.

Aux fausses accusations & mauuais soupçons qui courent & se font hors iustice, il se trouue double finesse, l'une qui est aux interessez, accusez & soupçonnez, c'est de se iustifier & excuser trop facilement, soigneusement & quasi ambitieusement. *Mendax infamia terret quem nisi mendosum?* C'est trahir son innocence, mettre sa conscience & son droit en compromis & en arbitrage, que de plaider ainsi, *perspicuitas argumentatione eleuatur*. Socrate en iustice mesmes ne le voulsist faire ny par soy ny par autrui, refusant d'employer le beau plaider du grand Lyfias, & aima mieux mourir. L'autre est au cas contraire, c'est quand l'accusé & preuenu courageux ne se soucie de s'excuser ou justifier, parce qu'il mesprise l'accusation & l'accusant comme indignes de responce & justification, & ne se veut faire ce tort d'entrer en telle lice, practiqué par les hommes genereux, par Scipion

sur tous plusieurs fois d'une fermeté merueilleuse : lors les autres s'en offensent ou estimans cela trop grande confiance & orgueil , & se picquans de ce qu'il sent trop son innocence & ne se desmet pas , ou bien imputans ce silence & mespris à faute de cœur , deffiance de droict , impuissance de se justifier. O foible humanité , que l'accusé ou soupçonné se defende ou ne se defende , c'est foiblesse & lâcheté. Nous lui desirons du courage à ne s'excuser , & quand il l'a , nous sommes foibles à nous en offenser.

Vn autre argument de foiblesse est de s'assubjectir & acoquiner à une certaine façon de viure particuliere , c'est mollesse poltrone , & delicateffe indigne d'un honneste homme , qui nous rend incommodes & desagreables en conversation , & tendres au mal , au cas qu'il faille changer de maniere de faire. C'est aussi honte de n'oser ou laisser par impuissance à faire ce que l'on voit faire à ses compagnons. Il faut que telles gens s'aillent cacher & viure en leur foyer : la plus belle façon est d'estre souple & ployable à tout , & à l'excez mesmes si besoin est , pouuoir oser & sçauoir faire toutes choses , & ne faire que les bonnes. Il fait bon prendre des reigles , mais non s'y afferuir.

Il semble appartenir à foiblesse & estre une grande sottise populaire de courir apres les exemples estrangers & scholastiques , apres

les allegations , ne faire estat que des tesmoignages imprimez , ne croire les hommes s'ils ne sont en liure ny verité si elle n'est vieille. Selon cela les sottises si elles sont en moule , elles sont en credit & en dignité. Or il s'y fait tous les jours deuant nous des choses , que si nous auions l'esprit & la suffisance de les bien recueillir , esplucher , juger viuement & trouuer leur jour , nous en formerions des miracles & merueilleux exemples , qui ne cedent en rien à ceux du temps passé , que nous admirons tant , & les admirons , pource qu'ils sont vieux & sont escripts.

Encores un tesmoignage de foiblesse est que l'homme n'est capable que des choses mediores , & ne peut souffrir les extremités. Car si elles sont petites & en leur monstre viles , il les deprise & desdaigne comme indignes , & s'offense de les considerer : si elles sont fort grandes & esclatantes , il les redoute , les admire , & s'en scandalise. Le premier touche principalement les grands & subtils , le second se trouue aux plus foibles.

Elle se monstre aussi bien clairement à l'oüie, vuë & au coup subit des choses nouuelles & inopinées qui nous surprennent & laissent à l'impourueu : car elles nous estonnent si fort , qu'elles nous ostent les sens & la parole , *diriguit visu in medio , calor ossa reliquit , labitur & longo vix tandem tempore fatur* , quelquefois

la vie mesmes : soient elles bonnes, tefmoin la Dame Romaine , qui mourut d'aife voyant son fils retourné de la defroute , Sophocles & Denis le tyran ; soient mauuaifes, comme Diodorus , qui mourut sur le champ de honte, pour ne pouuoir defueloper vn argument.

Encores cestui cy , mais qui sera double , & de deux façons contraires. Les vns cedent & font vaincus par les larmes & humbles supplications d'autrui , & se piquent du courage de la brauerie , les autres au rebours ne s'esmeuent par toutes les submissions & plaintes , & se laissent gagner à la constance & resplution. Il n'y a point de doute , que le premier ne vienne de foiblesse : aussi se trouve-il volontiers ès ames molles & vulgaires. Mais le second n'est sans difficulté , & se trouue en toute sorte de gens. Il semble que se rendre à la vertu & à vne vigueur masle & genereuse , est d'ame forte aussi & genereuse : Et il est vray , s'il se fait par estimation & reuerence de la vertu , comme fit Scanderberch receuant en grace vn soldat pour l'auoir veu prendre party de se defendre contre luy , Pompeius pardonnant à la ville des Mammertins en consideration de la vertu du ciſoyen Zenon , l'Empereur Conrad pardonnant au Duc de Bauieres & autres hommes assiegez , pour la magnanimité des femmes , qui les luy desroboient & emportoient sur

leurs testes. Mais si c'est par estonnement & effray de son clat, comme le peuple Thebain qui perdit le cœur oyant Epaminondas accusé raconter ses beaux faicts & luy reprocher avec fierté son ingratitude, c'est foiblesse & lacheté: le faict d'Alexandre mesprisant la braue resolution de Betis prins avec la ville de Gaza où il commandoit, ne fut de foiblesse ny de courage, mais de colere, laquelle en luy ne receuoit bride ny moderation aucune.

CHAPITRE V.

III. *Inconstance.*

L'HOMME est vn subject merueilleusement diuers & ondoyant, sur lequel il est tres-mal aisé d'y asseoir jugement asseuré, jugement, dis-ie, vniuersel & entier, à cause de la grande contrariété & dissonance des pieces de nostre vie. La pluspart de nos actions ne sont que saillies & bouttées poussées par quelques occasions: ce ne sont que pieces rapportées. L'irresolution d'une part, puis l'inconstance & l'instabilité est le plus commun & apparent vice de la nature humaine. Certes nos actions se contredisent souuent de si estrange façon, qu'il semble impossible

qu'elles soyent parties de mesme boutique. Nous allons apres les inclinations de nostre appetit, & selon que le vent des occasions nous emporte, non selon la raison, *at nil potest esse aquabile, quod non à certa ratione profiscatur.* Aussi nos esprits & nos humeurs se meuvent avec les mouuements du temps, *tales sunt hominum mentes, quali pater ipse Iupiter audifero lustravit lampade terras.* La vie est vn mouuement inegal, irregulier, multi-forme. Enfin nous nous remuons & troublons nous mesmes par l'instabilité de nostre posture. *Nemo non quotidie consilium mutat & votum: modo uxorem vult, modo amicam; modo regnare vult, modo non est eo officiosior servus; nunc pecuniam spargit, nunc rapit; modo frugi videtur & grauis, modo prodigus & vanus: mutamus subinde personam.*

*Quod petit, spernit, repetit quod nuper omisit.
Æstuat, & vita disconuenit ordine toto.*

L'homme est l'animal de tous le plus difficile à sonder & cognoistre: car c'est le plus double & contrefait, le plus couuert & artificiel, & y a chez luy tant de cabinets & d'arriereboutiques, dont il sort tantost homme, tantost satyre; tant de souspirails, dont il souffle tantost le chaud, tantost le froid, & d'où il sort tant de fumée. Tout son branler & mouvoir n'est qu'un cours perpetuel d'ex-

reurs : le matin naistre, le soir mourir; tantost aux ceps, tantost en liberté; tantost vn Dieu, tantost vne mouche, Il rit & pleure d'une mesme chose. Il est content & mal content. Il veut, & ne sçait enfin ce qu'il veut.

CHAPITRE. VI.

IV. Misere.

VOIC le grand & principal traict de sa peinture : il est, comme a esté dit, vain, foible, fresse, inconstant au bien, à la felicité, à l'aïse, mais il est fort, robuste, constant & endurcy à la misere. C'est la misere mesmes toute vifue, c'est en un mot exprimer l'humanité : car en luy est toute misere, & hors de luy il n'y en a point au monde. C'est le propre de l'homme d'estre miserable, le seul homme, & tout homme est tousiours miserable, comme se verra. Qui voudroit représenter toutes les parties de la misere humaine, faudroit discourir toute sa vie, son estre, son entrée, sa durée, sa fin. Je n'entreprends donc pas cette besongne, ce seroit œuvre sans fin : & puis c'est vn subiect commun traité par tous, mais je veux icy coter certains points, qui ne sont pas communs, ne sont pas prins pour misere, ou bien que l'on ne

sent & l'on ne considere pas assez, combien qu'ils soyent les plus pressants, si l'on sçauoit bien juger.

Le premier chef & preuue de la misere humaine est, que sa production, son entrée est honteuse, vile, vilaine, mesprisée, sa sortie, sa mort & ruine glorieuse & honorable. Dont il semble estre vn monstre & contre nature, puis qu'il y a honte à le faire, honneur à le deffaire. *Nostri nosmet poenitet & pudet.* Sur cecy voicy cinq ou six petits mots. L'action de planter & faire l'homme est honteuse, & toutes ses parties, les approches, les apprets, les outils, & tout ce qui y sert, est tenu & appellé honteux, & n'y a rien de si honteux en la nature humaine. L'action de le perdre & tuer honorable, & ce qui y sert, est glorieux: l'on le dore & enrichit, l'on s'en pare, l'on le porte au costé, en la main, sur les espaules. L'on se desdaigne d'aller voir naistre vn homme, chacun court & s'assemble pour le voir mourir, soit au liét, soit en la place publique, soit en la campagne raze. On se cache, on tue la chandelle pour le faire, l'on le fait à la desrobée, c'est gloire & pompe de le desfaire, l'on allume les chandelles pour le voir mourir, l'on l'exécute en plain jour, l'on sonne la trompette, l'on le combat & en fait on carnage en plain midy. Il n'y a qu'une maniere de faire les

hommes , pour les desfaire & ruiner mille & mille moyens , inuentions , artifices. Il n'y a aucun loyer , honneur , ou recompense assignée pour ceux qui sçauent faire , multiplier , conseruer l'humaine nature , tous honneurs , grandeurs , richesses , dignitez , empires , triomphes , trophées sont decernez à ceux qui la sçauent affliger , troubler , destruire. Les deux premiers hommes du monde Alexandre & Cæsar ont desfaicts chacun d'eux (comme dit Plinē) plus d'un million d'hommes , & n'en ont fait , ny laissé apres eux. Et anciennement pour le seul plaisir & passe temps , aux yeux du peuple se faisoient des carnages publics d'hommes , *Homo sacra res per jocum & lusum occiditur ; satis spectaculi in homine mors est : innocentes in ludum veniunt vt publica voluptatis hostia fiant.* Il y a des nations , qui maudissent leur naissance , benissent leur mort. Quel monstrueux animal , qui se fait horreur à soy-mesme ? Or rien de tout cecy ne se trouue aux bestes , ny au monde.

Le second chef & tesmoignage de sa misere est au retrancher des plaisirs , si petits & chetifs qui luy appartiennent (car des purs , grands & entiers il n'en est capable , comme a esté dit en sa foiblesse) & au rabatre du nombre & de la douceur d'iceux quel monstre ? qui est ennemy de soy-mesme , se desrobe & se trahit soy-mesme , à qui ses plaisirs pesent , qui.

se tient au malheur. Il y en a qui éuitent la fanté, l'allegresse, la joye, comme chose mauuaise. *O miseri quorum gaudia crimen habent.* Nous ne sommes ingenieux, qu'à nous mal mener, c'est le vray gibier de la force de nostre esprit.

Il y a encore pis, l'esprit humain n'est pas seulement rabat ioye, trouble feste, ennemy de ses petits, naturels & justes plaisirs, comme je viens de dire, mais encores il est forger de maux. Il se peint & figure, craint, fuit, abhorre, comme bien grands maux, des choses qui ne sont aucunement maux en soy, & en verité, & que les bestes ne craignent point, mais qu'il s'est feint par son propre discours & imagination estre tels, comme sont n'estre aduancé en honneur, grandeur, biens. Item cocuage, sterilité d'enfans, la mort. Car à vray dire il n'y a que la douleur, qui soit mal, & qui se sente. Et ce qu'aucuns sages semblent craindre ces choses, ce n'est pas à cause d'elles, mais à cause de la douleur, qui quelquefois les accompagne de pres. Car souuent elle desuance, & est auantcoureuse de la mort, & quelquefois fuit la disette des biens, de credit & d'honneur. Mais ostez de ces choses la douleur, le reste n'est que fantaisie, qui ne loge qu'en la teste de l'homme, qui se taille de la besongne pour estre miserable, & imagine à ces fins des faux maux outre les vrais, employant & estendant la

misere , au lieu de la chastrer & racourcir ; les bestes sont exemptes de ces maux , & par ainsi nature ne les juge pas tels.

Quant à la douleur , qui est le seul vray mal , l'homme y est du tout né , & tout propre : les Mexicaines saluent les enfans sortans du ventre de leur mere en ces mots , *Enfant tu es venu au monde pour endurer , endure , souffre , & tais toy.* Que la douleur soit comme naturelle à l'homme , & au contraire l'indolence & le plaisir chose estrangere , il appert par ces trois mots. Toutes les parties de l'homme sont capables de douleur , fort peu capables de plaisir. Les parties capables de plaisir n'en peuvent recevoir , que d'une sorte ou de deux : mais toutes peuvent recevoir un tres-grand nombre de douleurs toutes differentes , chaud , froid , piqueure , froisseure , foudre , esgratigneure , escorcheure , meurtrisseure : cuisson , langueur , extension , oppression , relaxation , & infinis autres , qui n'ont point de nom propre , sans conter ceux de l'ame , tellement que l'homme est plus puissant à souffrir qu'à exprimer. L'homme ne peut gueres durer au plaisir : le plaisir du corps est feu de paille : s'il duroit , il apporteroit de l'ennuy & desplaisir : mais les douleurs durent fort long temps , & n'ont point leurs certaines saisons , comme les plaisirs. Aussi l'empire & commandement

de la douleur est bien plus grand , plus universel , plus durable , & en vn mot plus naturel , que du plaisir.

A ces trois l'on peut adjouster autres trois , douleur & desplaisir est bien plus frequent , & vient bien souuent , le plaisir est rare , le mal vient facilement de soy mesme sans estre recherché , le plaisir ne vient point volontiers , il se fait rechercher , & souuent acheter plus cher qu'il ne vaut : le plaisir n'est jamais pur , ains tousiours destrempé & meslé avec quelque aigreur , & y a tousiours quelque chose à redire : mais la douleur & le desplaisir souuent tout entier & tout pur. Apres tout cela le pire de nostre marché , & qui monstre euidentement la misere de nostre condition , est que l'extreme volupté & plaisir ne nous touche point tant , qu'une legere douleur. *Segnius homines bona , quàm mala sentiunt* , nous ne sentons point l'entiere santé comme la moindre des maladies , *pungit in cuncta vix summa violatum plagula corpus , quando valere nil quemquam movet.*

Ce n'est pas assez , que l'homme soit de fait & par nature miserable , & qu'outre les vrais & substantiels maux , il s'en feigne & s'en forge de faux & imaginez , comme dit est : Il faut encores qu'il les estende , allonge , & face durer & viure tant les vrais que les faux , plus qu'ils ne peuuent , tant il est

amoureux de misere, ce qu'il fait en diuerſes façons, premierement par memoire du paſſé, & anticipation de l'aduenir, nous ne pouuons faillir d'eſtre miſerables, puis que nos principaux biens, dont nous nous glorifions ſont inſtrumens de miſeres, memoire & providence, *futuro torquemur & præterito, multa bona noſtra nobis nocent, timoris tormentum memoria reducit, providentia anticipat, nemo præſentibus tantum miſer eſt. Eſt-ce pas grande envie d'eſtre miſerable, que de n'attendre pas le mal qu'il vienne, mais l'aller rechercher, le prouoquer à venir, comme ceux qui ſe tuent de la peur qu'ils ont de mourir, c'eſt à dire preoccuper par curioſité, ou foibleſſe & vaine apprehenſion les maux & inconueniens, & les attendre avec tant de peine, & d'alarme, ceux meſmes qui par aduanture ne nous doivent point toucher. Ces gens icy veulent eſtre miſerables avant le temps, & doublement miſerables par un real ſentiment de la miſere, & par vne longue premeditation d'icelle, qui ſouuent eſt cent fois pire que le mal meſme, *Minus afficit ſenſus fatigatio, quam cogitatio.* L'eſtre de la miſere ne dure pas aſſez, il faut que l'eſprit l'allonge, l'eſtende, & auant la main s'en entretienne. *Plus dolet quam neceſſe eſt, qui ante dolet quam neceſſe eſt.* Les beſtes ſe gardent bien de cette folie & miſere, & ont à dire grand mercy à*

nature de ce qu'elles n'ont point tant d'esprit, tant de memoire, & de providence. Cesar disoit bien que la meilleure mort estoit la moins premeditée. Et certes la preparation à la mort a donné à plusieurs plus de tourment, que la souffrance mesmes. Je n'entens icy parler de ceste premeditation vertueuse & Philosophique, qui est la trempe par laquelle l'ame est rendue invincible, & est fortifiée à l'épreuve contre tous assauts & accidens, de laquelle sera parlé : mais de ceste paoureuse, & quelquefois fausse, & vaine apprehension des maux qui peuvent aduenir, laquelle afflige, & noircit de fumée toute la beauté, & serenité de l'ame, trouble tout son repos, & sa joye, il vaudroit mieux de tout s'y laisser surprendre. Il est plus facile, & plus naturel n'y penser point du tout. Mais laissons encore ceste anticipation de mal. Tout simplement le soin & pensément penible & beant apres les choses aduenir, par esperance, desir, crainte, est vne tres-grande misere. Car outre que nous n'auons aucune puissance sur l'aduenir, moins que sur le passé (& ainsi c'est vanité comme a esté dit) il nous en demeure encores du mal & dommage, *Calamitosus est animus futuri anxius*, qui nous desrobe le sentiment, & nous oste la jouyssance paisible des biens presens, & empesche de nous y rassoir, & contenter.

Ce n'est pas encores assez, car afin qu'il ne

luy manque jamais matiere de misere , voire qu'il y en aye tousiours à faison , il va tousiours furetant , & recherchant avec grand estude les causes & alimens de misere. Il se fourre aux affaires de gayeté de cœur , & tels que quand ils s'offriroient à luy , il leur deuroit tourner le dos : ou bien par vne inquietude miserable de son esprit , ou pour faire l'habille , l'empesché , & l'entendu , c'est à dire le sot & miserable , il entreprend , & remue besongne nouvelle , ou s'entremesse de celle d'autrui. Bref il est si fort , & incessamment agité de soin & pensemens , non seulement inutiles & superflus , mais espineux , penibles & dommageables , tourmenté par le present , ennuyé du passé , angoissé pour l'aduenir , qui semble ne craindre rien plus , que de ne pouuoir pas estre assez miserable : dont l'on peut justement s'escrier , ô pauvres gents , combien endurés vous de maux volontaires , outre les necessaires que la nature vous envoie ? Mais quoy ? l'homme se plaist en la misere , il s'opiniastre à remascher , & remettre continuellement en memoire les maux passez. Il est ordinaire à se plaindre , il encherit quelquefois le mal & la douleur , pour petites & legeres choses , il se dira le plus miserable de tous , *est quadam dolendi voluptas*. Or c'est encores plus grand misere de trop ambitieusement faire valoir la misere , que ne la cognoistre &

ne sentir pas. *Homo animal querulum, cupidè suis incumbens miserius.*

Le voila donc bien miserable & naturellement & volontairement, en verité & par imagination, par obligation, & de gayeté de cœur. Il ne l'est que trop, & il craint de ne l'estre pas assez, & est toujours en queste, & en peine de s'en rendre encores d'avantage. Voyons maintenant comment, quand il vient à le sentir & s'ennuyer de quelque certaine misere (car il ne se lasse jamais de l'estre en plusieurs façons, sans le sentir) il sçait pour en sortir, quels sont ses remedes contre le mal. Certes tels qu'ils importunent plus que le mal mesmes qu'il veut guarir : de sorte que voulant sortir d'une misere, il ne la fait que changer en vne autre, & peut estre pire. Mais quoy, encores le changement le delecte, au moins le soulage, il pense guarir le mal par vn autre mal, cela vient d'une opinion qui tient le monde enchanté & miserable, qu'il n'y a rien d'utile, s'il n'est penible, rien ne vaut, s'il ne couste, l'aisance luy est suspecte. Cecy vient encores de plus haut, c'est chose estrange, mais veritable, & qui conuainc l'homme d'estre bien miserable, qu'aucun mal ne s'en va que par vn autre mal, soit au corps ou en l'ame. Les maladies spirituelles & corporelles ne sont gnaries & chassées que par tourment, douleur, peine,

les spirituelles par pœnitences , veilles , jeufnes , haires , prisons , disciplines , qui doiuent estre vrayement afflictions & poignantes , car si elles venoient à plaisir ou commodité , elles n'auroient point d'effect : les corporelles de mesmes par medecines , incisions , cauterres , diettes , comme sentent bien ceux qui sont obligez aux regles medecinales. Ils sont battus d'une part du mal , qui les poingt , & d'autre de la regle qui les ennuye.

Toutes les miseres susdites sont corporelles , ou bien mixtes & communes à l'esprit & au corps , & ne montent gueres plus haut que l'imagination & fantasie. Considerons les plus fines & spirituelles , qui sont bien plus miseres , comme estans erronnées & malignes , plus actiues & plus siennes , mais beaucoup moins senties & adouées , ce qui rend l'homme encores plus & doublement miserable , ne sentant que ses maux mediocres , & non les plus grands , voire l'on ne les luy ose dire ny toucher , tant il est confit & deploré en sa misere : Si faut-il en passant & tout doucement en dire quelque chose , au moins les guiner & monstrier au doigt de loin , afin de lui donner occasion d'y regarder & penser , puis que de soy-mesme il ne s'en advise pas. Premièrement pour le regard de l'entendement , est-ce pas vne estrange & piteuse misere del'humaine nature , qu'elle soit toute consistente en erreur & aveuglement : la plus part des
opinions

opinions communes & vulgaires , voire les plus plausibles & receuës avec reuerence sont fausses & erronées , & qui pis est la plupart incommodes à la société humaine. Et encores que quelques sages , qui sont en fort petit nombre , sentent mieux que le commun , & jugent de ces opinions comme il faut , si est-ce que quelquefois ils s'y laissent emporter , sinon en toutes & tousiours , mais à quelques vns & quelquesfols : il faut estre bien ferme & constant pour ne se laisser emporter au courant , bien sain & préparé pour se garder net d'une contagion si vniuerselle : les opinions generales receuës avec applaudissement de tous & sans contradiction sont comme vn torrent , qui emporte tout , *proh superi quantum mortalia pectora cæca nobis habent ? & miseris hominum mentes & pectora cæca , qualibus in tenebris vita quantisque periculis degitur hoc avi quodcunque est ?* Or ce seroit chose bien longue de specifier & nommer les foles opinions , dont tout le monde est abreuvé. Mais en voici quelques vnes , qui seront traitées plus au long en leurs lieux.

1. Juger des advis & conseils par les euene-
mens , qui ne sont aucunement en nostre main ,
& qui despendent du ciel.

2. Condamner & rejeter toutes choses ,
mœurs , opinions , loix , coustumes , obser-
uances , comme barbares & mauuaises , sans sca-
voir que c'est & les cognoistre , mais seulement

parce qu'elles nous sont inusitées, & eslongnées de nostre commun & ordinaire.

3. Estimer & recommander les choses à cause de leur nouuelleté ou rareté, ou estrangeté, ou difficulté, quatreengeoleurs, qui ont grand credit aux esprits populaires : & souuent telles choses sont vaines, & non à estimer, si la bonté & vtilité n'y sont ioinctes, dont iustement fut mesprisé du prince, celuy qui se glorifioit de sçauoir de loin jetter & passer les grains de mil par mil le trou d'esguille.

4. Generalement toutes les opinions superstitieuses, dont sont affeublez les enfans, femmes, & esprits foibles.

5. Estimer les personnes par les biens, richesses, dignitez, honneurs, & mepriser ceux qui n'en ont point, comme si l'on ieueoit d'un cheval par la bride & la selle.

6. Estimer les choses non selon leur vraye, naturelle & essentielle valeur, qui est souuent interne & secrette, mais selon la monstre & la parade, ou le bruiet commun.

7. Penser bien se venger de son ennemy en le tuant : car c'est le mettre à l'abry & au couuert de tout mal, & s'y mettre soy : c'est lui oster tout le ressentiment de la vengeance, qui est toutesfois son principal effect, cecy appartient aussi à la foiblesse.

8. Tenir à grand injure & desestimer conime miserable vn homme, pour estre coqu : car

quelle plus grande folie en iugement , que d'estimer moins vne personne , pour le vice d'autrui , qu'il n'approuue pas ? Autant ce semble en peut on dire d'un bastard.

9. Estimer moins les choses presentes , ou qui sont nostres , & desquelles nous jouissons paisiblement , mais les estimer quand on ne les a point , ou pource qu'elles sont à autrui , comme si la presence & le posseder raualoit de leur valeur , & le non auoir leur accroissoit. *Virtutem incolumem odimus , sublatam ex oculis quarimus inuidi.* C'est pourquoy nul Prophete en son pays. Aussi la maistrise & l'autorité engendre mespris de ce qu'on tient & regente , les maris regardent desdaigneusement leurs femmes , & plusieurs peres leurs enfans : veux-tu , dit le bon compagnon , ne l'aymer plus , espouse la. Nous estimons plus le cheval , la maison , le valet d'autrui pource qu'il est à autrui , & non à nous. C'est chose bien estrange d'estimer plus les choses en l'imagination qu'en la realité , comme on fait toutes choses absentes & estrangeres , soit avant les auoir , ou après les auoir eues. La cause de ce en tous les deux cas , se peut dire qu'auant les auoir l'on les estime non selon ce qu'elles valent , mais selon ce que l'on s'est imaginé qu'elles sont , ou qu'elles ont esté vantées par autrui : Et les possédant l'on ne les estime que selon le bien & le profit que l'on entire. Et apres qu'elles

nous sont ostées l'on les considere & regrette toutes entieres & en blot , ou auparavant l'on n'en jouyffoit & vsoit on que par le menu , & par pieces succeffiuellement : car l'on pense qu'il y aura tousiours du temps assez pour en iouyr : & à peine s'apperçoit-on de les auoir & tenir. Voila pourquoy le deuil est plus gros & le regret de ne les auoir , que le plaisir de les tenir : mais en cecy il y a bien autant de foiblesse , que de misere. Nous n'auons la suffisance de iouyr ; mais seulement de desirer. Il y a vn autre vice tout contraire , qui est de s'arrester & agréer tellement à soy mesmes & à ce qu'on tient , que de le preferer à tout le reste , & ne penser rien meilleur. Si ceux-cy ne sont plus sages que les autres , au moins sont-ils plus heureux.

10. Faire le zelé à tout propos , mordre à tout , prendre à cœur , & se monstérer outré & opiniastre en toutes choses , pourveu qu'il y aye quelque beau & specieux pretexte de justice , religion , bien public , amour du peuple.

11. Faire l'attristé , l'affligé , & pleureur en la mort ou accident d'autrui , & penser que ne s'esmouuoir point ou que bien peu c'est faute d'amour & d'affection ; il y a aussi de la vanité.

12. Estimer & faire conte des actions , qui se font avec bruit , remuement , esclat , de festimer celles qui se font autrement , & penser que ceux qui procedent de ceste façon sombre ,

douce & morne , ne font rien , font comme sommeillans & sans action , bref estimer plus l'art que la nature. Ce qui est enflé , bouffy & releué par estude , qui esclate , bruit & frappe le sens (c'est tout artifice) est plus regardé & estimé que ce qui est doux , simple, vny , ordinaire , c'est à dire naturel , celuy là nous esueille , cestuy cy nous endort.

13. Apporter de mauuaises & sinistres interpretations aux belles actions d'autrui , & les attribuer à des viles & vaines ou vicieuses causes ou occasions , comme ceux qui rapportent la mort du ieune Caton à la crainte qu'il auoit de Cæsar , dont se pique Plutarque , les autres encores plus sottement à l'ambition. C'est vne grande maladie de iugement , qui vient ou de malice & corruption de volonté & de mœurs , ou d'ennuie contre ceux , qui valent mieux qu'eux ou de ce vice de ramener sa creance à sa portée & mesurer autrui à son pied , ou bien plustost que tout cela , à foiblesse pour n'auoir pas la veüe assez forte & asseurée à conceuoir la splendeur de la vertu en sa pureté nayfue. Il y en a qui font les ingenieux & subtils à deprauer ainsi & obscurcir la gloire des belles actions , en quoy ils monstrent beaucoup plus de mauuais naturel , que de suffisance , c'est chose aysee mais fort vilaine.

14. Voicy encores apres , tout vn vray

tesmoignage de la misere spirituelle, mais qui est fin & subtil, c'est que l'esprit humain en son bon sens, paisible, raffiné, & sain estat, n'est capable que de choses communes, ordinaires, naturelles, mediocres. Pour estre capable des diuines, surnaturelles, comme de la diuination, prophetie, reuelation, inuention, & comme l'on dit, entrer au cabinet des Dieux, faut qu'il soit malade, disloqué, déplacé de son assiette naturelle, & comme corrompu, *corruptus*, ou par extrauagance, extaze, enthousiasme, ou par assoupissement : d'autant que, comme l'on sçait, les deux voyes naturelles d'y paruenir sont la fureur & le sommeil. Et ainsi l'esprit n'est jamais si sage que quand il est fol, ny plus veillant que quand il dort : Iamais ne rencontre mieux, que quand il va de costé & de trauers : ne va, ne vole & ne voit si haut, que quand il est abbatu, & au plus bas. Et ainsi faut qu'il soit miserable, comme perdu & hors de soy, pour estre heureux.

15. Finalement y pourroit-il auoir plus grande faute en iugement, que n'estimer point le iugement, ne l'exercer, releuer, & luy preferer la memoire & l'imagination ou fantaisie ? Voyons ces grandes, doctes, & belles harangues, discours, leçons, sermons, liures, que l'on estime & admire tant, produictes par les plus grands hommes de ce siecle (i'en

excepte quelques vns & peu) qu'est ce tout cela, qu'un entassement & enfileure d'allegations, un recueil & ramas du bien d'autrui (œuvre de memoire, & diuerse leçon, & chose tres-aisée, car cela se trouue tout trié & arrangé: tant de liures sont faits de cela) avec quelques pointes & un bel agencement (œuvre de l'imagination) & voila tout? Ce n'est souuent que vanité, & n'y reluiſt aucun trait de grand iugement, ny d'inſigne vertu: Auffi ſouuent ſont les auteurs d'un iugement foible & populaire, & corrompu en la volonté. Combien eſt-il plus beau d'ouyr un payſant, un marchand, parlant en ſon patois, & diſant de belles propositions & veritez, toutes ſeiches & cruës, ſans art ny façon, & donnant des aduis bons & vtiles, produits d'un ſain, fort & ſolide iugement.

En la volonté y a bien autant ou plus de miſeres, & encores plus miſerables, elles ſont hors nombre: en voicy quelques vnes.

1. Vouloir pluſtoſt apparoir homme de bien, que de l'eſtre, l'eſtre pluſtoſt à autrui qu'à ſoy.

2. Eſtre beaucoup plus prompt & volontaire à la vengeance de l'offenſe, qu'à la recognoiſſance du bien fait, tellement que c'eſt couruée & regret que recognoiſtre, plaisir & gain de ſe venger, preuue de nature maligne: *gratia oneri eſt, ultio in quaſtu habetur.*

3. Estre plus aspre à hayr qu'à aymer, à mesdire qu'à louer, se paistre & mordre plus volontiers & avec plus de plaisir au mal qu'au bien d'autrui, le faire plus valoir, s'estendre plus à en discourir, y exercer son stile, tesmoins tous les Escriptuains, Orateurs & Poëtes, qui sont lasches à reciter le bien, eloquents au mal. Les mots, les inuentions, les figures, pour mesdire, sont bien autres, plus riches, plus emphatiques, & significatifs, qu'au bien dire & louer.

4. Fuir à mal faire & entendre au bien, non par le bon ressort purement, par la raison naturelle, & pour l'amour de la vertu, mais par quelque autre consideration estrangere, quelquefois lasche & fardide de gain & profit, de vaine gloire, d'esperance, de crainte, de coustume, de compagnée, bref non pour soy & son devoir simplement, mais pour quelque occasion, & circonstance externe. Tous sont gens de bien par occasion & par accident. Voila pourquoy ils le sont inegalement, diuersement, non perpetuellement, constamment, uniformement.

5. Aymer moins celuy que nous auons offensé, à cause que nous l'auons offensé, chose estrange, ce n'est pas tousiours de crainte qu'il en vueille prendre sa reuanche, car peust-estre l'offensé ne nous en veut pas moins de bien, mais c'est de ce que sa presence nous accuse &

nous ramentoit nostre faute & indiscretion. Que si l'offensant n'ayme pas moins, c'est preuue qu'il ne l'a pas voulu offenser : car ordinairement qui a eu la volonté d'offenser, aime moins apres l'offense, *Chi offende, may non pardonna.*

6. Prendre plaisir au mal, à la peine, & au danger d'autrui, desplaisir en son bien, aduancement, prosperité (i'entens que soit sans aucune cause ou esmotion certaine & particuliere de hayne, c'est autre chose, prouenant du vice singulier de la personne) ie parle icy de la condition commune & naturelle, par laquelle sans aucune particuliere malice, les moins mauuais prennent plaisir à voir des gens courir fortune sur mer, se faschent d'estre precedez de leurs compagnons, que la fortune dise mieux à autrui qu'à eux, rient quand quelque petit mal arriue à vn autre, cela tesmoigne vne semence malicieuse en nous.

Enfin pour monstrier combien grande est nostre misere, ie diray que le monde est remply de trois sortes de gens, qui y tiennent grande place en nombre & reputation, les superstitieux, les formalistes, les pedans, qui bien qu'ils soyent en diuers subjects, ressorts, & theatres (les trois principaux, religion, vie ou conuersation, & doctrine) si sont-ils battus à mesme coin, esprits foibles, mal nez, ou tres-mal instruits, gens tres-

dangereux en iugement , touchez de maladie presque incurable. C'est peine perduë de parler à ces gens là pour les faire r'aduifer , car ils s'estiment les meilleurs & plus sages du monde , l'opiniaftreté est là en son siege. Qui est vne fois feru & touché au vif de ces maux là , i' y a peu d'esperance de sa conualefcence. Qu'y a-il de plus inepte & ensemble de plus testu , que ces gens là ? Deux choses les empeschent , comme a esté dit , foiblesse & incapacité naturelle , & puis l'opinion anticipée de faire bien & mieux que les autres.

Les superstitieux , iniurieux à Dieu , & ennemis de la vraye religion , se couurent de pieté , zele , & affection enuers Dieu , iusques à s'y peiner & tourmenter plus que l'on ne leur commande , pensant meriter beaucoup , & que Dieu leur en sçait gré , voire leur doit de reste , que feriez vous à cela ? Si vous leur dites qu'ils excedent & prennent les choses à gauche , pour ne les entendre pas bien , ils n'en croiront rien , disant que leur intention est bonne (par où ils se pensent sauuer) & que c'est par deuotion. D'ailleurs ils ne veulent pas quitter leur gain , ny la satisfaction qu'ils en reçoient , qui est d'obliger Dieu à eux.

Les formalistes s'attachent tout aux formes & au dehors , pensent estre quittes & irre-

prehensibles en la poursuite de leurs passions & cupiditez, moyennant qu'ils ne fassent rien contre la teneur des loix, & n'obmettent rien des formalitez. Voila vn richard, qui a ruiné & mis au desespoir des pauvres familles, mais ça esté en demandant ce qu'il a pensé estre sien, & ce par voye de iustice; qui le peut conuaincre d'avoir mal fait? O combien de bienfaits sont obmis, & de meschancetez se commettent sous le couvert des formes, lesquelles l'on ne sent pas. Dont est bien verifié: le souverain droict, l'extreme iniustice; & a esté bien dit, Dieu nous garde des formalistes.

Les pedans clabaudes apres avoir questé & pilloté avec grand estude & peine la science par les liures, en font monstre, & avec ostentation, questueusement & mercenairement la desgorgent & mettent au vent. Y a-il gens au monde plus ineptes aux affaires, plus impertinens à toutes choses, & ensemble plus presomptueux & opiniaîtres? En toute langue & nation, pedant, clerc, magister, sont mots de reproche; faire sottement quelque chose c'est le faire en clerc: ce sont gens qui ont la memoire pleine du sçavoir d'autrui, & n'ont rien de propre. Leur jugement, volonté, conscience n'en valent rien mieux, mal habiles, peu sages, & prudents, tellement qu'il semble que la

science ne leur serue que de les rendre plus fots, mais encore plus arrogants, caqueteurs : rauallent leur esprit & abastardissent leur entendement, mais enflent leur memoire. Icy sied bien la misere que nous venons de mettre la derniere en celles de l'entendement.

CHAPITRE IV.

V. Presomption.

VOicy le dernier & plus vilain traict de sa peinture, c'est l'autre partie de la description que donne Plin, c'est la peste de l'homme, & la mere nourrice des plus fausses opinions & publiques & particulieres, vice toutesfois naturel & originel de l'homme. Or ceste presumption se doit considerer en tout sens, haut, bas, & à cost, dedans & dehors, pour le regard de Dieu, choses hautes & celestes, basses, des bestes, de l'homme son compaignon, de soy-mesme, & tout reuient à deux choses, s'estimer trop, & n'estimer pas assez autrui : *qui in se confidebant, & aspernabantur alios*. Parlons un peu de chacun.

Premierement pour le regard de Dieu (& c'est chose horrible) Toute superstition &

faute en religion , ou faux service de Dieu , vient de n'estimer pas assez Dieu , ne sentir pas , & n'auoir pas les opinions , conceptions , & creances de la Diuinité assez hautes , assez pures. Je n'entends pas cet assez , à proportion de la grandeur de Dieu , qui ne reçoit point de proportion , estant infinie. Et ainsi est il impossible de les auoir assez pour ce regard : mais j'entends assez pour le regard de ce que pouuons & deuons. Nous n'esleuons ny ne guidons pas assez haut & ne roidissons assez la poincte de nostre esprit , quand nous imaginons la diuinité , comment assez ? nous la concepuons tres-basement. Nous la seruons de mesmes tres-indignement , nous agissons avec elle plus vilement , qu'avec certaines creatures. Nous parlons non seulement de ses œuvres , mais de sa majesté , volonté , jugemens avec plus de confiance , & de hardiesse , que l'on ne feroit d'un prince , ou autre homme d'honneur. Il y a plusieurs hommes , qui refuseroient un tel service & recognoissance & se tiendroient offensez & violez , si l'on parloit d'eux , & que l'on employast leur nom si vilement & fordidement , l'on entreprend de le mener , flatter , ployer , composer avec luy , afin que je ne dise , brauer , menacer , gronder , & despiter. Cæsar disoit à son Pilote qu'il ne craignist de voguer & le conduire contre le

destin & la volonté du ciel & des astres , se fiant sur ce que c'est Cæsar qu'il meine. Auguste ayant esté battu de la tempeste sur mer , se prit à deffier le Dieu Neptune , & en la pompe des jeux Circenses fit oster son image du rang , où elle estoit parmi les autres Dieux , pour se venger de luy. Les Thraces quand il tonne & esclaire se mettent à tirer fleches contre le ciel , pour ranger Dieu à raison : Xerxes fouetta la mer & escriuit vn cartel de deffy au mont Athos. Et compte l'on d'un Roy Chrestien voisin du nostre , qu'ayant receu une bastonnade de Dieu , jura de s'en venger , & voulust que de dix ans on ne le priaist & ne parlaist on de luy.

Audax Iapeti genus.

Nil mortalibus arduum.

Cælum ipsum petimus stultitia , neque

Per nostrum patimur scetus

Iracunda lovem ponere fulmina.

Et laissant ces extrauagances estranges , tout le commun ne verifie-il pas bien clairement le dire de Plinè , qu'il n'y a rien plus miserable , & ensemble plus glorieux que l'homme ? Car d'une part il se feint de tres-hautes & riches opinions de l'amour , soin & affection de Dieu enuers luy , comme son mignon , son vnique , & cependant il le sert tres-indignement : comment se peuuent accorder &

subſiſter enſemble vne vie & un ſervice ſi chetif & miſerable d'une part, & vne opinion & creance ſi glorieuſe & ſi hautaine de l'autre ? C'eſt eſtre Ange & porceau tout enſemble, c'eſt ce que reprochoit un grand Philoſophe aux Chreſtiens, qu'il n'y auoit gens plus fiers & glorieux à les ouyr parler, & en eſſect plus laſches & vilains.

Il nous ſemble auſſi que nous peſons & importons fort à Dieu, au monde, à toute la nature, qu'ils ſe peinent & ahannent en nos affaires, ne veillent que pour nous, dont nous nous eſbahifſons des accidens qui nous arriuent, & cecy ſe voit encore mieux à la mort. Peu de gens ſe reſoluent & croient que ce ſoit leur derniere heure, & preſque tous ſe laiſſent lors piper à l'eſperance. Cela vient de preſomption, nous faiſons trop de cas de nous, & nous ſemble que l'vnivers a grand intereſt à noſtre mort, que les choſes nous faillent à meſure que nous leur faillons, ou qu'elles meſmes ſe faillent à meſure qu'elles nous faillent, qu'elles vont meſme branſle avec nous, comme à ceux qui vont ſur l'eau, que le ciel, la terre, les villes ſe remuent, nous penſons tout entrainer avec nous : nul de nous ne penſe aſſez n'eſtre qu'un.

Après cela l'homme croit, que le ciel, les eſtoiles, tout ce grand mouuement celeſte, & branſle du monde n'eſt fait que pour luy.

Tot circa vnum caput tumultuantes deos. Et le pauvre miserable est bien ridicule. Il est icy bas logé au dernier & pire estage de ce monde, plus esloigné de la voulte celeste, en la cloaque & fenteine de l'vniuers, auec la bourbe & la lie, auec les animaux de la pire condition, subject à receuoir tous les excremens & ordures qui luy pleuuent & tombent d'enhaut sur la teste, & ne vit que de cela, & à souffrir les accidents, qui luy arriuent de toutes parts, & se faict croire qu'il est le maistre commandant à tout, que toutes creatures, mesmes ces grands corps lumineux, incorruptibles, desquels il ne peut sçauoir la moindre vertu, & est contraint tout transi les admirer, ne branlent que pour luy, & son seruice. Et pource qu'il mendie, chetif qu'il est, son viure, son entretien, ses commoditez, des rayons, clarté, & chaleur du soleil, de la pluye, & autres desgouts du ciel & de l'air, il veut dire, qu'il jouyt du ciel & des elemens, comme si tout n'auoit esté fait, & ne se remuoit que pour luy. En ce sens l'oyson en pourroit dire autant, & peut estre plus justement & constamment. Car l'homme qui reçoit aussi souuent des incommoditez de là haut, & n'a rien de tout cela en sa puissance ny en son intelligence, & ne les peut deuiner, est en perpetuelle transse, siebure & crainte, que ces corps superieurs ne branlent pas bien à

propos, & à point nommé pour luy, & qu'ils luy causent sterilité, maladies, & toutes choses contraires, tremble sous le fais : où les bestes reçoivent tout ce qui vient d'enhaut, sans alarme, ny apprehension de ce qui aduendra, & sans plainte de ce qui est aduenü, comme fait incessamment l'homme, *non nos causa mundo sumus hyemem æstatemque referendi, suas ista leges habent quibus diuina exercentur : nimis nos suspicimus si digni nobis videmur, propter quos tanta moueantur, non tanta cælo nobiscum societas est, ut nostro fato sit ille quoque syderum fulgor.*

Pour le regard des choses basses, terrestres, sçauoir tous animaux, il les desdaigne & destime comme si du tout elles n'appartenoient au mesme maistre ouurier, & n'estoient de mesme mere & de mesme famille avec luy, comme si elles ne le touchoient & n'auoient aucune part ou relation à luy. Et de là il vient à en abuser, & exercer cruauté, chose qui rejalit contre le maistre commun & vniuersel, qui les a faictes, qui en a soin & a dressé des loix, pour leur bien & conseruation, les a aduantagées en certaines choses, renuoye l'homme souuent vers elles, comme à vñe eschole : mais cecy est le subiect du chapitre suyuant.

Finalement, mais principalement cette presumption doit estre considérée en l'homme

mesmes, c'est à dire pour le regard de foy & de l'homme son compagnon, au dedans, au progrès de son jugement, & de ses opinions : & au dehors en communication & conuersation avec autrui. Sur quoy nous considererons trois choses, comme trois chefs, qui s'entresuiuent, où l'humanité monstre bien en sa sorte foiblesse, sa folle presumption : La premiere au croire ou mescroire, où sont à noter deux vices contraires, qui sont ordinaires en la condition humaine ; l'un & plus commun est vne legereté, qui citò credit, levis est corde, & trop grande facilité à croire & receuoir tout ce que l'on propose, avec quelque apparence, ou autorité. Cecy appartient à la niaise simplicité, mollesse, & foiblesse du petit peuple, des esprits effeminez, malades, superstitieux, estonnez, indiscrettement zelez, qui comme la cire reçoient facilement toute impression, se laissent prendre & mener par les oreilles. Suivant cecy nous voyons presque tout le monde mené & emporté aux opinions & creances, non par choix & jugement, voire souuent avant l'age & discretion, mais par la coustume du pays, ou instruction receuë en jeunesse, ou par rencontre, comme par vne tempeste ; & là se trouue tellement collé, hypothequé & afferuy qu'il ne s'en peut plus desprendre. *Veluti tempestate delati ad quam-*

cunque disciplinam, tanquam ad saxum adhærescunt.
Le monde est ainsi mené , nous nous en fions
& remettons à autrui , *vnusquisque mauult
credere quam judicare, versat nos & præcipitat
traditus per manus error, ipsa consuetudo assen-
tiendi periculosa & lubrica.* Or cette telle facilité
populaire, bien que ce soit en vérité foiblesse,
toutesfois n'est pas sans quelque presumption.
Car c'est trop entreprendre que croire adherer,
& tenir pour vray & certain si legerement ,
sans sçauoir que c'est , ou bien s'enquerir
des causes , raisons , consequences , & non
de la verité. On dit d'où vient cela ? comment
se fait cela ? presupposant que cela est bien
vray , il n'en est rien : on traite , agite
les fondements & effets de mille choses ,
qui ne furent jamais , dont tout le *pro &
contra* est faux. Combien de bourdes , faux
& supposez miracles , visions & reuelations
receuës au monde , qui ne furent jamais ? Et
pourquoy croira l'on vne merueille , vne
chose non humaine ny naturelle , quand l'on
peut detourner & elider la verification par
voye naturelle & humaine ? La verité & le
mensonge ont leurs visages conformes , le
port , le goust & les alleures pareilles : nous
les regardons de mesme œil , *ita sunt finitima
falsa veris ; vt in præcipitem locum non debeat
se sapiens committere.* L'on ne doit croire
d'un homme , que ce qui est humain , s'il

n'est autorisé par approbation surnaturelle, & surhumaine, qui est Dieu seul, qui seul est à croire en ce qu'il dict, pource qu'il le dict.

L'autre vice contraire est vne forte & audacieuse temerité de condamner & reietter comme fausses, toutes choses, que l'on n'entend pas, & qui ne plaisent, & ne reuiennent au goust. C'est le propre de ceux qui ont bonne opinion d'eux mesmes, qui sont les habiles & les entendus, spécialement heretiques, sophistes, pedans : car se sentans auoir quelque poincte d'esprit, & de voir vn peu plus clair que le commun, ils se donnent loy & autorité de decider & resoudre de toutes choses. Ce vice est beaucoup plus grand & vilain que le premier, car c'est folie enragée de penser sçauoir jusques où va la possibilité, les ressorts & bornes de nature, la portée de la puissance & volonté de Dieu, & vouloir ranger à soy & à sa suffisance le vray & le faux des choses, ce qui est requis pour ainsi & avec telle fierté & assurance resoudre & definir d'icelles. Car voicy leur jargon, cela est faux, impossible, absurde. Et combien y a il de choses, lesquelles pour vn temps nous auons reiettees avec risée, comme impossibles, que nous auons esté contraincts d'aduouer apres, & encores passer outre à d'autres plus estranges, & au rebours

combien d'autres nous ont esté comme articles de foy , & puis vaines menfonges.

La seconde , qui suit & vient ordinairement de ceste premiere , est d'affermir ou reprouver certainement & opiniaftrement ce que l'on a légèrement creu ou mescreu. Ce second degré adjouste au premier opiniaftreté , & ainsi accroist la presomption. Ceste facilité de croire avec le temps s'endurcit & degenerate en opiniaftreté inuincible & incapable d'amendement , voire l'on va jusques là , que souuent l'on soustient plus les choses que l'on sçait & que l'on entend moins , *majorem fidem homines adhibent iis , quæ non intelligunt : cupiditate humani ingenii lubentius obscura creduntur* , l'on parle de toutes choses par resolution. Or l'affirmation & opiniaftreté sont signes ordinaires de bestise & ignorance , accompagnée de folie & arrogance.

La troisieme , qui suit ces deux , & qui est la feste de presomption , est de persuader , faire valoir , & receuoir à autrui ce que l'on croit , & les induire voire imperieusement avec obligation de croire , & inhibition d'en douter. Quelle tyrannie ? Quiconque croit quelque chose , estime que c'est œuvre de charité de le persuader à vn autre : & pource faire ne craint point d'adjouster de son inuention autant qu'il voit estre necessaire à son compte , & pour supplir au deffaut & à la

résistance , qu'il pense estre en la conception d'autrui. Il n'est rien à quoy communement les hommes soient plus tendres qu'à donner voye à leurs opinions : *nemo sibi tantum errat, sed aliis erroris causa & author est.* Où le moyen ordinaire faut , l'on y ajoute le commandement , la force , le fer , le feu. Ce vice est propre aux dogmatistes , & à ceux qui veulent gouverner & donner loi au monde. Or pour venir à bout de cecy & captiver les creances à soy ils usent de deux moyens : par le premier ils introduisent des propositions generales & fondamentales , qu'ils appellent principes & presuppositions , desquelles ils enseignent n'estre permis de douter ou disputer : sur lesquelles ils bastissent apres tout ce qui leur plaist , & meinent le monde à leur poste : qui est vne piperie , par laquelle le monde se remplit d'erreurs & de mensonges. Et de fait si l'on vient à examiner ces principes , l'on y trouuera de la fausseté & de la foiblesse autant ou plus qu'en tout ce qu'ils veulent tirer & desprendre , & se trouuera tousiours autant d'apparence aux propositions contraires.

Il y en a de nostre temps qui ont changé & renuersé les principes , & reigles des Anciens en l'astrologie , en la medecine , en la geometrie , en la nature & mouuement des vents. Toute proposition humaine a autant d'autorité , que l'autre , si la raison n'en fait la

difference. La verité ne dépend point de l'autorité ou tesmoignage d'homme : Il n'y a point de principes aux hommes, si la diuinité ne leur a reuelé : tout le reste n'est que songe & fumée. Or ces messieurs icy veulent que l'on croye, & reçoive ce qu'ils disent, & que l'on s'en fie à eux, sans juger ou examiner ce qu'ils baillent, qui est vne justice tyrannique. Dieu seul, comme a esté dit, est à croire en tout ce qu'il dit, pource qu'il le dit, *qui à semet ipso loquitur mendax est.* L'autre moyen est par supposition de quelque faict miraculeux, reuelation & apparition nouvelle & celeste, qui a esté dextrement practiqué par des legislateurs, generaux d'armées, ou chefs de parti. La persuation premiere prinse du subject mesmes saisit les simples, mais elle est si tendre & si fressle, que le moindre heurt, mesconte, ou mesgarde, qui y suruiendroit, escarbouilleroit tout : Car c'est grand merueille, comment de si vains commencements & frivoles causes sont sorties les plus fameuses impressions. Or ceste premiere impression franchie deuiant apres à s'enfler & grossir merueilleusement, tellement qu'elle vient à s'estendre mesmes aux habiles, par la multitude des croyans, des tesmoins, & des ans, à quoy l'on se laisse emporter, si l'on n'est bien fort préparé : Car lors il n'est plus besoin de regimber & s'en enquerir, mais simplement croire : Lz

plus grand & puissant moyen de persuader, & la meilleure touche de verité, c'est la multitude des ans & des croyans : Or les fols surpassent de tant les sages, *sanitatis patrociniū est insipientium turba*. C'est chose difficile de refoudre son jugement contre les opinions communes. Tout cè dessus se peut cognoistre par tant d'impostures, badinages, que nous avons veu naistre comme miracles, & raulr tout le monde en admiration, mais incontinent estouffez par quelque accident, ou par l'exacte recherche des clair-voyans, qui ont esclairé de pres & descouvert la fourbe : que s'ils eussent eu encores du temps pour se meurir & se fortifier en nature, c'estoit fait pour jamais. Ils eussent esté receus & adorez generalement. Ainsi en est-il de tant d'autres, qui ont (faveur de fortune) passé & gagné la creance publique, à laquelle puis on s'accommode sans aller recognoistre la chose au giste, & en son origine, *nusquam ad liquidum fama perducitur*. Tant de sortes de religions au monde, tant de façons superstitieuses, qui sont encores mesme dedans la Chrestienté, demeurées du paganisme, & dont on n'a pu du tout seurer les peuples. Par tout ce discours nous voyons à quoi nous en sommes, puisque nous sommes menez par tels guides.

CHAPITRE VIII.

Seconde consideration de l'homme , qui est par comparaison de luy avec tous les autres animaux.

Nous auons considéré l'homme tout entier , & simplement en soy , maintenant considerons le par comparaison avec les autres animaux , qui est vn tres-beau moyen de le cognoistre : Ceste comparaison est de grande estendue , a force pieces , de grande science & importance , très-utile , si elle est bien faite ; mais qui-la fera ? l'homme ? Il est partie , & suspect , & de faict il n'y procede pas de bonne foy. Cela se monstre bien en ce qu'il ne tient point de mesure & de mediocrité : tantost il se met beaucoup au dessus de tout , & s'en dit maistre , desdaigne le reste : il leur taille les morceaux , & leur distribue telle portion de facultés & de forces que bon luy semble. Tantost comme par despit il se met beaucoup au dessous , il gronde , se plaint , iniurie nature comme cruelle maaistre , se faict le rebut & le plus miserable du monde. Or tous les deux sont egaleement contre raison , vérité , modestie. Mais comment voulés vous , qu'il chemine droictement & également avec les autres animaux , qu'il ne le faict pas avec l'homme son compagnon , ny avec Dieu , comme nous venons de dire. Elle est

Tome I.

D

aussi fort difficile à faire , car comment peut l'homme cognoistre les branles internes & secrets des animaux , ce qui se remue au dedans d'eux ? Or estudions à la faire sans passion.

Premierement la police du monde n'est point si fort inegale , si difforme & desreiglée , & n'y a point si grande disproportion entre les pieces : celles qui s'approchent & se touchent , se ressemblent peu plus , peu moins. Ainsi y a-il un grand voisinage & cousinage entre l'homme & les autres animaux. Ils ont plusieurs choses pareilles & communes : & ont aussi des differences , mais non pas si fort esloignées & dispareilles , qu'elles ne se tiennent : l'homme n'est du tout au dessus , ny du tout au dessous : tout ce qui est sous le Ciel , dit la sagesse de Dieu , court mesme fortune.

Parlons premierement des choses qui leur sont communes , & peu pres pareilles , qui sont : engendrer , nourrir , agir , mouvoir , viure , mourir , *idem interitus hominis & jumentorum , & aqua utriusque conditio*. Et ce sera contre ceux qui se plaignent disans que l'homme est le seul animal disgracié de nature , abandonné , nud sur la terre nue , sans couvert , sans armes , lié , garrotté , sans instruction de ce qui luy est propre , là où tous les autres sont reuestus de coquilles , gousies , escosses , poils , laine , bourre , plumes , escaille , armés de grosses

dents , cornes , griffes pour affaillir & defendre ; instruites à nager , courir , voler , chanter , chercher sa pasture ; & l'homme ne sçait cheminer , parler , manger , ny rien que pleurer sans apprentissage & peine. Toutes ces plainctes , qui regardent la composition premiere & condition naturelle , sont injustes & fausses : nostre peau est aussi suffisamment pourueüe contre les iniures du temps , que la leur , tesmoins plusieurs nations (comme se dira cy apres) qui n'ont encores sçeu , que c'est que vestemens : & nous tenons aussi descouvertes les parties qu'il nous plaist , voire les plus tendres & sensibles , la face , la main , l'estomach ; les dames mesmes delicates , la poitrine. Les liaisons & emmaillotemens ne sont point necessaires , tesmoins les Lacedemoniens & maintenant les Suyffes , Allemans , qui habitent les pays froids , les Basques & les Vagabonds qui se disent Ægyptiens. Le pleurer est aussi commun aux bestes : la plus part des animaux se plaint , gemit quelque temps apres leur naissance. Quant aux armes , nous en auons de naturelles , & plus de mouuemens des membres , & en tirons plus de seruice naturellement & sans leçon. Si quelques bestes nous surpassent en cet endroit , nous en surpassons plusieurs autres. L'usage du manger est aussi en eux & en nous tout naturel.

& sans instruction. Qui doute qu'un enfant arriué à la force de se nourrir, ne sceust qu'ester sa nourriture ? Et la terre en produict & luy en offre assés pour sa necessité, sans autre culture & artifice, tesmoin tant de nations, qui sans labourage, industrie, & soin aucun vivent plantureusement. Quant au parler, l'on peut bien dire, que s'il n'est point naturel, il n'est point necessaire : mais il est commun à l'homme avec tous animaux. Qu'est-ce autre chose que parler, ceste faculté que nous leur voyons de se plaindre, se resjouyr, s'entre'appeller au secours, se conuier à l'amour. Et comme nous parlons par gestes & mouuemens des yeux, de la teste, des mains, des espaules (en quoy se font scavants les muets) aussi font les bestes, comme nous voyons en celles qui n'ont pas de voix, lesquelles toutesfois s'entrefont des offices mutuels : & comme à certaine mesure les bestes nous entendent, aussi nous les entendons. Elles nous flattent, nous menacent, nous requierent, & nous elles. Nous parlons à elles & elles à nous, & nous ne nous entr'entendons parfaitement, à qui tient-il ? à elles ou à nous ? c'est à deuiner. Elles nous peuuent bien estimer bestes par ceste raison, comme nous elles ; mais encore nous reprochent elles, que nous ne nous entr'entendons pas nous mesmes. Nous n'entendons pas les Basques, les Bretons,

& elles s'entr'entendent bien toutes , non seulement de mesme espece , mais qui plus est , de diuerse : en certain abbayer du chien , le cheval cognoist qu'il y a de la cholere , & en autre voix il cognoist qu'il n'y en a point. Au reste elles entrent en intelligence avec nous. En la guerre , aux combats , les elephans , les chiens , les cheuaux s'entendent avec nous , font leurs mouuemens accordans à poursuyure , arester , donner , reculer , ont paye , solde & part au butin , comme il s'est pratiqué en la nouvelle conqueste des Indes. Voila des choses communes à tous & à peu pres pareilles.

Venons aux differences & aduantages des vns sur les autres : l'homme est singulier & excellent en aucunes choses par dessus les animaux : & en d'autres les bestes ont le dessus , afin que toutes choses soyent ainsi entrelassées & enchainées en ceste générale police du monde & de nature. Les aduantages certains de l'homme sont les grandes facultés de l'ame , la subtilité , viuacité & suffisance d'esprit à inuenter , iuger , choisir ; la parole pour demander & offrir ayde & secours , la main pour exécuter ce que l'esprit aura de soy inuenté , & apprins d'autrui. La forme aussi du corps , grande diuersité de mouuemens des membres , dont il tire plus de seruice de son corps.

Les aduantages des bestes , certains & hors de dispute , sont ou generaux ou particuliers :

D 3

les generaux font santé , qui leur est bien plus forte & constante. Le serain ne leur nuit point , ne sont subjectes aux defluxions , d'où sont causées presque toutes maladies. L'homme couuert de toist & de paillon à peine s'en peut-il garder : Moderation d'appetits & d'actions , innocence , feureté , repos & tranquillité de vie , vne liberté pleine & entiere sans honte , crainte , ny ceremonie aux choses naturelles & licites (car l'homme est seul , qui à se desfrober & se cacher en ses actions , duquel les defauts & imperfections offensent ses compagnons) exemption de tant de vices & desfreiglemens , superstition , ambition , avarice , enuie. Les particuliers font l'habitation & demeure pure , haute , saine & plaisante des oyseaux en la region de l'air : La suffisance d'aucuns arts , comme de bastir aux arondelles , & autres oyseaux , tistre & coudre aux araignées , de la medecine en plusieurs animaux , musique aux rossignols. Les effets & propriétés merueilleuses , inimitables , voire inimaginables , comme la propriété du poisson Remora à arrester les plus grands vaisseaux de mer , comme il se lit de la galere Capitanesse de Marc Antoine , & le mesme de celle de Caligula : de la Torpille à endormir les membres d'autrui bien esloignés & sans le toucher , de l'hérifson à pressentir les vents , du cameleon & du poulpe à prendre les couleurs. Les pronostiques , comme des oy-

seaux en leurs passages de contrée en autre , selon les saisons diuerſes , de toutes bestes meres à cognoistre de tous leurs petits , qui doit estre le meilleur , car estant question de les sauuer du danger , ou rapporter au nid , elles commencent tousiours par le meilleur , qu'elles ſçauent & pronostiquent tel. En toutes ces choses l'homme est de beaucoup inferieur , & en plusieurs il n'y vaut du tout rien : l'on y peut adiouter si l'on veut la longueur de vie qui en certains animaux passe sept ou huit fois le plus long terme de l'homme.

Les aduantages , que l'homme pretend sur les bestes , mais qui sont disputables , & qui peut estre sont au rebours pour les bestes contre l'homme , sont plusieurs. Premièrement les facultés raisonnables , discours , ratiocination , discipline , iugement , prudence. Il y a icy deux choses à dire , l'une est de la verité du faict. C'est vne question grande , si les bestes sont priuées de toutes ces facultés spirituelles : l'opinion qui tient qu'elles n'en sont pas priuées , ains qu'elles les ont , est la plus authentique & plus vraye. Elle est tenue des plus graues Philosophes mesmement Aristote , Galien , Porphyre , Plutarque , Soutenue par ceste raison. La composition du cerueau , qui est la partie , de laquelle l'ame se sert pour ratiociner , est toute pareille & mesme aux bestes qu'aux hommes : confir-

mée par experience. Les bestes des singuliers concluent les vniuersels, du regard d'un homme seul cognoissent tous hommes, sçauent conjoindre & diuiser, & distinguer le bon du mauuais pour leur vie, liberté, & de leurs petits. Voire se lisent & se voyent, si l'on y veut bien prendre garde, plusieurs traicts faicts par les bestes, qui surpassent la suffisance, subtilité, & tout l'engin du commun des hommes, i'en veux icy rapporter quelques vns plus signalés. Le renard voulant passer sur la glace d'une riuere gelée, applique l'oreille contre la glace pour sentir s'il y a du bruit, & si l'eau court au dessouz pour sçauoir s'il faut aduancer ou reculer, dont s'en seruent les Thraciens voulans passer vne riuere gelée : Le chien pour sçauoir auquel des trois chemins se sera mis son maistre ou l'animal qu'il cherche, apres auoir fleuré & s'estre affeuré des deux, qu'il n'y a passé pour n'y sentir la trace sans plus marchander, ny fleurer, il s'eslance dedans le troisieme. Le mulet du Philosophe Thales portant du sel & trauersant vn ruisseau se plongeoit dedans avec sa charge, pour la rendre plus legere, l'ayant vne fois trouuée telle y estant par accident tombé, mais estant apres chargé de laine ne s'y plongeoit plus. Plutarque dit auoir veu en vn bateau vn chien iettant en vn vaisseau des caillouz, pour faire monter

l'huyile , qui estoit trop basse. Autant s'en diët des corbeaux de Barbarie pour faire monter l'eau, quand elle est basse , & qu'ils veulent boire. De mesme les elephans portans des pierres & pieces de bois dedans la fosse où vn autre leur compaignon se trouue engagé , pour luy ayder à en sortir. Les bœufs des iardins royaux de Suze , apprins à faire cent tours de rouë à l'entour d'vn puis pour en tirer de l'eau, & en arrouser les iardins , n'en vouloient iamais faire d'auantage , & ne failloient aussi iamais au conte. Toutes ces choses comment se peuuent elles faire sans discours & ratiocination , conjunction & diuision. C'est en estre priué que ne cognoistre cela : la dexterité de tirer & arracher les dards & iaelots des corps avec fort peu de douleur , qui est aux elephans : le chien dont parle Plutarque , qui en vn ieu public sur l'eschafaud contrefaisoit le mort , tirant à la fin , tremblant , puis se roidissant , se laissant entrainer , puis peu à peu se reuenant , & leuant la teste faisoit le ressuscité ; tant de singeries & de tours estranges , que font les chiens des basteleurs , les ruses & inuentions dequoy les bestes se couurent des entreprinſes que nous faisons sur elles : la mesnagerie & grande prouidence des fourmis à estendre au dehors leurs grains pour les esuenter , seicher , afin qu'ils ne moisissent.

& corrompent , à ronger le bout du grain , afin qu'il ne germe & se face semence , la police des mouches à miel , où y a si grande diuersité d'offices & de charges , & une si grande constance.

Pour rabattre tout cecy aucuns malicieusement rapportent toutes ces choses à vne inclination naturelle , seruite & forcée : mais outre que cela ne peut estre , ny entrer en imagination , car il y faut enumeration de parties , comparaison , discours par conionction , & diuision , & consequences : aussi ne sçauroient-ils dire , que c'est que cette inclination & instinct naturel. Encores ce dire se retorque contr'eux , car il est sans comparaison plus noble , honorable , & ressemblant à la diuinité d'agir par nature , que par art & apparentissage , estre conduict & mené par la main de Dieu , que par la sienne , & reglement , agir par naturelle & ineuitable condition , que reiglement par liberté fortuite & temeraire. Par cette opposition d'instinct naturel ils les veulent aussi priver d'instruction & discipline tant actiue que passiue , mais l'experience les desment : car elles la reçoient , tesmoins les pies , perroquets , merles , chiens , comme a esté dit , & la donnent tesmoins les rossignols , & sur tout les elephans , qui passent tous animaux en docilité & toute sorte de discipline & suffisance.

Quant à cette faculté de l'esprit, dont l'homme se glorifie tant, qui est de spiritua-
liser les choses corporelles & absentes, les
despoüillant de tous accidens pour les con-
cevoir à sa mode, *nam intellectum est in intel-
ligente ad modum intelligentis*, les bestes en
font de mesmes, le cheual accoustumé à la
guerre dormant en sa litiere tremousse &
fremit, comme s'il estoit en la meslée, con-
çoit vn son de tambour, de trompette, vne
armée : le leurier en songe hallettant, allon-
geant la queue, secouant les iarrêts, conçoit
vn lieure spirituel : les chiens de garde gron-
dent en songeant, & puis l'appent tout à fait,
imaginant vn estrangier arriuer. Pour con-
clure ce premier poinct, il faut dire, que les
bestes ratiocinent, vsent de discours & juge-
ment, mais plus foiblement & imparfaitement
que l'homme. Elles sont inferieures en cela à
l'homme ; & non pas qu'elles n'y ayent du
tout point de part. Elles sont inferieures à
l'homme, comme entre les hommes les vns
sont inferieurs aux autres, & aussi entre les
bestes s'y trouue telle difference : mais encore
y a-il plus grande difference entre les hommes :
car comme se dira cy apres : il y a plus grande
distance d'homme à homme que d'homme à beste.

L'autre poinct à dire en cette matiere est,
que cette preeminence & aduantage d'entende-
ment & autres facultés spirituelles, que l'homme
pretend, luy est bien cher vendu, & luy porte

plus de mal que de bien , car c'est la source principale des maux , qui le pressent , vices , passions , maladies , irresolution , trouble , desespoir , dequoy sont quittes les bestes à faute de ce grand aduantage , tescmoin le pourceau de Pyrrho , qui mangeoit paisiblement au nauire durant la grande tempeste , qui transissoit de peur toutes les personnes qui y estoient. Il semble que ces grandes parties de l'ame ont esté desniées aux bestes , à tout le moins retranchées & baillées chetiues & foibles pour leur grand bien & repos , & données à l'homme pour son grand tourment , car par icelles il s'agitte & traueille , se fasche du passé , s'estonne & se trouble pour l'aduenir , voire il imagine , apprehende & craint des maux , qui ne sont & ne seront point. Les animaux n'apprehendent le mal que lors qu'ils le sentent : estans eschappés sont en pleine seureté & repos. Voila comment l'homme est le plus miserable , par où l'on le pensoit plus heureux , dont il semble qu'il eust mieux valu à l'homme n'estre point doiüé & garny de toutes ces belles & celestes armes , puis qu'il les tourne contre soy à son mal & à sa ruine. Et de fait nous voyons que les stupides & foibles d'esprit viuent plus en repos , & ont meilleur marché des maux & accidens , que les fort spirituels.

Vn autre aduantage que l'homme pretend sur les bestes est vne seigneurie & puissance de

commander , qu'il pense auoir sur les bestes : mais outre que c'est vn aduantage , que les hommes mesurent & exercent les vns sur les autres , encores cecy n'est il pas vray. Car où est ce commander de l'homme , & cet obeyr des bestes ? C'est vne chimere , & les hommes craignent plus les bestes , qu'elles ne font les hommes. L'homme a bien à la verité grande preeminence par dessus les bestes , ut *præsit piscibus maris , volatilibus cæli , bestiis terræ*. Et c'est à cause de sa belle & droicte forme , de sa sagesse & prerogatiue de son esprit : mais non pas qu'il leur commande , ny qu'elles luy obeissent.

Il y a encores vn autre aduantage voisin de cettuicy , pretendu par l'homme , qui est vne plaine liberté , reprochant aux bestes la seruitude , captiuité , subiection , mais c'est bien mal à propos. Il y a bien plus de subiet & d'occasion de reprocher à l'homme , tescmoin les esclaués non seulement faits par force , & ceux qui descendent d'eux , mais encores les volontaires , qui vendent à purs deniers leur liberté , ou qui la donnent de gayeté de cœur , ou pour quelque commodité , comme les escrimeurs anciens à outrance , les femmes à leurs dames , les soldats à leurs capitaines. Or il n'y a rien de tout cela aux bestes , elles ne s'asservissent iamais les vnes aux autres , ne vont point à la seruitude , ny actiuelement , ny

passiuement , ny pour afferuir , ny pour estre afferuies : & sont en toutes façons plus libres que les hommes.

Et ce que l'homme va à la chasse , prend , tue , mange les bestes , aüssi est-il prins , tué , mangé par elles à son tour & plus noblement de viue force , non par finesse & par art , comme il fait , & non seulement d'elles , mais de son compagnon , d'vn autre homme , chose bien vilaine : les bestes assemblent une troupe , pour aller destruire , rauager , & prendre esclave vn autre troupe de leurs semblables , comme font les hommes.

Le quatriesme & grand advantage pretendu par l'homme est en la vertu , mais de la morale il est disputable : car la recognoissance , l'amitié officieuse , la fidelité , la magnanimité , & tant d'autres qui consistent en societé & conuersation , sont bien plus viues , plus expresses & constantes qu'au commun des hommes. Hircanus le chien de Lisimachus demeura sur le list de son maistre mort sans vouloir jamais manger ny boire : & se jetta au feu , ou fut mis le corps de son maistre , & s'y laissa brusler avec luy , tout le mesme en fist vn autre appartenant à vn certain Pirrus : celui du sage Hesiode decela les meurtriers de son maistre , vn autre de mesme en la presence du Roy Pirrus & de toute son armée : vn autre qui ne cessa , comme afferme Pla-

tarque , allant de ville en ville , jusques à ce qu'il eust faict venir en justice le sacrilege & voleur du Temple d'Athenes. L'histoire est celebre du lyon hoste & nourricier d'Androdus esclave son medecin , qu'il ne voulust le toucher luy ayant esté exposé , ce qu'Apian dict auoir veu à Rome. Vn elephant ayant par cholere tué son gouverneur , par repentance ne voulut plus viure , boire , ny manger. Au contraire il n'y a animal au monde iniuste , ingrat , mescognoissant , traistre , perfide , menteur & dissimulé au prix de l'homme. Au reste puis que la vertu est en la moderation de ses appetits , & à brider les voluptés , les bestes sont bien plus reiglées que nous , & se contiennent mieux dedans les bornes de nature. Car non seulement elles ne sont point touchées ny passionnés de cupidités non naturelles , superflues & artificielles , qui sont toutes vicieuses , & infinies , comme les hommes qui y sont pour la plus part tous plongez : mais encores aux naturelles , comme boire & manger , l'accointance des masles & femelles , elles y sont beaucoup plus moderées & retenues. Mais pour voir qui est plus vertueux & vicieux de l'homme , ou de la beste , & faire à bon escient honte à l'homme deuant la beste , prenons la plus propre & conuenable vertu de l'homme , c'est comme porte son nom , l'humanité , comme le plus estrange & con-

traire vice, c'est cruauté. Or en cecy les bestes ont bien de quoy faire rougir l'homme, en ces huit mots : Elles ne s'attaquent & n'offensent gueres ceux de leur genre, *Major serpentum ferarumque concordia quàm hominum* : Ne combattent que pour tres-grandes & justes causes, deffense & conseruation de leur vie, liberté, & leurs petits : Avec leurs armes naturelles & ouuertes, par la seule viue force & villance d'une à vne, comme en duels & non en troupe ny par deffain : n'ont leurs combats courts & tost expediés, jusques à ce que l'une soit blessée ou qu'elle cede : & le combat finy, la querelle, la hayne, & la cholere est aussi terminée. Mais l'homme n'a querelle que contre l'homme : pour des causes non seulement legeres, vaines, & friuoles, mais souuent injustes, avec armes artificielles & traitresses : par fraudes & mauvais moyens : en troupe & assemblée faicte avec deffain : faict la guerre fort longuement, & faus fin jusques à la mort & ne pouuant plus nuire encores la hayne & la cholere dure.

La conclusion de ceste comparaison est que vainement & mal l'homme se glorifie tant par dessus les bestes. Car si l'homme a quelque chose plus qu'elles, comme est principalement la viuacité de l'esprit & de l'entendement, & les grandes facultés de l'ame : aussi en eschange est-il subiect à mille maux, dont les bestes

n'en tiennent rien , inconstance , irresolution , superstition , soin penible des choses à venir , ambition , avarice , enuie , curiosité , detraction , mensonge , vn monde d'appetits deregles , de mescontentemens , & d'ennuis. Cet esprit , dont l'homme fait tant de feste , luy apporte vn million de maux & plus lors qu'il s'agite & s'efforce. Car non seulement il nuit au corps , trouble , rompt , & lasse la force & les fonctions corporelles , mais encores soy-mesme l'empesche. Qui jette les hommes à la folie , à la manie , que la poincte , l'agilité , & la force propre de l'esprit ? Les plus subtiles folies & excellentes manies viennent des plus rares & viues agitations de l'esprit , comme des plus grandes amitiés naissent les plus grandes inimitiés : & des santés vigoureuses , les mortelles maladies. Les melancholiques , dict Platon , sont plus capables de science & de sagesse : mais aussi de folie. Et qui bien regardera , trouuera qu'aux eleuations & sailles de l'ame libre , il y a quelque grain de folie , ce sont à la verité des choses fort voisines : pour simplement viure bien selon nature , les bestes sont de beaucoup plus aduantagees , vivent plus libres , assurees , moderees , contentes. Et l'homme est sage qui les considere , qui s'en fait leçon & son profit ; en ce faisant il se forme à l'innocence , simplicité , liberté , & douceur naturelle , qui

reluit aux bestes , & est toute alterée & corrompue en nous par nos artificielles inuentions , & desbauches , abusant de ce que nous disons auoir par dessus elles , qui est l'esprit & jugement. Et Dieu tant souuent nous renuoye à l'eschole , à l'exemple des bestes , du milan , la cicogne , l'arondelle , toutrerelle , la fourmi , le beuf & l'asne & tant d'autres. Au reste il se faut souuenir qu'il y a quelque commerce entre les bestes & nous , quelque relation & obligation mutuelle , ne fust ce que parce qu'elles sont à vn mesme maistre , & de mesme famille que nous , il est indigne d'vser de cruauté enuers elles , nous deuons la justice aux hommes , la grace & la beniguité enuers les autres creatures , qui en sont capables.





TROISIEME
CONSIDERATION
DE L'HOMME,

*Qui est en détail par toutes ses pieces ,
dont il est composé & estably.*

P R E F A C E.

AYANT jusques icy traité & considéré l'homme en blot & tout entier , tant en soy (qui a esté la premiere consideration) que par comparaison (en la seconde) nous le voulons maintenant estudier & considerer particulièrement & distinctement par toutes ses pieces : Premièrement en sa personne & subject , ce que nous allons faire en ceste troisieme consideration , laquelle ne sera pas seulement morale , mais aussi naturelle , puis de sa vie & de ses estats , aux suivantes considerations ,



C H A P I T R E . IX.

Distinction premiere & generale de l'homme.

L'HOMME comme vn animal prodigieux est fait de pieces toutes contraires & ennemies , l'ame est comme vn petit Dieu , le corps

comme vn fumier , vne beste : toutesfois ces deux parties sont tellement accouplées , & s'embrassent si bien l'une l'autre avec toutes leurs querelles , qu'elles ne peuvent demeurer sans guerre , ny se separer sans tourment & regret , & comme tenant le loup par les oreilles , chacune peut dire à l'autre , je ne puis avec toy , ny sans toy viure , *nec tecum possum vivere , nec sine te.*

Mais pource que derechef en ceste ame il y a deux parties bien differentes , il semble pour mieux & plus expressement représenter & cognoistre l'homme , qu'au premier coup l'on peut remarquer trois choses en l'homme , l'esprit , l'ame , la chair. Dont l'esprit & la chair tiennent les bouts & extremités contraires , l'ame mitoyenne & indifferente : l'esprit la tres-heroique partie , parcelle , scintille , image , & defluxion de la diuinité , est en l'homme comme le roy en la republique , ne respire que le bien & le ciel , où il tend tousiours : la chair au contraire , comme la lie d'un peuple tumultuaire & insensé , le marc & la fantine de l'homme , partie brutale , tend tousiours au mal & à la matiere : l'ame au milieu , comme les principaux du populaire est indifferente entre le bien & le mal , le merite & le demerite , est perpetuellement sollicitée de l'esprit & de la chair ; & selon le party , ou elle se range , est spirituelle

& bonne, ou charnelle & mauvaife. Icy font logées toutes les affections naturelles, qui ne font vertueufes ny vicieufes, comme l'amour de fes parens & amis, crainte de honte, pitié des affligés, defir de bonne reputation. Cette diftinction aydera beaucoup à fe recognoître & difcerner les actions, pour ne s'y mefcompter, comme l'on faiët fouuent jugeant par l'efcorce & apparence, pensant que ce foit de l'efprit ce qui est de l'ame, voire de la chair, & attribuant à vertu ce qui est de la nature ou du vice. Combien de bonnes & de belles actions produites par paffion, ou bien par vne inclination & complaifance naturelle, *ut ferviant genio & fuo indulgant animo* &c.

C H A P I T R E X.

Du corps humain en general.

A Y A N T à parler de toutes les pieces de l'homme, faut commencer par le corps, comme par le plus facile & apparant, & qu'il est auffi l'ainné de l'ame, comme le domicile doit estre faiët & dressé auant qu'y demourer, & l'attelier auant que l'ouurier y entre pour y

Le corps humain est formé avec le temps , & de tel ordre , que premierement sont basties les trois plus nobles & heroiques parties , le foye , le cœur , le cerueau , distantes en long , & se tenans par jointures desliées , qui puis se remplissent tout à la façon d'un formy , ou y a trois parties plus grosses & enflées , jointes par entredeux , desliées. Selon ces trois parties principales viennent à considerer trois estages en l'homme (image racourcie du monde) qui respondent aux trois estages & regions de l'univers , la basse du foye , racine des vaines , officine des esprits naturels , & le lieu de l'ame concupiscible , en laquelle son contenu le ventricule , ou l'estomach , les boyaux , les reins , la ratte , & toutes les parties genitales , respond à la region elementaire où se font toutes les generations & corruptions. Celle du milieu où maistrise le cœur , le tige des arteres , & des esprits vitaux , & le siege de l'ame irascible , separée de celle d'embas par la toile tendue du diaphragme , & de celle d'enhaut par le destroit de la gorge , en laquelle sont aussi les poulmons , respond à la region ætherée. Celle d'enhaut , où loge le cerueau spongieux , source des nerfs & esprits animaux , du mouvement & sentiment , & le throsne de l'ame raisonnable , *ubi sedet pro tribunali* , respond à la region celeste & intellectuelle,

L'homme en son corps a plusieurs choses, qui luy sont peculieres priuatiuement aux bestes: Stature droicte, 2 forme belle, 3 visage proprement dit, 4 nudité naturelle, 5 mouuement tant diuers des membres, 6 souppléssé & mobilité de la main ouuriere de tant de choses, c'est vn miracle, 7 grosseur & abondance de cerueau, 8 le genoüil, qui est en l'homme seul au deuant, 9 si grande longueur du pied, au deuant & qui est si court au derriere, 10 saignée du nez, chose estrange, veu qu'il a la teste droicte & les bestes baissée, 11 rougir à la honte, 12 pallir à la crainte, 13 les causes ou raisons de toutes ces singularités sont belles, mais ne sont de ce nostre pris faict.

Les biens du corps sont la santé, la beauté, l'alegresse, la force, la vigueur, l'adresse & disposition, mais la santé passe tout.

Les principales & plus nobles pieces des externes sont les sens corporels, & des internes, le cerueau, le cœur, le foye, & puis les genitoires, & les poulmons.

L'excellence du corps est generally en la forme, droicteure & port d'iceluy: specialement & particulierement en la face & aux mains, qui sont les deux parties, que nous laissons par honneur nuës. Certes les sages mesmes Stoiques ont tant faict de cas de la forme humaine, qu'ils ont dit vouloir mieux

estre fols en la forme humaine , que sages en la forme brutale , preferans la forme corporelle à la sagesse.

Le corps de l'homme touche fort peu la terre ; il est droict tendu au ciel , ou il regarde , se voit & se cognoist , comme en son miroir , les plantes tout au rebours ont la teste & racine toute dedans la terre , les bestes comme au milieu l'ont entredeux , mais plus & moins : la cause de ceste droicture n'est pas proprement l'ame raisonnable , comm' il se voit aux courbés , bossus , boiteux : non la ligne droicte de l'espine du dos , qui est aussi aux serpents , non la chaleur naturelle ou vitale , qui est pareille ou plus grande en certaines bestes , combien que tout cela y peut seruir de quelque chose : Ceste droicture conuient à l'homme , & comme homme & comme Roy d'icy bas. Aux petites & particulieres royautés y a vne marque & majesté ; comme il se voit au dauphin couronné , au serpent basilisé , au lyon avec son collier , sa coulœur de poil , & ses yeux , en l'aigle , au roy des abeilles. Mais l'homme roy vniuersel d'icy bas marche la teste droicte comm' vn maistre en sa maison , regente tout & en vient à bout par amour ou par force , domptant , ou appriuoisant.

Comm'il y en a qui ont des contenances , gestes , & mouuemens artificiels & affectés , aussi y en a , qui en ont de si naturels & si propres ,

propres , qu'ils ne les sentent , ny ne les recognoissent point ; comme pencher la teste , rincer le nés. Mais tous en auons , qui ne partent point de nostre discours , ains d'une pure naturelle & prompte impulsion , comme mettre la main au deuant en nos cheutes.

CHAPITRE XI.

De la santé , beauté , & du visage.

LA santé est le plus beau & le plus riche present , que nature nous sçache faire , preferable à toute autre chose , non seulement science , noblesse , richesses , mais à la sagesse mesmes , ce disent les plus austeres sages. C'est la seule chose qui merite que l'on employe tout , voire la vie mesme , pour l'auoir. Car sans elle la vie est sans goust , voire est injurieuse ; la vertu & la sagesse ternissent & s'esuanouissent sans elle. Quel secours apportera au plus grand homme qui soit , toute la sagesse , s'il est frappé du haut mal , d'une Apoplexie ? Certes je ne luy puis preferer aucune chose que la seule preud'homme , qui est la santé de l'ame. Or combien que ce soit vn don de nature , gaudeant bene nati , ostroyé en la premiere conformation : si est-ce que ce qui

vient apres le lait ; le bon raiglement de viure , qui consiste en sobriété , mediocre exercice , se garder de tristesse , & toute esmotion forte , la conserve fort. La maladie & la douleur sont ses contraires , qui sont les plus grands , & peut-estre les seuls maux de l'homme : desquels a esté parlé & sera encores.

La beauté vient apres , qui est une piece de grande recommandation au commerce des hommes. C'est le premier moyen de conciliation des vns aux autres , & est vray semblable que la premiere distinction , qui a esté entre les hommes , & la premiere consideration , qui donna preeminence aux vns sur les autres , a esté l'aduantage de la beauté. C'est aussi vne qualité puissante , il n'en y a point qui la surpasse en credit ; ny qui aye tant de part au commerce des hommes. Il n'y a barbare si resolu , qui n'en soit frappé. Elle presente au deuant , elle seduit , & preoccupe le jugement , donne des impressions , & presse avec grande autorité , dont Socrates l'appelle une courte tyrannie. Platon le priuilege de nature. Car il semble que celui qui porte sur le visage les faveurs de la nature imprimées d'en vne rare & excellente beauté , ayt quelque legitime puissance sur nous ; & que pouruant nos yeux de soy , il y retourne aussi nos affections , & les y assubietisse malgré nous. Aristote dit , qu'il appartient aux beaux de

commander, qu'ils sont venerables apres les dieux, qu'il n'appartient qu'aux aucugles de n'en estre touchés. Cyrus, Alexandre, Cesar, trois grands commandeurs des hommes s'en sont seruis en leurs grandes affaires, voire Scipion, le meilleur de tous : Beau & bon sont cousins, & s'expriment par mesmes mots en grec & en l'escriture sainte. Plusieurs grands Philosophes ont acquis leur sagesse par l'entremise de leur beauté : elle est considerée mesmes & recherchée aux bestes.

Il y a diuerfes considerations en la beauté. Celle des hommes est proprement la forme & la taille du corps, les autres beautés sont pour les femmes. Il y a deux sortes de beauté, l'une arrestée qui ne se remue point, & est en la proportion & couleur deuë des membres, vn corps qui ne soit enflé ny bouffy, auquel d'ailleurs les nerfs ne paroissent point, ny les os ne percent point la peau, mais plain de sang, d'esprit & embonpoint, ayant les muscles releués, le cuir poli, la couleur vermeille : l'autre mouuante qui s'appelle grace, qui en la conduicte des mouuemens des membres, sur tout des yeux. Celle là seule est comme morte, cette cy est agente & viuante. Il y a des beautés rudes, fieres, aigres, d'autres douces voire encores fades.

La beauté & excellence du corps est proprement considerable au visage : il n'y a rien

de plus beau en l'homme que l'ame, & au corps que le visage, qui est comme l'ame racourcie : c'est la monstre & l'image de l'aine, c'est son escusson à plusieurs quartiers, représentant le recueil de tous les tiltres de sa noblesse, planté & colloqué sur la porte & au frontispice, afin que l'on sçache que c'est là sa demeure & son palais, c'est par luy que l'on cognoist la personne. C'est vn abregé, voila pourquoy l'art, qui imite nature, ne se fonce pour représenter la personne, que de peindre ou tailler le visage.

Au visage humain, y a plusieurs grandes singularités, qui ne sont point aux bestes (dont à vray & bien dire elles n'ont point de visage) ny aux autres parties du corps humain, nombre & diuersité de pieces, & de façon en icelles; aux bestes y a moins de pieces, car les iouës, le menton, & le front n'y sont point, encores beaucoup moins de façon. 2 Varieté de couleurs, car en l'œil seul le noir, le blanc, le verd, le bleu, le rouge, le cristalin. 3 Proportion, les sens y sont doubles se respondans l'vn à l'autre, & se raportans si bien que la grandeur de l'œil est la grandeur de la bouche, la largeur du front & la longueur du nez est celle du menton & des leures. 4 Admirable diuersité des visages, & telle qu'il ne s'en trouueroit deux semblables en tout & par tout : c'est vn chef

d'œuvre qui ne se trouue en toute autre chose. Cette diuersité est tres-vtile à la société humaine : Premièrement pour s'entre recognoistre , car maux infinis voire la dissipation du genre humain s'ensuyuroit , si l'on venoit à se mesconter par la semblance des visages : si nos faces n'estoient semblables l'on ne scauroit discerner l'homme de la beste , si elles n'estoient dissemblables l'on ne scauroit discerner l'homme de l'homme , c'est vn artifice de nature qui a posé en ceste partie quelque secret de contenter l'vn ou l'autre en tout le monde. Car de ceste diuersité vient qu'il n'y a personne qui ne soit trouué beau par quelqu'un. 5 Dignité & honneur en sa figure ronde , en sa forme droicte , & haut esleuée , regardant vers le ciel , nuë & découuerte , sans poil , plume , ou escaille , comme aux bestes. 6 Grace , douceur venusté plaisante & agreable jusques à crocheter les cœurs & rauir les volontés , comme a esté dit cy dessus. Bref le visage est le throsne de la beauté & de l'amour , le siege du ris & du baïser , deux choses tres-propres à l'homme , tres-agreables , les vrais & plus expres symboles d'amitié & de bonne intelligence. 7 Finalement il est propre à tous changemens , pour declarer les mouuemens interieurs & passions de l'ame , ioye , tristesse , amitié , haine , enuie , malice , honte , colere , despit , ialousie , & autres ; il est comme la

monstre de l'orloge , qui marque les heures & moments du temps , estans les mouuements & rouës cachées au dedans , & comme l'air qui reçoit toutes les couleurs & changements du temps , monstre quel temps il fait : Aussi dit-on l'air du visage , *corpus animum tegit & detegit : in facie legitur homo.*

La Beauté du visage git en vn front large , quarré , tendu , clair & serain , sourcils bien rangés , menus & deliés , l'œil bien fendu , gay & brillant , nés bien vuide , bouche petite , aux leures corallines , menton court & forchu , jouës releuées , & au milieu le plaïsant gelasin , oreille ronde & bien trouffée , le tout avec vn teint vif , blanc , & vermeil : Toutesfois ceste description n'est pas receuë par tout : les opinions de la beauté sont bien differentes , selon les nations. Aux Indes la plus grande beauté est en ce , que nous estimons la plus grande laideur , sçauoir en couleur basanée , leures grosses & enflées , nez plat & large , les dents teintes de noir , ou de rouge , grandes oreilles pendantes ; aux femmes front fort petit & velu , les tetins grands & pendans , afin qu'elles puissent les bailler à leurs petits par dessus les espâules , & usent de tous artifices pour paruenir à ceste forme : Sans aller si loïn , en Espagne la beauté est vuidée & estrillée , en Italie grosse & massiue. Aux vns plaist la molle , delicate , & mignarde , aux autres la forte , vigoureuse , fiere , & magistrale.

La Beauté du corps spécialement du visage doit selon raison démonstrer & tesmoigner vne beauté en l'ame (qui est vne equabilité & reiglement d'opinions & de jugemens avec vne fermeté & constance) car il n'est rien plus vraysemblable, que la conformité & relation du corps à l'esprit : quand elle n'y est, il faut penser qu'il y a quelque accident, qui a interrompu le cours ordinaire, comme il aduient, & nous le voyons souuent. Car le lait de la nourrice, l'institution première, les compagnies apportent de grands changements au naturel originel de l'ame, soit en bien, soit en mal. Socrates confessoit que la laideur de son corps accusoit justement la laideur naturelle de son ame, mais que par institution il auoit corrigé celle de l'ame. C'est vne foible & dangereuse caution que la mine ; mais ceux qui dementent leur bonne Phisionomie, sont plus punissables que les autres, car ils falsifient & trahissent la promesse bonne, que nature a plantée en leur front, & trompent le monde.

Nous deburions selon le conseil de Socrates, nous rendre plus attentifs & assidus à considérer les beautés des esprits, & y prendre le mesme plaisir que nous faisons aux beautés du corps, & par là nous approcher, s'alier, conioindre, & concilier en amitié, mais il faudroit à cela des yeux propres & philosophiques.

CHAPITRE XII.

Des sens de nature , plus nobles pieces du corps,

TOUTE recognoissance s'achemine en nous par les sens : Ce sont nos premiers maistres : elle se commence par eux & se resout en eux. Ils sont le commencement & la fin de tout. Il est impossible de reculer plus arriere , chacun d'eux est chef & souuerain en son ordre & a grande domination , vn nombre infini de cognoissance , l'vn ne tient ny ne despend ou a besoin de l'autre : ainsi sont ils également grands , bien qu'ils ayent beaucoup plus d'estenduë , de suite , & d'affaires les vns que les autres , comme vn petit roytelet est aussi bien souuerain en son petit destroiët , que le Grand en vn grand estat.

C'est vn axiome entre nous , qu'il n'y a que cinq sens de nature , pource que nous n'en remarquons que cinq en nous , mais il y en peut bien auoir dauantage : & y a grand doute & apparence qu'il y en a : mais il est impossible à nous de le sçauoir , l'affirmer , ou nier. Car l'on ne sçauroit jamais cognoistre le defect d'vn sens que l'on n'a iamais eu. Il y a plusieurs bestes , qui viuent vne vie pleine & entiere , à qui manque quelqu'vn de nos cinq sens , &

peut l'animal viure sans les cinq sens, sauf l'attouchement, qui seul est necessaire à la vie. Nous viuons tres-commodement avec cinq, & peut estre qu'il nous en manque encores vn, ou deux, ou trois : Mais ne se peut sçauoir : vn sens ne peut descouurir l'autre : & s'il en manque vn par nature, l'on ne le sçauroit trouuer à dire. L'homme né aueugle ne sçauoit iamais conceuoir qu'il ne voit pas, ny desirer de voir ou regretter la veuë, il dira bien, peut-estre, qu'il voudra voir : mais cela vient qu'il a ouy dire ou apprins d'autrui qu'il a à dire quelque chose, la raison est que les sens sont les premieres portes & entrées à la cognoissance. Ainsi l'homme ne pouuant imaginer plus que les cinq, qu'il a, il ne sçauoit deuiner s'il y en a dauantage en nature : mais il y en peut auoir. Qui sçait si les difficultés, que nous trouuons en plusieurs ouurages de nature, & les effects des animaux, que nous ne pouuons entendre, viennent du defaut de quelque sens que nous n'auons pas ? Les propriétés occultes, que nous appellons, en plusieurs choses. Il se peut dire qu'il y a des facultés sensitiues en nature, propres à les juger & apperceuoir, mais que nous ne les auons pas, & que l'ignorance de telles choses vient de nostre defaut. Qui sçait si c'est quelque sens particulier, qui descouure aux coqs l'heure de minuit & du matin, & les eümeut à chanter,

qui achemine les bestes à prendre certaines herbes à leur guarison , & tant d'autres choses comme cela ? personne ne sçauroit dire qu'ouy, ny que non.

Aucuns essayent de rendre raison de ce nombre des cinq sens , & prouuer la suffisance d'iceux en les distinguant & comparant diuerfement : Les choses externes objects des sens sont tout pres du corps , ou estoignées ; si tout pres , mais qui demeurent dehors , c'est l'atouchement ; s'ils entrent , c'est le goust ; s'ils sont plus estoignés & presents en droicte ligne , c'est la veuë ; si obliques par reflexion , c'est l'ouye. On pourroit mieux dire ainsi , que ces cinq sens estants pour le seruice de l'homme entier , aucuns sont entierement pour le corps , sçauoir le goust & l'atouchement , celui là pour ce qui entre , cestui cy pour ce qui demeure dehors. Autres premierement & principalement pour l'ame , la veuë & l'ouye : la veuë pour l'inuention , l'ouye pour l'acquisition & communication , & vn au milieu pour les esprits mitoyens & lieux de l'ame & du corps , qui est fleurir. Plus ils respondent aux quatre elements & à leurs qualités , l'atouchement à la terre , l'ouye à l'air , le goust à l'eau & humide , le fleurir au feu , la veuë est composée & a de l'eau & du feu à cause de la splendeur de l'œil. Encores disent ils qu'il y a autant de sens , qu'il y a de chefs

& genres de choses sensibles, qui sont couleur, son, odeur, saueur, & le cinquième, qui n'a point de nom propre, object de l'attouchement, qui est chaud, froid, aspre, rabotteux, poli & tant d'autres : Mais l'on se trompe, car le nombre des sens n'a point esté dressé par le nombre des choses sensibles, lesquelles ne sont point cause, qu'il y en a autant. Selon ceste raison, il y en auroit beaucoup plus : & vn mesme sens reçoit plusieurs diuers chefs d'objectes : & vn mesme object est apperceu par diuers sens : donc le chatouillement des aisselles, & le plaisir de Venus, sont distingués des cinq sens, & par aucuns comprins en l'attouchement : mais c'est plustost de ce que l'esprit n'a peu venir à la cognoissance des choses, que par ses cinq sens, que nature luy en a autant baillé qu'il estoit requis pour son bien & sa fin.

Au reste la veüe passe tous les autres en promptitude, allant jusques au ciel en vn moment, car elle agit en l'air, peint de la lumiere sans mouuement : aucun des autres ne peut sans mouuement recevoir. Or tout mouuement requiert du temps, & combien que tous soient capables de plaisir & douleur, si est ce que l'attouchement peut recevoir tres-grand douleur, & presque point de plaisir : & le goust au contraire grand plaisir, & presque point de douleur.

De la foiblesse & incertitude de nos sens viennent ignorance, erreurs & tout mesconte : Car puis que par leur entremise vient toute cognoissance, s'ils nous faillent au rapport, il n'y a plus que tenir : Mais qui le peut dire & les accuser, qu'ils faillent, puis que par eux on commence à apprendre & cognoistre ? Aucuns ont dict, qu'ils ne faillent jamais : & que quand ils semblent faillir, la faute vient d'ailleurs, & qu'il s'en faut prendre plustost à toute autre chose, qu'aux sens ; autres ont dict tout au rebours, qu'ils sont tous faux, & qu'ils ne nous peuvent rien apprendre de certain.

Or que les sens soient faux ou non, pour le moins il est certain qu'ils trompent, voire forcent ordinairement le discours, la raison, & en eschange sont trompés par elle. Voila quelle belle science & certitude l'homme peut auoir, quand le dedans & le dehors est plein de fausseté & de foiblesse, & que ces parties principales, outils essentiels de la science, se trompent l'un l'autre. Que les sens trompent & forcent l'entendement, il se voit es sens desquels les vns eschauffent en furie, autres adoucissent, autres charoüillent l'ame. Et pourquoy ceux qui le font saigner, inciser, cauteriser, destournent ils les yeux, sinon qu'ils sçauent bien l'autorité grande, que les sens ont sur leur discours ? La veüe

d'un grand précipice estonne celuy qui se sçait bien en luy assuré, & enfin le sentiment ne vainq il pas & renuerse toutes les belles resolutions de vertu & de patience. Que aussi au rebours les sens sont pipez par l'entendement, il appert par ce que l'ame estant agitée de cholere, d'amour, de hayne, & autres passions, nos sens voyent & oyent les choses autres qu'elles ne sont, voire quelquefois nos sens sont souuent hebetés du tout par les passions de l'ame : & semble que l'ame retire au dedans & amuse les operations des sens : l'esprit empesche ailleurs, l'œil n'appërçoit pas ce qui est deuant, & ce qu'il voit.

Aux sens de nature les animaux ont part comme nous, & quelquefois plus : car aucuns ont l'ouye plus aigue que l'homme : autres la veüe ; autres le fleurer ; autres le goust : & tient on qu'en l'ouye le Cerf tient le premier lieu, & en la veüe l'âne, au fleurer le chien, au goust le singe, & au touchement la tortue : toutesfois la preeminence de l'atouchement est donnée à l'homme, qui est de tous les sens le plus brutal. Or si les sens sont les moyens de paruenir à la cognoissance, & les bestes y ont part, voire quelquefois la meilleure, pourquoy n'auront elles cognoissance ?

Mais les sens ne sont pas seuls outils de la cognoissance, ny les nostres mesmes ne sont

pas seuls à consulter & croire. Car si les bestes par leurs sens jugent autrement des choses que nous par les nostres, comme elles font, qui en fera creu? Nostre salive nettoye & desseche nos playes, elle tuë aussi le serpent, quelle sera la vraye qualité de la salive? dessecher, nettoyer, ou tuer? Pour bien juger des operations des sens, il faut estre d'accord avec les bestes, mais bien avec nous mesmes; nostre œil pressé & serré voit autrement qu'en son estat ordinaire; l'ouye reserrée reçoit les objets, autrement que ne l'estant; autrement void, oyt, goust vn enfant, qu'un homme faict, & cestuy cy qu'un vieillard; vn sain qu'un malade; vn sage qu'un fol. En vne si grande diuersité & contrariété, que faut il tenir pour certain? voire vn sens dément l'autre, vne peinture semble releuée à la veüe; à la main, elle est platte.

CHAPITRE XIII.

Du voir, oyrr, Parler.

CE sont les trois plus riches & excellens joyaux corporels de tous ceux qui sont en monstre: & y a dispute sur leurs preeminences. Quant à leurs organes, celuy, de la

veuë est en sa composition & sa forme admirable, & d'une beauté viue & esclatante, pour la grande varieté & subtilité de tant de petites pieces, d'où l'on dict que l'œil est une des parties du corps qui commencent les premieres à se former, & la dernière qui s'acheue. Et pour ceste mesme cause est il si delicat, & dict-on subject à six vingts maladies : puis vient celui du parler, mais en recompense l'ouye a plusieurs grands aduantages. Pour le service du corps, la veuë est beaucoup plus nécessaire. Dont il importe bien plus aux bestes que l'ouye : mais pour l'esprit, l'ouye tient le dessus. La veuë sert bien à l'inuention des choses, qui par elle ont esté presque toutes descouuertes; mais elle ne meine rien à perfection. Dauantage la veuë n'est capable, que des choses corporelles & d'indiuidus, & encores de leur crouste & superficie seulement, c'est l'outil des ignorans & imperites, qui mouentur *ad id quod adest, quodque presens est.*

L'ouye est un sens spirituel, c'est l'entremetteur & l'agent de l'entendement, l'outil des sçauans & spirituels, capable non seulement des secrets & interieurs des indiuidus à quoy la veuë n'arrive pas, mais encores des especes, & de toutes choses spirituelles & diuines, auxquelles la veuë sert plustost de destourbier que d'ayde, dont y a eu non seulement plusieurs aveugles grands & sçauans mais

d'autres encores qui se sont priués de veuë à escient, pour mieux philosopher, & nul jamais de sourd. C'est par où l'on entre en la forteresse & s'en rend on maistre; l'on ploye l'esprit en bien ou en mal, tesmoin la femme du Roi Agamemnon, qui fut contenue au deuoir de chasteté au son de la harpe, & Dauid qui par mesme moyen, chassoit les mauuais esprits de Saul, & le remettoit en santé, & le joueur de fleutes, qui amollissoit & roidissoit la voix de ce grand orateur Grachus. Bref la science, la vérité, & la vertu n'ont point d'autre entremise, ny d'entrée en l'ame que l'ouye voire la Chrestienté enseigne que la foy & le salut est par l'ouye, & que veuë y nuit plus qu'elle n'y aide; Que la foy est la creance des choses, qui ne voyent, laquelle est acquise par l'ouye: & elle appelle ses apprentifs & nouices auditeurs, *Catechoumenous*. Encores adjousteray je ce mot, que l'ouye apporte un grand secours aux tenebres & aux endormis, afin que par le son ils pouruoyent à leur conseruation. Pour toutes ces raisons, les sages recommandent tant l'ouye, la garder vierge & nette de toute corruption, pour le salut du dedans, comme pour la seureté de la ville l'on faict garde aux portes & murs, afin que l'ennemy n'y entre.

La parole est peculièrement donnée à l'homme, present excellent & fort necessaire: Pour le regard de celuy d'où elle sort, c'est

le truchement & l'image de l'ame, *animi index & speculum*, le messager du cœur, la porte par laquelle tout ce qui est dedans sort dehors & se met en veüe : toutes choses sortent des tenebres & du secret, viennent en lumiere, l'esprit se faict voir, dont disoit un ancien à vn enfant, parle afin que je te voye, c'est à dire ton dedans; comme les vaisseaux se cognoissent s'ils sont rompus, ouuerts ou entiers, plains ou vuides, par le son, & les metaux, par la touche, ainsi l'homme par le parler. Pour le regard de celuy qui la reçoit c'est vn maistre puissant & vn regent imperieux, qui entre en la forteresse, s'empare du maistre, l'agite, l'anime, l'aigrist, l'appaise, l'irrite, le contriste, le resiouist, lui imprime toute telle passion qu'il veut, manie & paistrise l'ame de l'escoutant, & la plie à tout sens, le faict rougir, blaismir, pallir, rire, pleurer, trembler de peur, tremousser d'estonnement, forcener de colere, treffaillir de joye, outrer & transir de passion. Pour le regard de tous, la parole est la main de l'esprit, par laquelle comme le corps par la sienne, il prend & donne, il demande conseil & secours, & le donne. C'est le grand entremetteur & courretier, par elle le traffecq se faict, *merx à Mercurio*, la paix se traite, les affaires se manient, les sciences & les biens de l'esprit se debitent & distribuent, c'est le lien & le cymment de la societé humaine

(moyennant qu'il soit entendu : car dit vn ancien , l'on est mieux en la compagnie d'un chien cognu , qu'en celle d'un homme duquel le langage est incognu , *ut externus alieno non fit hominis vice*) bref l'outil & instrument à toutes choses bonnes & mauuaifes , *vita & mors in manibus lingua*. Il n'y a rien meilleur ny pire que la langue : la langue du sage , c'est la porte d'un cabinet royal , laquelle s'ouurant voila incontinent mille choses diuerfes se representent toutes plus belles l'une que l'autre , des Indes , Peru , de l'Arabie. Ainsi le sage produict & faict marcher en belle ordonnance sentences & aphorismes de la Philosophie , similitudes , exemples , histoires , beaux mots triés de toutes les mines & thresors vieux & nouyeaux , *qui profert de thesauro suo nova & vetera* , qui seruent au reglement des mœurs , de la police & de toutes les parties de la vie & de la mort , ce qu'estant desployé en son temps & à propos , apporte avec plaisir vne grande beauté & vtilité , *mala aurea in lectis argenteis verba in tempore suo*. La bouche du meschant c'est vn trou puant & pestilentieux , la langue mesdisante , meurtriere de l'honneur d'autrui , c'est vne mer & vniuersité de maux , pire que le fer , le feu , la poison , la mort , l'enfer. *Vniuersitas iniquitatis , malum inquietum , venenum mortiferum , ignis incendens omnia , mors illius nequissima , utilis potius infernus quam illa*.

Or ces deux, l'ouye & la parole se respondent & rapportent l'une à l'autre, ont vn grand coufinage ensemble, l'un n'est rien sans l'autre, comme aussi par nature, en vn mesme subiect l'un n'est pas sans l'autre. Ce sont les deux grandes portes par lesquelles l'ame faict tout son traffic & a intelligence par tout, par ces deux les ames se versent les unes dedans les autres, comme les vaisseaux en appliquant la bouche de l'un à l'entrée de l'autre. Que si ces deux portes sont closes comme aux sourds & muets l'esprit demeure solitaire & miserable : l'ouye est la porte pour entrer, par icelle l'esprit reçoit toutes choses de dehors & conçoit comme la femelle ; la parole est la porte pour sortir ; par icelle l'esprit agist & produit comme masse. Par la communication de ces deux, comme par le choc & heurt roide des pierres & fers, fort & faille le feu sacré de verité. Car se frottans & limans l'un contre l'autre, ils se defroüillent, se purifient & s'esclarcissent & toute cognoissance vient à perfection : mais l'ouye est la premiere, car il ne peut rien sortir de l'ame qu'il ne soit entré deuant, donc tout sourd de nature est aussi muet ; il faut premierement que l'esprit se meuble & se garnisse par l'ouye, pour puis distribuer par la parole, dont le bien & le mal de la parole, & presque de tout l'homme, dépend de l'ouye ; qui bien

oyt bien parle, & qui mal oyt mal parle, de l'usage & regle de la parole cy apres.

CHAPITRE XIV.

Vestemens du corps.

IL y a grande apparence que la façon d'aller tout nud, tenuë encores par vne grande partie du monde, soit l'originelle des hommes, & l'autre de se vestir artificielle & inuentée pour esteindre la nature, comme ceux qui par artificielle lumiere veulent esteindre celle du jour. Car ayant nature suffisamment pourueu par tout toutes les autres creatures, de couuerture, il n'est pas à croire qu'elle aye pirement traitté l'homme, & l'aye laissé seul indigent & en estat qu'il ne se puisse maintenir sans secours estranger : & sont des reproches iniustes que l'on fait à nature comme marastre, ainsi qu'a esté dict cy dessus. Si originellement les hommes eussent esté vestus, il n'est pas vraysemblable qu'ils se fussent aduisés de se despouiller & mettre tous nuds, tant à cause de la santé qui eust esté extremement offensée en ce changement, que pour la honte : & toutesfois il se fait & garde par plusieurs nations, & ne faut alle-

guer que c'est pour cacher les parties honteuses & contre le froid (ce font les deux raisons pretendues , contre le chaud il n'y a point d'apparence) car nature ne nous a point appris y avoir des parties honteuses , c'est nous mesmes qui par nostre faute nous nous le disons , & nature les a desia assez cachées , mis loin des yeux & couuert , & au pis aller ne faudroit courir que ces parties là seulement , comme font aucuns en ces pays tous nuds , où d'ordinaire ils ne les courent pas , & qu'est cela que l'homme n'osant se montrer nud au monde , luy qui fait le maistre , se cache sous la despouille d'autrui , voire s'empare . Quant au froid & autres necessités particulieres & locales , nous scauons que sous mesme air , mesme ciel , on va nud & habillé , & nous auons bien la plus delicate partie de nous toute descouverte ; dont vn gueur interrogé comme il pouuoit aller ainsi nud en hyuer , respondit que nous portons bien la face nue , que luy estoit tout face , & plusieurs grands alloient tousiours teste nue , Massinissa , Cesar , Annibal , Seuerus , & y a plusieurs nations qui viuans tous nuds , aussi vont à la guerre & combattent tous nuds ; le conseil de Platon pour la santé est de ne courir la teste ny les pieds . Et Varron dict que quand il fut ordonné de descouvrir la teste en la presence des Dieux & du Magistrat ,

ce fut, plus pour la santé, & s'endurcir aux iniures du temps, que pour la reuerence. Au reste l'inuention des couuers & maisons contre les iniures du ciel & des hommes, est bien plus ancienne, plus naturelle & uniuerselle que des vestemens, & commune avec plusieurs bestes, mais la recherche des alimens marche bien encores deuant. De l'vsage des vestemens comme des alimens cy après.

CHAPITRE XV.

De l'ame humaine en general.

VOICX vne matiere difficile sur toutes, traitée & agitée par les plus sçauans & sages, mais avec vne grande diuersité d'opinions, selon les diuerses nations, religions, professions, & raisons, sans accord & resolution certaine. Les principaux poincts sont de l'origine & de la fin des ames, leur entrée & sortie des corps, d'où elles viennent quand elles y entrent, & où elles vont quand elles en sortent, de leur nature, estat, action, & s'il y en a plusieurs en l'homme ou vne seule.

De l'origine des ames humaines, il y a de tout temps eu tres-grande dispute & diuersité d'opinions entre les Philosopher & les Theo-

logiens : il y a eu quatre opinions celebres ,
selon la premiere qui est des Stoiciens , tenue
par Philon Juif , puis par les Manicheens ; elles
sont extraites & produictes comme pareilles de
la substance de Dieu , qui les inspire aux corps :
La seconde d'Aristote tenue par Testulien ,
Apollinaris , les Luciferiens & autres Chre-
tiens , dict qu'elles viennent & deriuent des
ames des parens avec la semence , ainsi que les
corps à la façon des amas brutales , vegetatiues
& sensitiues. La troisieme des Pythagoriciens &
Platoniciens , tenue par plusieurs Rabins &
Docteurs Juifs , puis par Origene & autres Doc-
teurs Chrétiens , dict qu'elles ont esté du
commencement toutes créées de Dieu , faictes
de rien , & reformées au ciel , puis enuoyées
loynhas , selon qu'il est besoin aux corps
formés & disposés à les recevoir. La qua-
triesme reçue en la Chrestienté , est qu'elles
sont créées de Dieu & infusées aux corps pre-
parés , tellement que la creation & infusion
se fasse en mesme instant. Ces quatre opi-
nions sont affirmatiues car il y en a vne
cinqiesme plus retenue qui ne definit rien ,
& se contente de dire que c'est vne chose se-
crétée & incogneue aux hommes , de laquelle
opinion ont esté SS. Augustin , Gregoire de
Nice & autres , qui toutesfois ont trouué les
deux dernieres affirmatiues , plus raysembra-
bles que les deux premieres.

Le siege de l'ame raisonnable , *ubi sedet pro tribunali* , c'est le cerveau & non pas le cœur , comme auant Platon & Hippocrates , l'on auoit pensé communément , car le cœur a sentiment & n'est capable de sapience. Or le cerueau qui est beaucoup plus grand en l'homme qu'à tous autres animaux pour estre bien fait & disposé , afin que l'ame raisonnable agisse bien , doit approcher de la forme d'en nature & n'estre point rond , ny par trop grand , ou par trop petit ; bien que le plus grand soit moins vitieux , composé de substance & de parties subtiles , delicates & delisées , bien jointes & vnies sans separation ny entre-deux , ayant quatre petits creux ou ventres , dont les trois sont au milieu rangés de front & collateraux entr'eux , & derrière ceux tirant au derriere de la teste , le quatriesme seul , auquel se fait la preparation & conjunction des esprits vitaux , pour estre puis faits animaux , & portés aux trois creux de deuant , ausquels l'ame raisonnable fait & exerce ses facultés qui sont trois , entendement , mémoire ; imagination ; lesquelles ne s'exercent point separément & distinctement , chacune en chacun creux ou ventre , comme aucuns vulgairement ont pensé. Mais communément & par ensemble toutes trois en tous trois & chacun d'eux , à la façon des sens externes qui sont doubles , & ont deux creux , en chacun desquels le sens s'exerce tout entier :

d'où

d'où vient que celuy qui est blessé en l'un ou deux de ces trois ventres , comme le paralytique , ne laisse pas d'exercer toutes les trois , bien que plus foiblement , ce qu'il ne feroit , si chacune faculté auoit son creux à part.

Aucuns ont pensé que l'ame raisonnable n'estoit point organique , & n'auoit besoin pour faire les fonctions d'aucun instrument corporel , pensant par là bien prouuer l'immortalité de l'ame : mais sans entrer en un labyrinthe de discours , l'experience oculaire & ordinaire dément ceste opinion , & conuainq du contraire : car l'on fait que tous hommes n'entendent ny ne raisonnent de mesmes & esgalement , ains avec tres-grande diuersité : & vn mesme homme aussi change , & en vn temps raisonne mieux qu'en vn autre , en vn aage , en un estat & certaine disposition qu'en vn autre ; tel mieux en santé qu'en maladie ; & tel autre mieux en maladie qu'en santé. Vn mesme en vn temps preuaudra en iugement , & sera foible en imagination : d'où peuuent venir toutes ces diuersités & changemens , sinon l'organe & instrument changeant d'estat ? Et d'où vient que l'yurognerie , la morsure du chien enragé , vne fieure ardente , vn coup en teste , vne fumée montant de l'estomach , & autres accidens feront culbutter & renuerferont entierement le iugement , tout l'esprit intellectuel , & toute la sagesse de Grece , voir contraindrons l'ame

de desloger du corps ? Ces accidens purement corporels ne peuuent toucher ny arriuier à ceste haute faculté spirituelle de l'ame raisonnable , mais seulement aux organes & instrumens , lesquels estans detraqués & desbauchés , l'ame ne peut bien & reglement agir , & estans par trop forcés & violentés est contraincte de s'absenter & s'en aller. Au reste se seruir d'instrument ne preiudicie point à l'immortalité , car Dieu s'en sert bien , & y accommode ses actions : & comme selon la diversité de l'air , region & climat , Dieu produiët hommes fort diuers en esprit & suffisance naturelle , car en Grece & en Italie , il les produit bien plus ingenieux qu'en Moscouie & Tartarie : aussi l'esprit selon la diversité des dispositions organiques , des instrumens corporels , raisonne mieux ou moins. Or l'instrument de l'ame raisonnable c'est le cerueau , & le temperament d'iceluy , duquel nous auons à parler.

Temperament est la mixtion & proportion des quatre premieres qualités , chaud , froid , sec & humide , ou bien vne cinquieme , & comme l'harmonie resultante de ces quatre : or du temperament du cerueau vient & depend tout l'estat & l'action de l'ame raisonnable : mais ce qui cause & apporte vne grande misere à l'homme , est que les trois facultés de l'ame raisonnable, entendement , memoire , imagination, requierent, & s'exercent par temperament

contraire. Le temperament de l'entendement est sec, d'où vient que les aduancés en aage preualent en entendement par deffus les jeunes, d'autant que le cerueau s'effuye, & s'affeche tousiours plus: aussi les melancoliques secs, les affligés, indigens, & qui sont à jeun (car la tristesse & le ieusne deffeichent) sont prudens & ingenieux, *splendor ficcus animus sapientissimus: vexatio dat intellectum*. Et les bestes de temperament plus sec comme fourmis, abeilles, elephans, sont prudentes & ingenieuses (comme les humides, tesmoin le pourceau, sont stupides, sans esprit) & les méridionaux, secs & moderés en chaleur interne du cerueau, à cause du violent chaud externe. Le temperament de la memoire est humide, d'où vient que les enfans l'ont meilleure que les vieillards, & le matin après l'humidité acquise par le dormir de la nuit, plus propre à la memoire, laquelle est aussi plus vigoureuse aux Septentrionaux: l'entens icy une humidité non aqueuse, coulante, en laquelle ne se puisse tenir aucune impression, mais aerée, gluante, grasse & huileuse, qui facilement reçoit & retient fort, comme se void aux peintures faictes en huile. Le temperament de l'imagination est chaud, d'où vient que les Phrenetiques, Maniacles & malades de maladies ardentes, sont excellens en ce qui est de l'imagination, poésie, diuination, & qu'elle est forte en la jeunesse & adolescence (les Poëtes &

Prophetes ont fleuri en cest aage) & aux lieux mitoyens entre Septentrion & Midy.

De la diuersité des temperamens il aduient que l'on peut estre mediocre en toutes les trois facultés, mais non pas excellent, & que qui est excellent en l'une des trois, est foible des autres. Que les temperamens de la memoire & l'entendement soyent fort differens & contraires, cela est clair, comme le sec & l'humide: de l'imagination qu'il soit contraire aux autres il ne le semble pas tant, car la chaleur n'est pas incompatible avec le sec & l'humide: & toutesfois l'experience monstre que les excellens en l'imagination sont malades en l'entendement & memoire, & tenus pour fols & furieux: mais cela vient que la chaleur grande qui sert à l'imagination, consomme & l'humidité qui sert à la memoire, & la subtilité des esprits & figures, qui doit estre en la secheresse qui sert à l'entendement, & ainsi est contraire & destruit les autres deux.

De tout cecy il est euident qu'il n'y a que trois principaux temperamens, qui seruent & font agir l'ame raisonnable, & distinguent les esprits, sçauoir le chaud, le sec & l'humide: le froid ne vaut rien, n'est point actif & ne sert qu'à empescher tous les mouuemens & fonctions de l'ame: & quand il se lit souuent aux auteurs que le froid sert à l'entendement, que les froids de cerueau, comme

les melancholiques & les meridionaux , sont prudens , sages , ingenieux ; là le froid se prend non simplement , mais pour vne grande moderation de chaleur : car il n'y a rien plus contraire à l'entendement & sagesse , que la grande chaleur , laquelle au contraire sert à l'imagination : & selon les trois temperamens , il y a trois facultés de l'ame raisonnable : mais comme les temperamens , aussi les facultés reçoivent diuers degres, subdiuisions & distinctions.

Il y a trois principaux offices & differences d'entendement , inferer , distinguer , eslire : les sciences qui appartiennent à l'entendement sont la Theologie scholastique , la Theorique de medecine , la Dialectique , la Philosophie naturelle & morale. Il y a trois sortes de differences de memoire , recevoir , & perdre facilement les figures , recevoir facilement & difficilement perdre : les sciences de la memoire sont la Grammaire , Theorique de Jurisprudence & Theologie positive , Cosmographie , Arithmetique.

De l'imagination y a plusieurs differences & en beaucoup plus grand nombre que de la memoire & de l'entendement : à elle appartiennent proprement les inuentions , les faccies & brocards , les poinctes & subtilités , les fictions & mensonges , les figures & comparaisons , la propriété , netteté , elegance , gentillesse. Parquoy appartiennent à elle la

poësie , l'eloquence , musique & generalement tout ce qui consiste en figure, correspondance , harmonie , & proportion.

De tout cecy appert que la viuacité , subtilité , promptitude , & ce que le commun appelle esprit , est à l'imagination chaude : La solidité , maturité , verité est à l'entendement sec : L'imagination est actiue , bruyante ; c'est elle qui remue tout & met tous les autres en besongne : L'entendement est action morne & sombre : la memoire est purement passiue & voicy comment : l'imagination premierement recueille les especes & figures des choses tant presentes par le service des cinq sens , qu'absentes par le benefice du sens commun , puis les represente , si elle veut , à l'entendement qui les considere , examine , cuit & iuge : puis elle mesme les met en depost & conserue en la memoire , comme l'escruiain au papier pour derechef , quand besoin sera , les en tirer & extraire (ce que l'on appelle reminiscence) ou bien si elle veut les recommande à la memoire , auant les presenter à l'entendement. Parquoy recueillir , presenter à l'entendement , mettre en la memoire , & les extraire , sont tous œuures de l'imagination. Et ainsi à elle appartient le sens commun , la reminiscence , & ne sont point puissances separées d'elle , comme aucuns veulent , pour faire plus de trois facultés de l'ame raisonnable.

Le vulgaire , qui ne iuge jamais bien , estime & faict plus de feste de la memoire , que des deux autres , pource qu'elle en compte fort , a plus de monstre & faict plus de bruiet en public , & pense que pour auoir bonne memoire l'on est fort sçauant , & estime plus la sçience que la sagesse , c'est toutesfois la moindre des trois , qui peust estre avec la folie & l'impertinence : mais tres-rarement elle excelle avec l'entendement & sagesse , car leurs temperamens sont contraires. De cette erreur populaire est venuë la mauuaise instruction de la ieunesse , qui se voit par tout. Ils sont tousiours apres à lui faire apprendre par cœur (ainsi parlent-ils) ce que les liures disent , afin de les pouuoir alleguer , & à luy remplir & charger la memoire du bien d'autrui & ne se soucient de luy reueiller & esguïser l'entendement , & former le iugement , pour luy faire valoir son propre bien & ses facultés naturelles, pour le faire sage & habille à toutes choses. Aussi voyons nous que les plus sçauants qui ont tout Aristote & Ciceron en la teste , sont plus sots & plus ineptes aux affaires , & que le monde est mené & gouuerné par ceux qui n'en sçavent rien. Par l'advis de tous les sages l'entendement est le premier , la plus excellente & principale piece du harnois. Si elle joue bien , tout va bien & l'homme est sage , & au rebours si elle se

mesconte , tout va de trauers , en second lieu l'imagination ; la memoire est la derniere.

Toutes ces differences s'entendront , peut-estre , encore mieux par cette similitude qui est vne peinture ou imitation de l'ame raisonnable. En toute cour de justice y a trois ordres & estages , le plus haut des iuges , auquel y a-peu de bruiet mais grande action , car sans s'esmouuoir & agiter , ils jugent , decident , ordonnent , determinent de toutes choses ; c'est l'image du jugement , plus haute partie de l'ame : Le second des aduocats & procureurs , auquel y a grande agitation & bruiet sans action : car ils ne peuvent rien vider ny ordonner , seulement secouër les affaires , c'est la peinture de l'imagination , faculté remuante , inquiete , qui ne s'arreste jamais , non pas pour le dormir profond , & faict vn bruiet au cerueau comme vn pot qui boult , mais qui ne resoult & n'arreste rien. Le troisieme & dernier estage est du greffe & registre de la cour , où n'y a bruiet ny action , c'est vne pure passion , vn gardoir & reseruoir de toutes choses , qui represente bien la memoire.

L'ame qui est la nature & la forme de tout animal , est de soy toute sçauante sans estre apprinse ; & ne faut point à produire ce qu'elle sçait , & bien exercer ses fonctions , comme il faut , si elle n'est empeschée , & moyennant

que ses instrumens soient bien disposés ; dont a esté bien & vrayement dict par les Sages, que nature est sage, sçauante, industrieuse, & rend habile à toutes choses, ce qui est aisé à monstrier par induction. L'ame vegetatiue de soy sans instruction, forme le corps en la matrice tant excellement, puis le nourrist & le fait croistre, attirant la viande, la retenant & cuyfant, & reiettant les excremens, elle r'engendre & refait les parties qui defaillent; ce sont choses qui se voyent aux plantes, bestes, & en l'homme. La sensitiue de soy sans instruction fait aux bestes & en l'homme remuer les pieds, les mains, & autres membres, les gratter, frotter, secouer, tetter, demener les leures, plorer, rire. La raisonnable de mesmes, non selon l'opinion de Platon, par reminiscence de ce qu'elle sçauoit auant entrer au corps, comme si elle estoit plus aagée que le corps; ny selon Aristote par reception & acquisition venant dehors par les sens, estant de soy vne carte blanche & vuide: mais de soy & sans instruction imagine, entend, retient, raisonne, & discourt. Et pource que ceste proposition semble plus difficile à croire de la raisonnable que des autres, elle se prouue premierement par le dire des plus grands Philosophes, qui tous ont dict que les semences des grandes vertus & sciences, estoient esparées naturellement en l'ame: Puis

par raison tirée de l'expérience , les bestes raisonnent , discourent , font plusieurs choses de prudence & d'entendement , comme il a esté bien prouué cy dessus. Ce qu'aduoüant mesmes Aristote a rendu la nature des bestes plus excellente que l'humaine , laquelle il faict vuide & & ignorante du tout : mais les ignorants appellent cela instinct naturel , qui ne sont que des mots en l'air , car apres il ne sçauent declarer qu'est-ce qu'instinct naturel : les hommes melancoliques , maniaques , Phrenetiques & atteints de certaines maladies qu'Hippocrates appelle diuines , sans l'auoir appris parlent latin , font des vers , discourent prudemment & hautement , deuinent les choses secretes & à venir (lesquelles choses les sots ignorants attribueront au diable ou esprit familier) bien qu'ils fussent auparauant idiots & rustiques , & qui depuis sont retournés tels apres la guarison. Item y a des enfants qui bien tost apres estre nays , ont parlé , comme ceux qui sont venus de parens vieux : d'où ont ils appris & tiré tout cela , tant les bestes que les hommes ?

Si toute science venoit , comme veut Aristote des sens , il s'ensuiuroit que ceux qui ont les sens plus entiers & plus vifs , seroient plus ingenieux & plus sçauants , & se voit le contraire souuent , qu'ils ont l'esprit plus lourd & sont plus mal habiles , & plusieurs se

sont priués à escient de l'vsage d'iceux, afin que l'ame fist mieux, & plus librement ses affaires. Et seroit chose honteuse & absurde, que l'ame tant haute & diuine questast son bien des choses si viles & caduques, comme les sens : car c'est au rebours que les sens ont tout de l'ame, & sans elle ne font & ne peuvent rien : & puis enfin que peuvent apercevoir les sens sinon les accidents & superficies des choses? Car les natures, formes, les thresors & secrets de nature nullement.

Mais on demandera donc pourquoy ces choses ne se font elles tousiours par l'ame? Pourquoy ne faict elle en tout temps ses propres fonctions, & que plus foiblement & plus mal elle les faict en vn temps qu'autre? L'ame raisonnable agit plus foiblement en la ieunesse qu'en la vieillesse : & au contraire la vegetatiue forte & vigoureuse en la ieunesse, est foible en la vieillesse, en laquelle elle ne peult refaire les dents tombées comme en la ieunesse. La raisonnable faict en certaines maladies ce qu'elle ne peut en santé, & au rebours en santé ce qu'elle ne peut en maladie. A quoi pour tout la responce (touchée cy dessus) est que les instrumens desquels l'ame a besoin pour agir, ne sont ny ne peuvent tousiours estre disposés comm'il faut pour exercer toutes fonctions, & faire tous effects, voire ils sont contraires, & s'entr'empeschent, & pour le

dire plus court & plus clairement , c'est que le temperament du cerueau , duquel a esté tant parlé cy deffus , par lequel & selon lequel l'ame agit , est diuers & changeant , & estant bon pour vne fonction d'ame , est contraire à l'autre : estant chaud & humide en la jeunesse est bon pour la vegetatiue , & mal pour la raisonnable ; & au contraire froid & sec en la vieillesse , est bon pour la raisonnable , mal pour la vegetatiue : Par maladie ardente fort eschauffé & subtilisé est propre à l'inuention & diuination , mais impropre à maturité & solidité de jugement & sagesse.

De l'vnité & singularité ou pluralité des ames en l'homme les opinions & raisons sont fort diuerses entre les Sages. Qu'il y en aye trois essentiellement distinctes , c'est l'opinion des *Ægiptiens* , & d'aucuns Grecs , comme *Platoniciens* : Mais c'est chose estrange qu'une mesme chose aye plusieurs formes essentielles. Que les ames soient singulieres & à chacun homme la sienne : c'est l'opinion de plusieurs , contre laquelle l'on diét qu'il faudroit ou qu'elle fust toute mortelle , ou bien en partie mortelle en la vegetatiue & sensitiue , & en partie immortelle en la raisonnable , & ainsi seroit diuisible. Qu'il n'y en aye qu'une seule raisonnable generalement de tous hommes , c'est l'opinion des Arabes , venue de *Themistius Grec* , mais refutée par plusieurs : La plus

commune opinion est qu'il n'y en a en chacun homme qu'une en substance, cause de la vie & de toutes les actions : laquelle est toute en tout, & en chaque partie : mais elle est garnie & enrichie d'un tres-grand nombre de diuerses facultés & puissances, merueilleusement differentes, voire contraires les vnes aux autres, selon la diuersité des vaisseaux & instrumens où elle est retenue, & des objects qui luy sont proposés. Elle exerce l'ame sensitive & raisonnable au cerueau, la vitale & irascible au cœur, la naturelle, vegetative & concupiscible au foye, la genitale aux genitalaires ; ce sont les principales & capitales, ne plus ne moins que le soleil un en son essence, despartant ses rayons en diuers endroits eschauffe en un lieu, esclaire en un autre, foud la cire, seiche la terre, blanchist la neige, nourrist la peau, dissipe les nuées, tarist les estangs : mais quand & comment : si toute entiere & en un coup, ou si successivement elle arriue au corps, c'est une question. La commune opinion venue d'Aristote est que l'ame vegetative & sensitive qui est toute materielle & corporelle, est en la semence, & avec elle descendue des parents, laquelle conforme le corps en la matrice, & iceluy faict, arriue la raisonnable de dehors ; & que pour cela il n'y a deux ni trois ames, ny ensemble ny successivement, & ne se corrompt la vege-

tative par l'arriué de la sensitive, ny la sensitive par l'arriué de la raisonnable : Ce n'est qu'une qui se fait, s'acheue, & se parfait avec le tems & par degrés, comme la forme artificielle de l'homme, qui se peindroit par pieces l'une apres l'autre, la teste, puis la gorge, le ventre &c. Autres veulent qu'elle y entre toute entière avec toutes ses facultés en un coup, sçavoir lors que le corps est tout organisé, formé & tout acheué d'estre fait, & qu'auparavant n'y a eu aucune ame, mais seulement une vertu & energie naturelle, forme essentielle de la semence, laquelle agissant par les esprits qui sont en la dicte semence, comme par instruments, forme & bastist le corps, & agence tous les membres : ce qu'estant fait ceste energie s'esvanouist & se perd, & par ainsi la semence cesse d'estre semence, perdant sa forme par l'arriué d'un autre plus noble qui est l'ame humaine : laquelle fait que ce qui estoit semence, est maintenant homme.

L'immortalité de l'ame est la chose la plus uniuersellement, religieusement, & plausiblement receüe par tout le monde (i'entends d'une externe & publique profession, d'une interne, serieuse & vraye creance, dequoy sera parlé cy apres) la plus utilement creüe, la plus foiblement prouée & establee par raisons & moyens humains. Il semble y auoir une incli-

nation & disposition de nature à la croire , car l'homme desire naturellement allonger & perpetuer son estre , d'où vient aussi ce grand & furieux soin & amour de nostre posterité & succession. Puis deux choses seruent à la faire valoir & rendre plausible , l'vne est l'esperance de gloire & reputation , & le desir de l'immortalité du nom , qui tout vain qu'il est , a vn merueilleux credit au monde : l'autre est l'impression , que les vices qui se desrobent de la veuë & cognoissance de l'humaine justice , demeurent tousiours en butte à la diuine , qui les chastiera , voire apres la mort.

CHAPITRE XVI.

Des parties de l'ame humaine , & premierement de l'entendement , plus haute & noble partie d'icelle , imagination , raison , discours , esprit , jugement , volonté , de la verité , & de l'invention.

C'EST vn fonds d'obscurité plein de creux & de cachots , vn labyrinthe , vn abisme confus & bien entortillé , que cet esprit humain : c'est l'œconomie de ceste grande & haute partie intellectuelle de l'ame , où y a tant de pieces , facultés , actions , & mouuements diuers , dont y a aussi tant de noms , & s'y tournent

tant de difficultés, objections, & de doubtes.

Cet entendement (ainsi l'appellerons nous d'un nom general) *intellectus, mens, nous*, est vn subject general, ouuert, & disposé à receuoir & embrasser toutes choses, comme la matiere premiere, & le miroir toutes formes, *intellectus est omnia*. Il est capable d'entendre toutes choses, mais soy mesme, ou point, (tesmoin vne si grande & presque infinie diuersité d'opinions d'iceluy, de doutes & objections qui croissent tous les jours) ou bien sombrement, indirectement, & par reflexion de la cognoissance des choses à soy mesme, par laquelle il sent & cognoit qu'il entend, & a puissance & faculté d'entendre, c'est la maniere que les esprits se cognoissent eux mesmes.

Son premier office qui est de receuoir simplement, & apprehender les images & especes des choses, qui est vne passion & impression en l'ame, causée par l'object & presence d'icelles, c'est imagination & apprehension.

La force & puissance de paistrir, traiter & agiter, cuire & digerer les choses receuës par l'imagination, c'est raison, *logos*.

L'action & l'office, ou exercice de cette force & puissance qui est d'assembler, conjoindre, separer, diuiser les choses receuës, & y en adjouster encores d'autres, c'est discours, ratiocination *logismo, dianois, quasi dia noun*.

La facilité subtile , & alaigne promptitude à faire toutes ces choses , & penetrer auant en icelles , s'appelle Esprit , *ingenium* , donc les ingenieux , aigus , subtils , pointus , c'est tout vn.

La repetition , & ceste action de ruminer , recuire , repasser par l'estamine de la raison , & encores plus elabourer , pour en faire vne resolution plus solide , c'est le jugement.

L'effect enfin de l'entendement , c'est la cognoissance , intelligence , resolution.

L'action qui suit cette cognoissance & resolution , qui est à s'estendre , pousser & aduancer à la chose cogneuë , c'est volonté , *intellectus extensus & promotus*.

Parquoy toutes ces choses , entendement , imagination , raison , discours , esprit , jugement , intelligence , volonté sont vne meisme en essence , mais toutes diuerfes en action , tesmoin qu'un est excellent en l'une d'icelles , & foible en l'autre : souuent qui excelle en esprit & subtilité , est moindre en jugement & solidité.

Le n'empesche pas que l'on ne chante les loüanges & grandeurs de l'esprit humain , de sa capacité , viuacité , vitesse : je consents que l'on l'appelle image de Dieu viue , vn degoust de l'immortelle substance , vne fluxion de la diuinité , vn esclair celeste , auquel Dieu a donné la raison comm' vn timon animé pour

le mouuoir avec reigle & mesure , & que ce soit vn instrument d'une complete harmonie , que par luy y a parentage entre Dieu & l'homme , & que pour le luy ramenteuoir il luy a tourné les racines vers le ciel , afin qu'il eust tousiours sa veuë vers le lieu de sa naissance. Bref qu'il n'y a rien de grand en la terre que l'homme , rien de grand en l'homme que l'esprit , si l'on monte jusques là , l'on monte au dessus du ciel : ce sont tous mots plaüsibles dont retentissent les escholes & les chaires ,

Mais ie desire qu'apres tout cela , l'on vienne à bien sonder & estudier à cognoistre cet esprit , car nous trouuerons qu'apres tout , c'est & à foy & à autrui vn tres-dangereux outil , vn furet qui est à craindre , vn petit broüillon & trouble feste , vn esmerillon fascheux & importun , & qui comm' vn affronteur & joüeur de passe passe , sous ombre de quelque gentil mouuement subtil & gaillard , forge , inuente & cause tous les maux du monde , & n'y en a que par luy.

Il y a beaucoup plus grande diuersité d'esprits que de corps , aussi y a-il plus grand chaud , plus de pieces & plus de façon : nous en pouons faire trois classes , dont chacune a encores plusieurs degrés : en celle d'en bas sont les petits , foibles & comme brutaux , tous voisins des bestes , soit que cela aduienne de la premiere trempe , c'est à dire de la se-

mence & temperament du cerueau trop froid & humide, comme entre les bestes les poissons sont infimes, ou pour n'auoir esté aucunement remués & reueillés, mais abandonnés à la rouille & stupidité : de ceux là n'en faut faire mise ny recepte, & ne s'en peust dresser ny establir vne compagnie constante. Car ils ne peuuent pas seulement suffire pour eux mesmes en leur particulier, & faut qu'ils soyent tousiours en la naturelle d'autrui, c'est le commun & bas peuple, *qui vigilans stertit, mortua cui vita est, prope iam vivo atque videnti*, qui ne se sent, ne se juge. En celle d'en haut sont les grands & tres-rares esprits plustost demons qu'hommes communs, esprits bien nés, forts & vigoureux : De ceux icy ne s'en pourroit bastir en tous les siecles vne republique entiere. En celle du milieu sont tous les mediocres, qui sont en infinité de degrés : de ceux cy est composé presque tout le monde (de ceste distinction & autres cy apres plus au long). Mais il nous faut toucher plus particulièrement les conditions & le naturel de cest esprit, autant difficile à cognoistre, comme vn visage à peindre au vif lequel sans cesse se remueroit.

Premierement c'est vn agent perpetuel, l'esprit ne peust estre sans agir, il se forge plustost des subjects faux & fantastiques, se pipant à son escient, & allant contre sa propre creance, que d'estre sans agir. Comme les terres oyisues

si elles sont grasses & fertiles foisonnent en mille sortes d'herbes sauvages & inutiles , & les faut assubjectir à certaines semences , & les femmes seules produisent des amas & pieces de chair informes , ainsi l'esprit si l'on ne l'occupe à certain subject , il se débande & se jette dedans la vague des imaginations , & n'est folie ny refuerie qu'il ne produise , s'il n'a de but establi , il se perd & s'esgare , car estre par tout , c'est n'estre en aucun lieu : l'agitation est vrayement la vie de l'esprit , & sa grace , mais elle doit venir d'ailleurs que de soy : s'il va tout seul , il ne fait que trainer & languir , & ne doit estre violenté ; car cette trop grande contention d'esprit trop bandé , tendu & pressé , le rompt & le trouble.

Il est aussi vniuersel qui se mesle par tout , il n'a point de subject ny de ressort limité , il n'y a chose où il ne puisse iouer son roolle aussi bien aux subjects vains & de neant , comm'aux nobles & de poids , & en ceux que nous pouuons entendre que ceux que nous n'entendons : car recognoistre que l'on ne le peut entendre ny penetrer au dedans , & qu'il faut demeurer au bort & à l'escorce , c'est tres-beau trait de jugement , la science voire la verité peuvent loger chés nous sans jugement , & le jugement sans elles , voire recognoistre son ignorance , c'est vn beau tesmoignage de jugement.

Tiercement il est prompt & soudain courant en vn moment d'un bout du monde à l'autre, sans arrest, sans repos, s'agitant, penetrant & perçant par tout, *Mobilis & inquieta mens homini data est : nunquam se tenet spargitur vaga, quietis impatiens, nouitate rerum latissima, non mirum, ex illo cœlesti spiritu descendi. Cœlestium autem natura semper in motu est.* Cette si grande soudaineté & vitesse, cette poincte & agilité est d'une part admirable & des plus grandes merueilles qui soyent en l'esprit, mais c'est d'ailleurs chose tres-dangereuse, vne grande disposition & propension à la folie & manie, comme se dira tantost.

Pour ces trois conditions, d'agent perpetuel sans repos, vniuersel, si prompt & soudain, il a esté estimé immortel, & auoir en soy quelque marque & estincelle de diuinité.

Or son action est tousiours quester, fureter, tourner sans cesse comme affamé de sçauoir, enquerir & rechercher, ainsi appelle Homere les hommes *alphestas*. Il n'y a point de fin en nos inquisitions : les poursuittes de l'esprit humain sont sans terme, sans forme : son aliment est doute, ambiguité, c'est vn mouuement perpetuel sans arrest & sans but : le monde est vne escole d'inquisition ; l'agitation & la chasse est proprement de nostre gibier : prendre ou faillir à la prinse c'est autre chose.

Mais il agit & pousuit ses entreprinſes

la mort de son fils , car c'estoient larmes inutiles & impuissantes , c'est pour cela dict il qu'elles sont plus justes & que i'ay raison de plorer. La femme de Socrates redoubloit son dueil , de ce que les juges le faisoient mourir iniustement ; comment feist-il , aymerois tu mieux que ce fust justement ? Il n'y a aucun bien , dict vn sage , sinon celuy à la perte duquel l'on est préparé , *in æquo enim est dolor amissæ rei & timor amittendæ*. Au rebours , dict l'autre , nous ferrons & embrassons le bien , d'autant plus estroit & avec plus d'affection , que nous le voyons moins seur , & craignons qu'il nous soit osté. Vn philosophe Cynique demandoit à Antigonus vne dragme d'argent , ce n'est pas present de Roy , respondit il : donne moy donc vn talent , dict le philosophe , ce n'est pas present pour vn Cynique. Quelqu'un disoit d'un Roy de Sparte fort clement & debonnaire , il est fort bon , car il l'est mesmes aux meschans : comment seroit il bon , dict l'autre , puis qu'il n'est pas mauuais aux meschans ? Voila comme la raison humaine est à tous vsages : vn glaiue double , vn baston à deux bouts , *ogni medaglia ha il suo riuerso* : Il n'y a raison qui n'en aye vne contraire , dit la plus saine & plus seure philosophie : ce qui se monstreroit par tout qui voudroit. Or ceste grande volubilité & flexibilité vient de plusieurs causes , de la perpetuelle alteration & mouuement du corps , qui

jamais n'est deux fois en la vie en mesme estat.
Des objects qui sont infinis , de l'air mesmes
& serenité du ciel ,

*Tales sunt hominum mentes quali pater ipse
Juppiter auſtifer a luſtravit lampade terras ,*

& de toutes choses externes : Internement
des secouſſes & branſles que l'ame ſe donne
elle meſme par ſon agitation , & meuë , par
ſes propres paſſions , auſſi qu'elle regarde les
choses par diuers viſages , car tout ce qui eſt
au monde a diuers luſtres & diuerſes conſide-
rations , c'eſt vn pot à deux anſes , diſoit Epic-
tete ; il euſt mieux dict à pluſieurs.

Il aduient de là qu'il ſ'empeſtre en ſa be-
ſoigne , comme les vers de ſoye , il ſ'embar-
que , car comme il penſe remarquer de loin ,
ie ne ſçay quelle apparence de clarté & verité
imaginaire , & y veut courir , voicy tant de
difficultés qui lui trauerſent la voye , tant de
nouuelles queſtes l'eſgarent & l'enyurent.

• Sa fin à laquelle il viſe eſt double , l'vne
plus commune & naturelle eſt la verité où tend
ſa queſte & ſa pourſuite. Il n'eſt deſir plus na-
turel , que de cognoiſtre la verité. Nous
eſſayons tous les moyens que nous penſons y
pouuoir ſeruir : mais enfin tous nos efforts
ſont courts , car la verité n'eſt pas un acqueſt ,
ni choſe qui ſe laiſſe prendre & manier , &
encores moins poſſeder à l'eſprit humain. Elle
loge

loge dedans le sein de Dieu ; c'est là son giste & sa retraicte : l'homme ne sçait & n'entend rien à droict , au pur & au vray comm' il faut, tournoyant tousiours & tastonnant à l'entour des apparences , qui se trouuent par tout aussi bien au faux qu'au vray ; nous sommes nais à quester la verité : la posseder appartient à vne plus haute & grande puissance. Ce n'est pas à qui mettra dedans ; mais à qui fera de plus belles courses. Quand il aduiendrait que quelque verité se rencontrast entre ses mains , ce seroit par hazard , il ne la sçauroit tenir , posseder ny distinguer du mensonge. Les erreurs se reçoient en nostre ame , par mesme voye & conduicte que la verité ; l'esprit n'a pas dequoy les distinguer & choisir : autant peut faire le sot celuy qui dict vray , comme celuy qui dict faux : les moyens qu'il employe pour la descouurir , sont raison & experience , tous deux très - foibles , incertains , diuers , ondoyans. Le plus grand argument de la verité, c'est le general consentement du monde. Or le nombre des fols surpasse de beaucoup celuy des sages : & puis comment est on paruenue à ce consentement , que par contagion & applaudissement , donné sans jugement & cognoissance de cause , mais à la suite de quelques vns qui ont commencé la danse ?

L'autre fin moins naturelle , mais plus ambitieuse est l'invention à laquelle il tend ,

Tome I.

G

comme au plus haut point d'honneur , pour se monstrier & faire valoir ; c'est ce qui est plus estimé & semble estre vne image de divinité. De ceste suffisance d'inventer sont produits les ouvrages qui ont ravi tout le monde en admiration : & s'ils ont esté avec vtilité publique , ils ont deisié leurs auteurs. Ceux qui ont esté en subtilité seule sans vtilité , ont esté en la peinture , statuaire , architecture , perspective , comme la vigne de Zeuxis , la Venus d'Appelles , la statue de Memnon , le cheual d'airain , la colombe de bois d'Archytas , la Sphære de Sapor , Roy de Perse , & tant d'autres. Or l'art & l'invention semblent non seulement imiter nature , mais la passer ; & ce non seulement en particulier & indiuidu (car il ne se trouve point de corps d'homme ou beste en nature , si uniuersellement bien faict , comme il se peut représenter par les ouvriers) mais encore plusieurs choses se font par art qui ne se font point par nature : j'entends outre les compositions & mixtions qui est le vray gibier & le propre subject de l'art , tesmoins les extractions & distillations des eaux & des huiles faites de simples , ce que nature ne fait point : mais en tout cela il n'y a pas lieu de si grande admiration que l'on pense ; & à proprement & loyalement parler , il n'y a point d'invention que celle que Dieu reuele : car celles que nous estimons & appellons telles , ne sont

qu'obſervations des choſes naturelles , argumens & conſolutions tirées d'icelles , comme la peinture & l'optique des ombres , les orloges ſolaires des ombres des arbres , l'imprimerie des marques & ſeaux des pierres précieufes.

De tout cela il eſt aisé à voir combien l'eſprit humain eſt temeraire & dangereux , meſmeſment ſ'il eſt viſ & vigoureux : car eſtant ſi remuant , ſi libre & vniuerſel , & faiſant ſes remuemens ſi deſréglement , uſant ſi hardiment de ſa liberté par tout , ſans ſ'aſſeruir à rien , il vient à ſecouer aſſément les opinions communes & toutes regles par leſquelles l'on le veut brider & contraindre , comme vne injuſte tyrannie ; entreprendra d'examiner tout , & juger la pluſpart des choſes plauſiblement reçues du monde , ridicules & abſurdes , trouuant par tout de l'apparence , paſſera par deſſus tout : & ce faiſant , il eſt à craindre qu'il ſ'eſgare & ſe perde : & de faiſt nous voyons que ceux qui ont quelque vivacité extraordinaire , & quelque rare excellence , comme ceux qui ſont au plus haut eſtage de la moyenne claſſe cy deſſus dite , ſont le plus ſouuent deſreglés & en opinions & en meurs. Il y en a bien peu à qui l'on ſe puiſſe fier de leur conduite propre , & qui puiſſent ſans temerité voguer en la liberté de leurs jugemens au dela les opinions communes. C'eſt miracle

de trouuer vn grand & vif esprit bien reiglé & moderé ; c'est un très-dangereux glaiue qui ne le sçait bien conduire : & d'où viennent tous les desordres, reuoltes, heresies & troubles au monde que de là ? *Magni errores non nisi ex magnis ingeniis : nihil sapientia odiosius acumine nimio.* Sans doute celuy a meilleur temps, plus longue vie, est plus heureux & beaucoup plus propre au regime de la Republique dict Thucidide qui a l'esprit mediocre, voire au deffouz la mediocrité, que qui l'a tant esleué & transcendant, qui ne sert qu'à se donner du tourment & aux autres. De grandes amitiés naissent les grandes inimitiés, des santés vigoureuses les mortelles maladies ; aussi des rares & vifues agitations de nos ames les plus excellentes manies & plus detraquées. La sagesse & la folie sont fort voisines. Il n'y a qu'un demy tour de l'une à l'autre : cela se voit aux actions des hommes insensés. La philosophie nous apprend que la melancolie est propre à tous les deux. De quoy se fait la subtile folie que de la plus subtile sagesse ? C'est pourquoy, dit Aristote, il n'y a point de grand esprit sans quelque meslange de folie, & Platon qu'en vain vn esprit rassis & sain frappe aux portes de la Poësie. C'est en ce sens que les sages & plus braues Poëtes ont approuué de folier & sortir des gonds quelquefois : *Insanire iucundum est, dulce desipere in loco : non potest grande &*

sublime quidquam nisi mota mens & quandiu apud se est.

C'est pourquoy on a eu bonne raison de luy donner des barrières estroites : on le bride & le garotte de religions, loix, coustumes, sciences, preceptes, menaces, promesses mortelles & immortelles ; encores voit on que par sa desbauche il franchist tout, il eschappe à tout, tant il est de nature reuesche, fier, opiniastre, dont le faut mener par artifice : l'on ne l'aura pas de force : *Natura contumax est animus humanus, in contrarium atque arduum nitens, sequiturque facilius quam ducitur, ut generosi & nobiles equi melius facili freno reguntur.* Il est bien plus seur de le mettre en tutelle, & le coucher que le laisser aller à sa poste : car s'il n'est bien fort & bien réglé, comme ceux de la plus haute classe qu'auons dict cy dessus, ou bien foible, mol & mouffe, comme ceux de la plus basse marche, certes il se perdra en la liberté de ses jugemens : parquoy il a besoin d'estre retenu, plus besoin de plomb que d'aïsses, de bride que d'esperon : A quoy principalement ont regardé les grands législateurs & fondateurs d'estats : les peuples fort médiocrement spirituels vivent en plus de repos que les ingénieux. Il y a eu plus de troubles & de seditions en dix ans en la seule ville de Florence, qu'en cinq cents ans au pays des Suisses & Grisons : & en particulier les hommes d'une commune

suffifance font plus gens de bien , meilleurs citoyens , font plus fouples , & font plus volontiers joug aux loix , aux fuperieurs , à la raifon , que ces tant vifs & clairuoyans , qui ne peuuent demourer en leur peau : l'affinement des efprits n'eft pas l'affagiffement.

L'efprit a fes maladies , les deffauts & les tares auffi bien que le corps , & beaucoup plus & plus dangereux , & plus incurables : mais pour les cognoiftre il les faut diftinguer , les vns font accidentaux & qui luy arriuent d'ailleurs; nous en pouvons remarquer trois caufes, la difpofition du corps , car les maladies corporelles qui alterent le temperament , alterent auffi tout manifeftement l'efprit & le jugement : ou bien la fubftance du cerveau & des organes de l'ame raifonnable eft mal compofée , foit de la premiere conformation , comme en ceux qui ont la tefte mal faicte , toute ronde ou trop petite , ou par accident de heurt ou bleffure.

La feconde eft la contagion vniuerfelle des opinions populaires & erronées , receuës au monde , de laquelle l'efprit prevenu & atteinct , ou qui pis eft , abreuué & coiffé de quelques opinions fantafques , va toujours & juge felon cela , fans regarder plus auant ou reculer en arriere ; or tous les efprits n'ont pas affez de force & vigueur pour fe garantir & fauuer d'un tel déluge.

La troifieme beaucoup plus voisine eft la maladie & corruption de la volonté ; & la force

des passions , c'est un monde renversé : la volonté est née pour suivre l'entendement comme son guide, son flambeau : mais étant corrompue & faisie par la force des passions, force aussi & corrompt l'entendement , & c'est d'où vient la plupart des faux jugemens , l'enuie, la malice, la haine, l'amour, la crainte nous font regarder, juger & prendre les choses toutes autres & tout autrement qu'il ne faut, dont l'on crie tant (juger sans passion) de là vient que l'on obscurcit les belles & genereuses actions d'autrui par des viles interpretations, l'on controuue des causes, occasions & intentions mauuaises ou vaines ; c'est un grand vice & preuue d'une nature maligne, & jugement bien malade ; il n'y a pas grande subtilité ny suffisance en cela, mais de malice beaucoup. Cela vient d'enuie qu'ils portent à la gloire d'autrui, ou qu'ils jugent des autres selon eux, ou bien qu'ils ont le goust alteré & la vue si troublée, qu'ils ne peuvent concevoir la splendeur de la vertu en sa pureté naïue. De ceste mesme cause & source vient que nous faisons valoir les vertus & les vices d'autrui, & les estendons plus qu'il ne faut, des particularités en tirons des consequences & conclusions generales : s'il est amy tout luy sied bien, ses vices mesmes seront vertus ; s'il est ennemy ou particulier, ou de party contraire, il n'y a rien de bon, Tellement que nous faisons honte à nostre

jugement , pour assouvir nos passions ; mais cecy va bien encore plus loin , car la plupart des impietés , heresies , erreurs en la creance & religion , si nous y regardons bien , est née de la mauvaïse & corrompue volonté d'une passion violente & volupté , qui puis attire à foy l'entendement mesmes , *sedit populus manducare & bibere , &c. quod vult non quod est credit , qui cupit errare* , tellement que ce qui se faisoit au commencement avec quelque scrupule & doute , a esté puis tenu & maintenu pour une verité & reuelation du ciel , ce qui estoit seulement en la sensualité a prins place au plus haut de l'entendement : ce qui n'estoit que passion & volupté , a esté faict creance religieuse & article de foy , tant est forte & dangereuse la contagion des facultés de l'ame entr'elles. Voilà trois causes externes des fautes & mescontes de l'esprit , jugement & entendement humain , le corps mesmement la teste malade ou blessée , ou mal faicte : le monde avec ses opinions anticipées & suppositions , le mauvais estat des autres facultés de l'ame raisonnable , qui lui sont toutes inferieures. Les premiers deffaillans sont pitoyables , & aucuns d'iceux sont curables les autres non ; les seconds sont excusables & pardonnables : les troisiemes sont accusables & punissables , qui souffrent un tel desordre chez eux , que ceux qui deuoient receuoir la loy , entreprennent de la donner,

Il y a d'autres defauts qui luy font plus naturels & internes , car ils naissent de lui & dedans luy : le plus grand & la racine de tous les autres est l'orgueil & la presumption , (premiere & originelle faute du monde , peste de tout esprit , & cause de tous maux) par laquelle l'on est tant content de soy , l'on ne veut ceder à autrui , l'on desdaigne ses aduis , l'on se repose en ses opinions , & l'on entreprend de juger & condamner les autres , & encores celles que l'on n'entend pas. L'on dict bien vray que le plus beau & heureux partage que Dieu aye fait , est jugement , car chacun se contente du sien , & en pense avoir assez. Or ceste maladie vient de la mesconnoissance de soy , nous ne sentons jamais assés au vray la foiblesse de nostre esprit : ainsi la plus grande maladie de l'esprit c'est l'ignorance , non pas des arts & sciences & de ce qui est dedans les liures , mais de soy mesmes , à cause dequoy ce premier liure a esté fait.

CHAPITRE XVII.

De la Memoire.

LA memoire est souvent prinse par le vulgaire pour le sens & entendement , mais c'est à tort : car & par raison comme a esté dict , &

par experience l'excellence de l'un est ordinairement avec la foiblesse de l'autre : c'est à la verité vne faculté fort vtile pour le monde , mais elle est de beaucoup au deffous de l'entendement , & est de toute les parties de l'ame la plus delicate & plus fresse. Son excellence n'est pas fort requise , si ce n'est à trois sortes de gens , aux ambitieux de parler (car le magasin de la memoire est volontiers plus plein & fourny que celui de l'inuention , or qui n'en a , demoure court : & faut qu'il en forge & parle de foy) & aux menteurs , *mendacem oportet esse memorem*. Le deffaut de memoire est vtile à ne mentir gueres , ne parler gueres , oublier les offenses. La mediocrité est suffisante par tout.

CHAPITRE XVIII.

De l'imagination & opinion.

L'IMAGINATION est vne tres-puissante chose , c'est celle qui fait tout le bruiſt , l'esclate : le remuement du monde vient d'elle (comme nous auons dit cy dessus estre la faculté de l'ame , seule , ou bien la plus active & remuante.) Ses effets sont merueilleux & estranges : elle agist non seulement en son corps &

son ame propre , mais encores en celle d'autrui , & produict effets contraires. Elle faict rougir , pallir , trembler , tremousser , tressuer , ce sont les moindres & plus doux : elle oste la puissance & l'usage des parties genitales , voir lors qu'il en est plus besoin , & que l'on y est plus aspre , non seulement à soy mesmes mais à autrui , tesmoins les liaisons dont le monde est plein , qui sont pour la plupart impressions de l'apprehension & de la crainte : Et au contraire sans effort , sans objets & en songe elle assouit les amoureux desirs , faict changer de sexe , tesmoin Lucius Collitius , que Pline dict auoir veu estre changé de femme en homme le jour de ses nopces , & tant d'autres : marque honteusement voire tue & auorte le fruct dans le ventre , faict perdre la parole , & la donne à qui ne l'a jamais eue , comme au fils de Cresus , oste le mouuement , sentiment , respiration. Voila au corps. Elle faict perdre le sens , la cognoissance , le jugement , faict deuenir fol & insensé , tesmoin Gallus Vibius , qui pour auoir trop bandé son esprit à comprendre l'essence & les mouuemens de la folie , disloca & desnoia son jugement si qu'il ne le peut remettre : faict deuiner les choses secretes & à venir , & cause les enthousiasmes , les predictions & merueilleuses inuentions , & rait en extase , reallement tue & faict mourir , tesmoin celuy à qui l'on des

banda les yeux pour luy lire sa grace , & fust trouué roide mort sur l'eschafaut. Bref c'est d'elle que vient la pluspart des choses que le vulgaire appelle miracles , visions enchantemens. Ce n'est point le diable ny l'esprit, comm'il pense , mais c'est l'effect de l'imagination ou de celle de l'agent qui faict telles choses , ou du patient & spectateur qui pense voir ce qu'il ne void point.

En ceste partie se tient & loge l'opinion, qui est vain & leger , crud & imparfaict jugement des choses , tiré & puisé des sens extérieurs , & du bruiet commun & vulgaire , s'arrestant & tenant bon en l'imagination , & n'arrivant jamais jusques à l'entendement , pour y estre examiné , cuit & élaboré , & en estre faict raison : qui est vn vray entier & solide jugement des choses , dont elle est inconstante , incertaine , volage , trompeuse , vn tres-mauvais & dangereux guide , & qui faict teste à la raison , de laquelle elle est une ombre & image , mais vaine & fausse : elle est mere de tous maux , confusions , desordres : d'elle viennent toutes passions & les troubles ; c'est le guide des fols , des fots , du vulgaire , comme la raison des Sages & habiles.

Ce n'est pas la verité ny le naturel des choses qui nous remue , & agite ainsi l'ame , c'est l'opinion selon un dire ancien : les hommes sont tourmentés par les opinions qu'ils ont

des choses , non par les choses mesmes , *opinionē sapius quam re laboramus : plura sunt quæ nos tenent quam quæ premunt.* La verité & l'estre des choses , n'entre ny ne loge chés nous de soy mesme , de sa propre force & authorité : s'il estoit ainsi , toutes choses seroient receuës de tous , toutes pareilles & de mesme façon ; sauf peu plus , peu moins , tous seroient de mesme creance ; & la verité qui n'est jamais qu'une & uniforme , seroit embrassée de tout le monde. Or il y a si grande diuersité , voire contrariété d'opinions par le monde , & n'y a chose aucune de laquelle tous soient généralement d'accord , pas mesmes les sçauans & les mieux nais : qui monstre que les choses entrent en nous par composition , se rendent à nostre mercy & deuotion , & logent chés nous comm' il nous plaist , selon l'humeur & la trempe de nostre ame. Ce que je crois , je ne puis faire croire à mon compagnon : mais qui plus est , ce que je crois aujourd'huy si fermement , je ne puis respondre que je le croiray encores ainsi demain , voire il est certain que je le trouueray & jugeray tout autre & autrement une autre fois. Certes les choses prennent en nous telle place , tel goust & couleur , que nous leur en donnons , & telle qu'elle est la constitution interne de l'ame , *omnia munda mundis , immunda immundis.* Comme les accoustremens nous eschauffent non de leur chaleur ,

mais de la nostre qu'ils conservent, comme aussi ils nourrissent la froideur de la neige & de la glace, nous les eschauffons premierement de nostre chaleur, & puis en recompense ils nous conservent la nostre.

Presque toutes les opinions que nous auons, nous ne les auons que par autorité, nous croyons, jugeons, agissons, viuons, & mourons à credit, selon que l'usage public nous apprend : & faisons bien, car nous sommes trop foibles pour juger & choisir de nous mesmes : mais les sages ne font pas ainsi, comme fera dict.

CHAPITRE XIX.

Volonté.

LA volonté est vne grande piece, de tres-grand importance, & doit l'homme estudier sur tout à la bien reigler, car d'elle depend presque tout son estat & son bien : elle seule est vrayement nostre & en nostre puissance, tout le reste, entendement, memoire, imagination nous peut estre osté, alteré, troublé par mille accidents, & non la volonté. Secondement c'est elle qui entraine & emport l'homme tout entier : qui a donné la volonté n'est plus à soy, & n'a plus rien de propre,

Tiercement c'est celle qui nous rend & denomme bons ou mechans , qui nous donne la trempe & la teincture : comme de tous les biens qui sont en l'homme. La preud'homme est le premier & principal & qui de loin passe la science , l'habilité , aussi faut il dire que la volonté où loge la bonté & vertu est la plus excellente de toutes : & de faict pour entendre & sçavoir les belles , bonnes , & honnestes choses , ou meschantes & deshonestes ; l'homme n'est bon ny meschant , honneste , ny deshoneste , mais les vouloir , & aimer : l'entendement a bien d'autres preeminences , car il est à la volonté comme le mary à la femme , le guide & flambeau au voyager ; mais en celles icy il cede à la volonté.

La vraye difference de ces facultés est en ce que par l'entendement les choses entrent en l'ame , & elle les reçoit , comme portent les mots d'apprendre , concepuoir , comprendre , vrais offices d'iceluy : y entrent non entieres & telles qu'elles sont , mais à la proportion , portée & capacité de l'entendement , dont les grandes & hautes se racourcissent & abaissent aucunement par ceste entrée , comme l'Ocean n'entre tout entier en la mer Méditerranée , mais à la proportion de l'embouchure du destroit de Gibraltar. Par la volonté au contraire , l'ame sort hors de foy , & va se loger & viure ailleurs en la chose aimée , en laquelle elle se transforme , & en porte le nom ,

le tiltre & la liurée , estant appellée vertueuse , vitieuse , spirituelle , charnelle , dont s'ensuit que la volonté s'anoblit ayment les choses dignes & hautes , s'auilit s'adonnant aux moindres & indignes : comme la femme selon le party & mary qu'elle prend.

L'experience nous apprend que trois choses esguisent nostre volonté , la difficulté , la rareté , & l'absence , ou bien crainte de perdre la chose , comme les trois contraires la relaschent , l'aisance , l'abondance ou satieté , & l'affiduelle presence & jouyffance asseurée : les trois premiers donnent prix aux choses , les autres trois engendrent mespris : nostre volonté s'esguise par le contraste , se despice contre le desny. Au rebours nostre appetit mesprise & outrepatte ce qui luy est en main , pour courir à ce qu'il n'a pas , *quod licet ingratum est , quod non licet acrius urit* , voire cela se voit en toutes sortes de voluptés , *omnium rerum voluptas ipso quo debet fugare periculo , crescit*. Tellement que les deux extremités la faute & l'abondance , le desir & la jouyffance , nous mettent en mesme peine : cela faict que les choses ne sont pas estimées justement comme il faut , & que nul prophete en son pays.

Comment il faut mener & regler sa volonté se dira cy apres.

PASSION ET AFFECTION.

Advertissement.

LA matiere des passions de l'esprit est tres-grande & plantureuse , tient vn grand lieu en ceste doctrine de sagesse : à les sçauoir bien cognoistre & distinguer , ce qui se fera maintenant en ce liure : aux remedes de les brider, regir & moderer generaux, c'est pour le second liure : aux remedes particuliers d'une chacune au troisieme liure , suyuant la methode de ce livre mise au preface. Or pour en auoir icy la cognoissance nous en parlerons premierement en general en ce chapitre , puis particulierement de chacune aux chapitres suyuant : Et n'ay point veu qui les desdaigne plus naïfvement & richement que le sieur du Vair en ses petits liurets moraux, desquels je me suis fort seruy en ceste matiere passionée.

C H A P I T R E X X.

Des Passions en general.

PASSION est vn mouvement violent de l'ame en sa partie sensitiue , lequel se faict ou pour suiure ce que l'ame pense lui estre bon , ou pour suyir ce qu'elle pense luy estre mauuais.

Mais il est requis de bien sçavoir comment se font ces mouuements, & comment ils naissent & s'eschauffent en nous, ce que l'on peult représenter par divers moyens & comparaisons, premierement pour le regard de leur esmotion & impetuosité : L'ame qui n'est qu'une au corps, a plusieurs & tres-diueres puissances, selon les diuers vaisseaux où elle est retenue, instruments desquels elle se sert, & objects qui lui sont proposés. Or quand les parties, où elle est enclose, ne la retiennent & occupent qu'à proportion de leur capacité, & selon qu'il est necessaire pour leur droit vsage, ses effects sont doux, benins & bien reiglés : mais quand au contraire ses parties prennent plus de mouuement & de chaleur qu'il ne leur en faut, elles s'alterent & deviennent dommageables, comme les rayons du soleil, qui vaguans à leur naturelle liberté eschauffent doucement & tiedement, s'ils sont recueillis & remis aux creux d'un miroir ardent, brulent & consomment ce qu'ils auoient accoustumé de nourrir & viuifier. Au reste elles ont diuers degrés en leur force & esmotion, & sont en ce distinguées par plus & moins, les mediocres se laissent gouter & digerer, s'expriment par parole & par larmes, les grandes & extremes estonnent toute l'ame, l'accablent & luy empeschent la liberté de ses actions, *cura leues loquantur, ingentys stupent.*

Secondement pour le regard du vice, desreiglement & injustice qui est en ses passions, nous pouuons à peu pres comparer l'homme à vne republique : & l'estat de l'ame à vn estat royal, auquel le souuerain pour le gouuernement de tant de peuples a des magistrats, auxquels pour l'exercice de leurs charges, il donne loix & reiglemens, se reservant la cognoissance des plus grands & importants accidents. De cest ordre depend la paix & prosperité de l'estat : au contraire si les magistrats qui sont comme mitoyens entre le prince & le peuple se laissent tromper par facilité, ou corrompre par faueur, & que sans deferer à leur souuerain & aux loix par luy establies, ils employent leur autorité à l'execution des affaires, ils remplissent tout de desordre & confusion. Ainsi en l'homme l'entendement est le souuerain qui a sous soy vne puissance estimatiue & imaginatiue comme vn magistrat pour cognoistre & juger par le rapport des sens de toutes choses qui se presenteront & mouuoir nos affections pour l'execution. Pour sa conduite & reiglement en l'exercice de sa charge, la loy & lumiere de nature luy a esté donnée : & puis il a moyen en tout doute de recourir au conseil de son superieur & souuerain l'entendement : Voila l'ordre de son estre heureux, mais le malheur est, que ceste puissance qui est au dessus de l'entendement, & au dessus des sens, à la-

quelle appartient le premier jugement des choses, se laissent la pluspart du tems corrompre ou tromper, dont elle juge mal & temerairement, puis elle manie & remuë nos affections mal à propos, & nous remplit de trouble & d'inquietude. Ce qui trouble & corromp ceste puissance, ce sont premiere-ment les sens, lesquels ne comprennent pas la vraye & interne nature des choses, mais seulement la face & forme externe, rapportant à l'ame l'image des choses, avec quelque recommandation fauorable, & quasi vn prejudgé de leurs qualirés, selon qu'ils les trouuent plaisants & agreables à leur particulier, & non vtiles & necessaires au bien vniuersel de l'homme : Puis s'y melle le jugement souuent faux & indiscret du vulgaire. De ces deux faux aduis & rapports des sens & du vulgaire, se forme en l'ame vne inconsiderée opinion, que nous prenons des choses, qu'elles sont bonnes ou mauuaises, vtiles ou dommageables, à suy-ure ou fuir : qui est certainement vne tres-dangereuse guide & temeraire maistresse : car aussi tost qu'elle est conceuë, sans plus rien deferer au discours & à l'entendement, elle s'empare de nostre imagination, & comme dedans vne citadelle y tient fort contre la droicte raison, puis elle descend en nostre cœur, & remue nos affections, avec des mouuements violents d'esperance, de crainte,

de tristesse, de plaisir. Bref faict soulever tous les fols & seditieux de l'ame, qui sont les passions.

Je veux encôres declarer la mesme chose, par vne autre similitude de la police militaire. Les sens sont & sentinelles de l'ame, veillans pour sa conseruation, & messagers courriers, pour seruir de ministres & instruments à l'entendement, partie souueraine de l'ame : Et pour ce faire ils ont receu puissance d'appercevoir les choses, en tirer les formes, & les embrasser ou rejeter, selon qu'elles leur semblent agreables ou fascheuses, & qu'elles consentent ou s'accordent à leur nature : Or en exerçant leur charge ils se doiuent contenter de recognoistre & donner aduis de ce qui se passe, sans vouloir entreprendre de remuer les hautes & fortes puissances, & par ce moien mettre tout en allarme & confusion. Ainsi qu'en vne armée souuent les sentinelles, pour ne scauoir pas le dessein du chef qui commande, peuuent estre trompés, & prendre pour secours les ennemis desguisés, qui viennent à eux, ou pour ennemis ceux qui viennent à leur secours : aussi les sens pour ne pas comprendre tout ce qui est de la raison, sont souuent deceux par l'apparence, & jugent pour amy ce qui nous est ennemy. Quand sur ce pensement & sans attendre le commandement de la raison, ils viennent à remuer la puissance concupiscible,

& l'irascible ils font vne sedition & tumulte en nostre ame, pendant laquelle raison n'y est point ouye, ny l'entendement obey.

Voyons maintenant leurs regiments, leurs rangs, genres & especes. Toute passion s'esmeut sur l'apparence & opinion ou d'un bien ou d'un mal : si d'un bien, & que l'ame le considere tel tout simplement, ce mouuement s'appelle amour : S'il est present & dont l'ame jouysse en soy mesme, il s'appelle plaisir & joye : s'il est à venir, s'appelle desir : si d'un mal, comme tel simplement, c'est haine, s'il est present, en nous mesmes, c'est tristesse & douleur, si en autrui, c'est pitié, s'il est à venir, c'est craincte. Et celles cy qui naissent en nous par l'object du mal apparent, que nous fuyons & abhorrons, descendent plus auant en nostre cœur, & s'en leuent plus difficilement. Voila la premiere bande des seditieux qui troublent le repos de nostre ame, sçauoir en la partie concupiscible, desquels encores que les effects soient tres-dangereux, si ne sont ils pas si violents, que de ceux qui les suivent : Car ces premiers mouuements là, formés en ceste partie, par l'object qui se presente, passent incontinent en la partie irascible, c'est à dire, en cest endroict, où l'ame cherche les moyens d'obtenir ou esuiter ce qui luy semble bon ou mauuais. Et lors tout ainsi comme vne rouë qui est desia esbranlée, venant à receuoir un nou-

veau mouuement, tourne de grande vireſſe, auſſi l'ame deſia eſmeuë de la premiere apprehenſion, adjouſtant vn ſecond effort au premier, ſe manie avec beaucoup plus de violence qu'au- parauant, & ſouſleue de paſſions bien plus puiſſantes & plus difficiles à dompter, d'autant qu'elles ſont doubles, & là accouplées aux premieres, ſe liant & ſouſtenant les vnes les autres par vn mutuel conſentement, car les premieres paſſions qui ſe forment ſur l'object du bien apparent, entrant en conſideration des moyens de l'acquerir, excitent en nous ou l'eſpoir ou le deſeſpoir. Celles qui ſe forment ſur l'object du mal à venir, ſont naiſtre ou la peur, ou au contraire l'audace: du mal preſent, la cholere & le courroux: leſquelles paſſions ſont eſtrangement violentes, & renuerſent entierement la raiſon qu'elles trouuent deſia eſbranlée. Voila les principaux vents d'où naiſſent les tempeſtes de noſtre ame: & la cauerne d'où ils ſortent, n'eſt que l'opinion (qui eſt ordinairement fauſſe, vague, incertaine, contraire à nature, verité, raiſon, certitude) que l'on a, que les choſes qui ſe preſentent à nous, ſont bonnes ou mauuaiſes: car les ayant apprehendées telles, nous les recherchons ou fuyons avec vehemence, ce ſont nos paſſions.

DES PASSIONS EN GENERAL.

Advertissement.

IL fera traitté de leur naturel, pour y voir la folie, vanité, misere, injustice, & laideur, qui est en elles, afin de les cognoistre & apprendre à les justement hayr. Les aduis pour s'en garder seront aux liures suyvants, ce sont les deux parties du Medecin, declarer la maladie, & donner les remedes, voicy les maladies de l'esprit. Au reste nous parlerons icy premierement de toutes celles qui regardent le bien apparrant, qui sont amour & ses especes, desir, espoir, desespoir, joye, & puis toutes celles qui regardent le mal, qui sont plusieurs, cholere, hayne, enuie, jalousie, vengeance, cruauté, craincte, tristesse, compassion.



CHAPITRE XXI.

De l'amour en general.

LA premiere maistresse & capitale de toutes passions est l'amour, qui est de diuers subjects, & de diuerses sortes & degrés, il y en a trois principaux, ausquels tous rapportent (nous parlons du vitieux & passionné, car du vertueux, qui est amitié, charité, dilection, sera
parlé

parlé en la vertu de la justice,) sçauoir l'ambition ou superbe , qui est l'amour de grandeur & honneur ; l'auarice , amour des biens & l'amour voluptueux & charnel. Voila les trois goulphes & precipices , d'où peu de gens se sauuent , les trois pestes & corruptions de tout ce qu'auons en maniemment , esprit , corps , & biens , les armeures de trois capitaux ennemis du salut & repos humain , le diable , la chair , le monde. Ce sont à la verité trois puissances , les plus communes & vniuerselles passions , dont l'Apostre a parti en ces trois tout ce qui est au monde , *quicquid est in mundo , est concupiscentia oculorum , aut carnis , aut superbia vitæ.* L'ambition comme spirituelle est plus noble & hautaine que les autres : L'amour voluptueux comme plus naturel & vniuersel (car mesmes aux bestes où les autres ne se trouuent point) il est plus violent , & moins vitieux , je dis violent tout simplement , car quelquesfois l'ambition l'emporte , mais c'est vne maladie particuliere , l'auarice est la plus sotte & maladiue de toutes.

CHAPITRE XXII.

De l'Ambition.

L'AMBITION (qui est vne faim d'honneur & de gloire , vn desir glouton & excessif de

grandeur) est vne bien douce passion, qui se coule aisement ès esprits plus genereux, & ne s'en tire qu'à peine. Nous pensons deuoir embrasser le bien, & entre les biens nous estimons l'honneur plus que tout, voila pourquoy nous le courons à force : l'ambitieux veut estre le premier, jamais ne regarde derriere, mais tousiours deuant, à ceux qui le precedent : & luy est plus grief d'en laisser passer vn deuant, qu'il ne prend de plaisir d'en laisser mille derriere, *habet hoc vitium omnis ambitio, non respicit.* Elle est double, l'vne de gloire & honneur, l'autre de grandeur & commandement, celle là est vtile au monde, & en certain sens permise, comme il sera dit, ceste cy pernicieuse.

L'ambition a sa semence & sa racine naturelle en nous : il y a vn prouerbe qui dit que nature se contente de peu, & vn autre tout contraire, que nature n'est jamais saoule ny contente, tousiours desire, veut monter & s'enrichir, & ne va point seulement le pas, mais court à bride abbatue, & se rue à la grandeur & à la gloire : *Natura nostra imperii est auida, & ad implendam cupiditatem praecept.* Et de force qu'ils courent, souuent se rompent le col, comme tant de grands hommes à la veille & sur le point d'entrer & jouyr de la grandeur qui leur auoit tant cousté. C'est vne passion naturelle, tres-puissante, & enfin qui nous laisse bien tard, dont quelqu'un l'appelle la

chemise de l'ame, car c'est le dernier vice duquel elle se despoüille. *Etiam sapientibus cupido gloria novissima exuitur.*

L'ambition, comme c'est la plus forte & puissante passion qui soit, aussi est elle la plus noble & hautaine, sa force & puissance se monstre en ce qu'elle maistrise & surmonte toutes autres choses, & les plus fortes du monde, toutes autres passions & cupidités, mesmes celle de l'amour, qui semble toutes-fois contester de la primauté avec ceste cy. Comme nous voyons en tous les grands, Alexandre, Scipion, Pompée, & tant d'autres qui ont courageusement refusé de toucher les plus belles dames qui estoient en leur puissance, brulant au reste d'ambition, voire ceste victoire de l'amour, seruoit à leur ambition, sur tout en Cesar : car jamais homme ne fust plus adonné aux plaisirs amoureux, & de tout sexe, & de toutes fortes, tesmoins tant d'exploits, & à Rome & aux pais estrangers, ny aussi plus soigneux & curieux de sa personne, toutes fois l'ambition l'emportoit tousiours, jamais les plaisirs amoureux ne luy firent perdre vne heure de temps, qu'il pouuoit employer à son agrandissement : l'ambition regentoit en luy souuerainement, & le possedoit plainement. Nous trouuons au rebours qu'en Marc Anthoine & autres, la force de l'amour a fait oublier le soin & la conduite des affaires. Mais quand

toutes deux seroient en esgalle balance , l'ambition emporteroit le prix. Ceux qui veulent l'amour plus forte, disent qu'elle tient à l'ame & au corps, & que tout l'homme en est possédé, voire que la santé en dépend : Mais au contraire il semble que l'ambition est plus forte , à cause qu'elle est toute spirituelle. Et de ce que l'amour tient aussi au corps, elle en est plus foible , car elle est subiecte à fatiété, & puis est capable de remedes corporels , naturels , & estranges, comme l'experience le monstre de plusieurs qui par diuers moyens ont adoucy, voire esteint l'ardeur & la force de ceste passion. Mais l'ambition n'est capable de fatiété, voire elle s'esguise par la jouissance, & n'y a remede pour l'esteindre, estant toute en l'ame mesmes & en la raison.

Elle vainq aussi l'amour non seulement de sa santé, de son repos, (car la gloire & le repos sont choses qui ne peuuent loger ensemble) mais encores de sa propre vie, comme monstra Agrippina, mere de Neron, laquelle desirant & consultant pour faire son fils Empereur, & ayant entendu qu'il le seroit, mais qu'il luy cousteroit la vie, respondist le vray mot d'ambition : *Occidat modo imperet.*

Tiercement l'ambition force toutes les loix, & la conscience mesmes, disants les docteurs de l'ambition, qu'il faut estre par tout homme de bien, & perpetuellement obeyr aux loix,

fauf au poinct de regner , qui seul merite dispense , estant un si friant morceau , qu'il vaut bien que l'on en rompe son jeusne , *si violandum est jus , regnandi causa violandum est , in cæteris pietatem colas.*

Elle foule & mesprise encores la reuerence & le respect de la religion, tesmoin Hieroboam, Mahumet , qui ne se soucie , & permet toute religion , mais qu'il regne : & tous les Heresiarches , qui ont mieux aimé estre chefs de part en erreur & menterie , avec mille desordres , qu'estre disciples de verité. Dont a dit l'Apostre , que ceux qui se laissent embabouiner à ceste passion & cupidité , font naufrage & s'esgarent de la foy & s'embarraissent en diuerses peines.

Bref elle force & emporte les propres loix de nature : les meurtres des parens , enfans , freres , sont venus de là , tesmoins Absalon , Abimelech , Athalias , Romulus , Sci Roy des Perles , qui tua son pere & son frere , Soliman Turc ses deux freres : ainsi rien ne peut résister à la force de l'ambicion , elle met tout par terre, aussi est elle hautaine, ne loge qu'aux grandes ames , voire aux anges.

Ambicion n'est pas vice ny passion de petits compagnons , ny de petits & communs efforts & actions journalieres; la renommée & la gloire ne se prostitue pas à si vil pris ; elle ne se donne & ne suit les actions , non seulement

bonnes & vtilles ; mais encores rares , hautes , difficiles , estranges & inusitées. Ceste grande faim d'honneur & reputation basse & belistresse , qui la faict coquiner enuers toutes sortes de gens , & par tous moyens , voire abjects , à quelque vil prix que ce soit , est vilaine & honteuse : c'est honte d'estre ainsi honoré : il ne faut point estre auide de gloire plus que l'on n'en est capable , de s'enfler & s'esleuer pour toute action vtile & bonne ; c'est monstrier le cul en haussant la teste.

L'ambition a plusieurs & diuers chemins , & s'exerce par diuers moyens ; il y a vn chemin droict & ouuert , tel qu'ont tenu Alexandre , Cesar , Themistocles & autres. Il y en a vn autre oblique & couuert , que tiennent plusieurs philosophes & professeurs de pieté , qui viennent au devant par derriere , semblables aux tireurs d'auiron , qui tirent & tendent au port luy tournant le dos ; ils se veulent rendre glorieux de ce qu'ils mesprisent la gloire. Et certes il y a plus de gloire à fouler & refuser les grandeurs , qu'à les desirer , & jouyr , comme dit Platon à Diogenes ; & l'ambition ne se conduict jamais mieux selon soy , que par vne voye esgarée & inusitée.

C'est vne vraye folie & vanité qu'ambition , car c'est courir & prendre la fumée au lieu de la lueur , l'ombre pour le corps , attacher le contentement de son esprit à l'opinion du

vulgaire , renoncer volontairement à sa liberté pour suyure la passion des autres , se contraindre à desplaire à soy mesme , pour plaire aux regardans , faire pendre ses affections aux yeux d'autrui , n'aimer la vertu qu'autant qu'elle plaist au vulgaire , faire du bien non pour l'amour du bien , mais pour la reputation. C'est ressembler aux tonneaux qu'on perce : l'on n'en peut rien tirer qu'on ne leur donne du vent.

L'ambition n'a point de borne , c'est vn gouffre qui n'a ny fonds ny rive , c'est le vuide que les philosophes n'ont encores peu trouuer en la nature , vn feu qui s'augmente avec la nourriture que l'on luy donne. En quoy elle paye justement son maistre , car l'ambition est juste seulement en cela qu'elle s'assit à sa propre peine , & se met elle mesmes au tourment. La roue d'Ixion est le mouuement de ses desirs , qui tournent & retournent continuellement de haut en bas , & ne donnent aucun repos à son esprit.

Ceux qui veulent flatter l'ambition disent qu'elle sert à la vertu , & est vn aiguillon aux belles actions. Car pour elle on quitte les autres vices , & enfin elle mesme pour la vertu ; mais tant s'en faut , l'ambition cache bien quelquesfois les vices , mais ne les oste pas pourtant ; ains les couue pour vn temps , sous les trompeuses cendres d'vne malicieuse

faintise , avec esperance de les renflammer tout à fait , quand ils auront acquis assez d'autorité pour les faire regner publiquement , & avec impunité. Les serpens ne perdent pas leur venin pour estre engourdis par le froid , ny l'ambitieux ses vices , pour les couvrir par une froide dissimulation : Car quand il est parvenu où il se demandoit , il fait sentir ce qu'il est , & quand l'ambition quitteroit tous ses autres vices , si ne quitte elle jamais soy-mesmes. Elle pousse aux belles & grandes actions , le profit en revient au publicq : mais qui les fait , n'en vaut pas mieux ; ce ne sont œuvres de vertu mais de passion. Elle se targue aussi de ce beau mot. Nous ne sommes pas nés pour nous , mais pour le publicq : les moyens que nous tenons à monter , & apres estre arriués aux estats & charges , monstrent bien ce qui en est , que ceux qui sont en la danse se battent la conscience , & trouueront qu'il y a autant ou plus du particulier , que du publicq.

*Avis & remedes particuliers contre ce mal ,
seront l. 3. c. 42.*



C H A P I T R E X X I I I.

De l'Avarice & sa contraire passion.

AYMER & affectionner les richesses , c'est avarice ; non seulement l'amour & l'affection , mais encores tout soing curieux entour les richesses , sent son avarice , leur dispensation mesmes , & la liberalité trop attentivement ordonnée & artificielle. Car elles ne valent pas vne attention ny un soin penible,

Le desir des biens & le plaisir à les posseder n'a racine qu'en l'opinion , le desreglé desir d'en avoir est vne gangrene en nostre ame , qui avec vne venimeuse ardeur , consomme nos naturelles affections , pour nous remplir de virulentes humeurs. Si tost qu'elle s'est logée en nostre cœur , l'honeste & naturelle affection , que nous devons à nos parens & amis , & à nous-mesmes , s'enfuit. Tout le reste comparé à nostre profit ne nous semble rien : nous oublions enfin & mesprisons nous mesmes nostre corps & nostre esprit pour ces biens ; & comme l'on dit , nous vendons nostre cheval pour auoir du soing.

Avarice est passion vilaine & lache des fots populaires , qui estiment les richesses comme le souverain bien de l'homme , & craignent la

plus meschans du monde , qui perverdisſent ſouvent les bonnes mœurs , n'amendent jamais les mauvaiſes , ſans leſquelles tant de ſages ont rendu leur vie heureuſe , & pour leſquelles pluſieurs meſchans ont eu vne mort malheureuſe. Bref , attacher le viſ avec le mort , comme faiſoit Mézentius , pour le faire languir , & plus cruellement mourir , l'eſprit avec l'excrement & eſcume de la terre , & embraffer ſon ame en mille tourmens & traueſes , qu'ameine celle paſſion amoureuſe des biens , & s'empêcher aux filets & cordages du maling , comme les appelle l'eſcriture ſaincte qui les deſcrie fort , les appellant iniques , eſpines , larron du cœur humain , lacqs & filets du diable , idolatrie , racine de tous maux. Et certes qui verroit auſſi bien la rouille des ennuis qu'engendrent les richesses dedans les cœurs , comme leur eſclat & ſplendeur , elles ſeroient autant hayes comm'elles ſont aymées.

C'eſt vn'autre contraire paſſion vitieuſe de hayr & rejeter les biens & richesses , c'eſt reſuſer les moyens de bien faire , & practiquer pluſieurs vertus. Qui ne ſçait qu'il y a beaucoup plus à faire à bien commander & uſer des richesses , que de n'en auoir point , ſe gouverner bien en l'abondance , qu'en la poureté ? En ceſte cy n'y a qu'une eſpece de vertu , qui eſt ne raualler point de

courage , mais se tenir ferme. En l'abondance y est à plusieurs , temperance , moderation , liberalité , diligence , prudence , &c. Là il n'y a qu'à se garder , icy il y a aussi à se garder , & puis à agir. Qui se despouille des biens , se descharge de tant de devoirs & de difficultés qu'il y a à bien & loyalement se gouverner aux biens , en leur acquisition , conservation , distribution , usages & emplois. C'est donc fuir la besogne , & leur dirois volontiers , vous les quittés , ce n'est pas qu'ils ne soient utiles , mais c'est que ne sçaués vous en servir & en bien user , ne pouuoir souffrir les richesses , c'est plustost foiblesse d'ame que sagesse , dit Seneque.

CHAPITRE XXIV.

De l'Amour charnel.

C'EST vne fievre & furieuse passion que l'amour charnel , & très-dangereuse à qui s'y laisse transporter , car où en est-il ? Il n'est plus à foy , son corps aura mille peines à chercher le plaisir , son esprit mille gehennes à servir son desir , le desir croissant deviendra fureur ; comm' elle est naturelle aussi est elle violente & commune à tous, dont en son action elle esgale

& apparie les fols & les sages , les hommes & les bestes : elle abestit & abrutit toute la sagesse , resolution , prudence , contemplation & toute operation de l'ame. De là Alexandre cognoissoit qu'il estoit mortel , comme aussi du dormir , car tous deux suppriment les facultés de l'ame.

La philosophie se mesle & parle librement de toutes choses , pour en trouver les causes , les juger & regler , si fait bien la Theologie qui est encores plus pudique & retenue : pourquoy non , puis que tout est de sa jurisdiction & cognoissance ? le soleil esclaire sur les fumiers sans en rien tenir ou sentir : s'affaroucher ou s'offenser des paroles est preuve de grande foiblesse , ou d'estre touché de la maladie. Cecy soit dict pour ce qui suit & autres pareils s'il y en a. Nature d'une part nous pousse avec violence à ceste action , tout le mouvement du monde se resout & se rend à cest accouplage de masse & de femelle , & d'autre part nous laisse accuser , cacher & rougir , pour icelle comme insolente , deshonneste. Nous l'appellons honteuse & les parties qui y servent honteuses ; pourquoy donc tant honteuse puis que tant naturelle , (& se tenant en ses bornes) si juste , légitime , nécessaire ? & que les bestes sont exemptes de ceste honte ? Est-ce à cause de la contenance qui semble laide ? Pourquoy laide , puisque naturelle ? Au plourer , rire , mascher ,

bailler , le visage se contrefaict encore plus. Pour servir de bride & d'arrest à une telle violence ? Pourquoy donc nature cause elle violence ? Mais c'est au contraire , la honte sert d'aiguillon & d'allumette. A cause que les instruments d'icelle se remuent sans notre consentement , voire contre nostre volonté ? Pour ceste raison aussi les bestes en deuroient auoir honte , & tant d'autres choses se remuent de soy mesmes en nous sans nostre consentement , qui ne sont vitieuses ny honteuses , non seulement internes & cachées , comme le poulx & mouuement du cœur , arteres , poulmons , les outils & parties qui seruent à l'appetit du manger , boire , descharger le cerueau , le ventre & sont leurs compressions & dilatations outre & souuent contre nostre aduis & volonté , tesmoins les esternuemens , baaillemens , seignées , larmes , hoquets & fluxions , qui ne sont de nostre liberté : l'esprit qui oublie , se souuient , croit , mescroit , & la volonté , mesmes qui veut souuent ce que nous voudrions qu'elle ne voulust pas , mais externes & apparentes : le visage rougit , pallist , blesmist , le corps engresse & amegrist , le poil grisonne , noircit , blanchist , croist , se herisse , la peau fremit sans & contre vostre consentement. A cause qu'en cela se monstre plus au vray la pourceté & foiblesse humaine ? si faict elle au manger , boire , douloir , laisser , se

descharger, mourir, dont l'on n'a pas de honte. Quoy que ce soit l'action n'est aucunement en foy & par nature honteuse ; elle est vrayement naturelle , & non la honte , tesmoins les bestes , que dis-je les bestes ? la nature humaine, dit la Theologie , se maintenant en son premier originel estat , n'y eust senty aucune honte ; comme de faict , d'où vient la honte que de foiblesse , & la foiblesse , que du peché , n'y ayant rien en nature & de foy honteux.

Ceste action donc en foy & simplement prinse n'est point honteuse ny virieuse , puis que naturelle & corporelle , non plus que les autres pareilles actions : mais ce qui la faict tant descrier est que tres-rarement y est gardée moderation , & que pour se faire valoir & paruenir à ses exploits , elle faict de grands remuëmens , se sert de tres-mauuais moyens , & entraîne apres , ou bien fait marcher deuant , grande suite de maux , tous pires que l'action voluptueuse : les despens montent plus que le principal , c'est pescher comme l'on dit en filets d'or & de pourpre. Et tout cela est purement humain , les bestes qui suiuent la simple nature sont nettes de tout ce tracas. Mais l'art humaine d'une part en fait vn grand guare , guäre , plante à la porte la honte pour en desgouter : d'autre part y eschauffe & esguise l'enuie , inuente , remuë , trouble , & renuerse tout pour y arriuer, (tesmoin la poésie qui ne rit point ,

comme en ce subject, & les inuentions sont mouffes en toute autre chose) & trouue meilleure toute autre entrée, que par la porte & legitime voye, & tout autre moyen escarté, que le commun du mariage.

*Auis & remedes particuliers contre ce vice
font au l. 3. c. 41.*

CHAPITRE XXV.

Desirs, Cupiditez.

IL ne naist, & ne s'esleue point tant de flots & d'ondes en la mer, comme de desirs au cœur de l'homme, c'est vn abisme, il est infiny, diuers, inconstant, confus, & irresolu, souuent horrible & detestable, mais ordinairement vain & ridicule en ses desirs.

Mais auant toute œuure, ils sont bien à distinguer : Les vns sont naturels, ceux cy sont justes & legitimes, sont mesmes aux bestes, sont limités & courts; l'on en voit le bout; selon eux personne n'est indigent: de ceux cy sera parlé cy apres au long, car ce ne sont à vray dire passions. Les autres sont outre nature, procedants de nostre opinion & fantasie, artificiels, superflus, que nous pouuons, pour les distinguer par nom

des autres , appeller cupidités. Ceux cy sont purement humains , les bestes ne sçauent que c'est ; l'homme seul est deregé en ses appetits , ceux cy n'ont point de bout , sont sans fin ; ce n'est que confusion , *desideria naturalia finita sunt ex falsa opinione nascentia : vbi desinant non habent. Nullus enim terminus falso est : via eunti aliquid extremum est , error immensus est.* Dont selon eux personne ne peust estre riche & content. C'est d'eux proprement ce que nous auons dict au commencement de ce chapitre , & que nous entendons icy en ceste matiere des passions. C'est pour ceux cy que l'on suë & trauaille , *ad supervacua sudatur* , que l'on voyage par mer & par terre , que l'on guerroye , que l'on se tuë , l'on se noye , l'on se trahyst , l'on se perd , dont a esté tres-bien dict , que cupidité estoit racine de tous maux. Or il aduient souuent (juste punition) que cherchans d'assouir ses cupidités , & se saouler des biens & plaisirs de la fortune , l'on perd & l'on se priue de ceux de la nature , dont disoit Diogenes à Alexandre apres auoir refusé son argent , que pour tout bien , il se retirast de son soleil.



CHAPITRE XXVI.

Espoir, Desespoir.

LEs desirs & cupidités s'eschauffent & redoublent par l'esperance, laquelle allume de son doux vent nos fols desirs, embrase en nos esprits vn feu d'une espeffe fumée, qui nous esblouit l'entendement; & emportant avec soy nos pensées, les tient pendues entre les nuës, nous fait songer en veillant. Tant que nos esperances durent, nous ne voulons point quitter nos desirs: au contraire quand le desespoir s'est logé chés nous, il tourmente tellement nostre ame, de l'opinion de ne pouvoir obtenir ce que nous desirons, qu'il faut que tout luy cede, & que pour l'amour de ce que nous pensons ne pouvoir obtenir, nous perdions mesmes le reste de ce que nous possedons. Ceste passion est semblable aux petits enfants, qui par despit de ce que l'on leur oste vn de leurs jouëts, jettent les autres dedans le feu: elle se fasche contre soy mesme, & exige de soy la peine de son malheur. Apres les passions qui regardent le bien apparent, venons à celles qui regardent le mal.

CHAPITRE XXVII.

De la Cholere.

LA cholere est vne folle passion, qui nous pousse entierement hors de nous, & qui cherchant le moyen de repousser le mal qui nous menace, ou qui nous a desja attainct, faict boüillir le sang en nostre cœur, & leue des furieuses vapeurs en nostre esprit, qui nous aueuglent, & nous precipitent à tout ce qui peut contenter le desir que nous auons de nous venger. C'est vne courte rage, vn chemin à la manie, par sa prompte impetuosité & violence, elle emporte, & surmonte toutes passions, *repentina & vniuersa vis ejus est.*

Les causes qui disposent à la cholere sont foiblesse d'esprit, comme nous voyons par experience les femmes, vieillards, enfans, malades estre plus choleres, *inualidum omne natura querulum est*: l'on se trompe de penser qu'il y a du courage où y a de la violence, les mouuements violens ressemblent aux efforts des enfans & des vieillards, qui courent quand ils pensent cheminer, il n'y a rien si foible qu'un mouuement desreiglé, c'est lascheté & foiblesse que se colerer. Maladie d'esprit, qui le rend tendre & facile aux coups comme

les parties vlcérées au corps, où la santé intéressée s'estonne & blesse de peu de chose. *nusquam sine querela agra tanguntur* : la perte d'un denier, ou l'omission d'un gain, met en cholere un auare : un rire, ou regard de sa femme courrouce un jaloux : Le luxe, la vaine delicateffe, ou amour particulier, qui rend l'homme chagrin & despitieux, le met en cholere, pour peu qu'il luy arriue mal à propos, *nulla res magis iracundiam alit quam luxuria* : cest amour de petites choses, d'un verre, d'un chien, d'un oyseau, est un'espece de folie qui nous trauaille, & nous jette souvent en cholere : Curiosité trop grande, *qui nimis inquit, seipsum inquietat* : C'est aller quester, & de gayeté de cœur se jeter en la cholere, sans attendre qu'elle vienne, *sæpe ad nos ira venit, sæpius nos ad illam* : Legereté à croire le premier venu : Mais la principale & formelle c'est l'opinion d'estre mesprisé, & autrement traicté que ne deuons, ou de fait ou de parolle & contenance, c'est d'où les choleres se pretendent justifier.

Ses signes & symptomes sont tres-manifestes, & plus que de tout'autre passion, & si estranges qu'ils alterent & changent l'estat entier de la personne, le transforment & defigurent, *ut sit difficile vtrum magis detestabile vitium aut deformitas* : Les vns sont externes, la face rouge & difforme, les yeux enflambés, le regard furieux,

l'oreille sourde, la bouche escumante, le cœur haletant, le poulx fort esmeu, les venes enflées, la langue begayante, les dents serrées, la voix forte & enrouée, le parler præcipité, bref elle met tout le corps en feu & en fieuve. Aucuns s'en sont rompus les veines, l'vrine leur a esté supprimée, la mort s'en est ensuiuite. Quel doit estre l'estat de l'esprit au dedans, puis qu'il cause vn tel desordre au dehors? La cholere du premier coup en chasse & banist loing la raison & le jugement, afin que la place lui demeure toute entiere: puis elle remplit tout de feu, fumée, tenebres, bruit, semblable à celuy qui mist le maistre hors la maison, puis y mist le feu, & se brusta vif dedans, & comm'vn nauire qui n'a ny gouuernail, ny patron, ny voiles, ny auiron, qui court fortune à la mercy des vagues, vents, & tempestes, au milieu de la mer courroucée.

Les effects sont grands, souuent bien misérables & lamentables: la cholere premierement nous pousse à l'injustice, car elle se despite & s'esguise par opposition juste, & par la cognoissance que l'on a de s'estre courroucé mal à propos. Celuy qui est esbranlé & courroucé sous une fausse cause, si l'on luy presente quelque bonne deffense ou excuse, il se despite contre la verité & l'innocence, *pertinaciores nos facit iniquitas ira, quasi argumentum*

fit justè irascendi , graviter irasci. L'exemple de Pise sur ce propos est bien notable , lequel, excellent d'ailleurs en vertu (cette histoire est assez connue) meü de cholere, en fist mourir trois injustement , & par vne trop subtile accusation les rendist coupables pour en auoir trouué vn innocent contre sa premiere sentence. Elle s'esguise aussi par le silence & la froideur par où l'on pense estre desdaigné , & soy & sa cholere : ce qui est propre aux femmes , lesquelles souuent se courroucent , afin que l'on se contre-courrouce , & redoublent leur cholere jusques à la rage , quand elles voyent que l'on ne daigne nourrir leur courroux : ainsi se monstre bien la cholere estre beste sauvage , puis que ny par defense ou excuse, ny par non defense , silence , elle ne se laisse gaigner ny adoucir. Son injustice est aussi en ce qu'elle veut estre juge & partie , qu'elle veut que tous soient de son party , & s'en prend à tous ceux qui ne lui adherent. Secondement pource qu'elle est inconsiderée & estourdie , elle nous jette & precipite en de grands maux , & souuent en ceux mesmes que nous fuyons , ou procurons à autrui , *dat pœnas dum exigit* , ou autres pires. Cette passion ressemble proprement aux grandes ruynes , qui se rompent sur ce , sur quoy elles tombent : elle desire si violemment le mal d'autrui , qu'elle ne prend pas garde à esuiter le sien : elle nous

entraue & nous enlace, nous fait dire & faire choses indignes, honteuses & meffcantes. Finalement elle nous emporte si outrément, qu'elle nous fait faire des choses scandaleuses & irreparables, meurtres, empoisonnemens, trahisons, dont apres s'ensuyuent de grands repentirs : tefmoin Alexandre le grand, dont disoit Pythagoras que la fin de la cholere estoit le commencement du repentir.

Ceste passion se paist en soy, se flatte & se chatoüille, voulant persuader qu'elle a raison, qu'elle est juste, s'excusant sur la malice & indiscretion d'autrui : mais l'injustice d'autrui ne la sçauroit rendre juste, ny le dommage que nous receuons d'autrui, nous la rendre utile : elle est trop estourdie pour rien faire de bien : elle veut guarir le mal par le mal : donner à la cholere la correction de l'offense, seroit corriger le vice par soy mesme. La raison qui doit commander en nous ne veut point de ces officiers là qui font de leur teste sans attendre son ordonnance ; elle veut tout faire par compas comme la nature, & pource la violence ne luy est pas propre. Mais quoy dirés vous, la vertu verra elle l'insolence du vice sans se despiter ? aura elle si peu de liberté, qu'elle ne s'aüse courroucer contre les meschans ? la vertu ne veut point de liberté indecente ; il ne faut pas qu'elle tourne son courage contre soy, ny que le mal d'autrui la puisse troubler ;

Le sage doit aussi bien supporter les vices des meschans sans cholere, que leur prosperité sans enuie : Il faut qu'il endure les indiscretions des temeraires avec la mesme patience, que le medecin fait les iniures du phrenetique : il n'y a pas plus grande sagesse ny plus vtile au monde que d'endurer la folie d'autrui, car autrement il nous arriue que pour ne la vouloir pas endurer, nous la faisons nostre. Cecy qui a esté dit si au long de la cholere, conuient aussi aux passions suyuant, haine, enuie, vengeance, qui sont choleres formées.

Auis & remedes particuliers contre ce mal sont
l. 3. c. 31.

CHAPITRE XXVIII.

Hayne.

HAYNE est vne estrange passion qui nous trouble estrangement & sans raison, & qu'y a-il au monde qui nous tourmente plus que cela ? Par ceste passion nous mettons en la puissance de ce que nous hayssons, de nous affliger & vexer, la veüe nous en esmeut les sens, la souuenance nous en agite l'esprit, & veillant & dormant. Nous nous le representons avec yn despit & grincement de dents, qui
nous

nous met hors de nous, & nous deschire le cœur, & par ce moyen receuons en nous mesmes la peine du mal que nous voulons à autrui: celui qui hait est patient; le hay est agent, au rebours du son des mots: le hayneur est en tourment, le hay est à son aise. Mais que hayssons nous? les hommes? les affaires? Certes nous ne hayssons rien de ce que nous devons: Car s'il y a quelque chose à hayr en ce monde, c'est la hayne mesmes, & semblables passions contraires à ce qui doit commander en nous: Il n'y a au monde que cela de mal pour nous.

Auis particuliers contre ce mal sont l. 3. c. 32.



CHAPITRE XXIX.

Enuie.

ENUIE est sœur germaine de la hayne, miserable passion & beste farousche, qui passe en tourment toutes les gehennes: c'est vn regret du bien que les autres possèdent, qui nous ronge fort le cœur; elle tourne le bien d'autrui en nostre mal: comment nous doit elle tourmenter, puis que & le bien & le mal y contribue? Pendant que les enuieux regardent de trauers les biens d'autrui, ils laissent gaster le leur, & en perdent le plaisir. *Auis & remedes particuliers contre ce mal sont l. 3. c. 33.*

Tome I.

I

CHAPITRE XXX.

Jalousie.

JALOUSIE est passion presque toute semblable & de nature & d'effect à l'enuie, si non qu'il semble que par l'enuie, nous ne considerons le bien qu'en ce qu'il est arriué à vn autre, & que nous le desirons pour nous, & la jalousie est de nostre bien propre, auquel nous craignons qu'un autre participe.

Jalousie est maladie d'ame foible, sottise & inepte, maladie terrible & tyrannique; elle s'insinue sous tiltre d'amitié; mais apres estre en possession, sur les mesmes fondemens de bienveillance, elle bastit vne haine capitale: la vertu, la santé, le merite, la reputation sont les bouttefeus de ceste rage.

C'est aussi vn fiel qui corrompt tout le miel de nostre vie: elle se-messe ordinairement es plus douces & plaisantes actions: lesquelles elle rend si aigres & ameres que rien plus: elle change l'amour en haine, le respect en desdain, l'assurance en deffiance: elle engendre vne curiosité pernicieuse de se vouloir esclairsir de son mal, auquel il n'y a point de remede qui ne l'empire & ne l'engrege: car ce n'est que le publier, arracher de

l'ombre & du doute, pour le mettre en lumiere & le trompeter par tout, & estendre son malheur jusques à ses enfans.

Aduis & remedes particuliers contre ce mal sont
L. 3. c. 35.

CHAPITRE XXXI.

Vengeance.

LE desir de vengeance est premierement passion lasche & effeminée, d'ame foible & basse, pressée, & foulée, tesmoin que les plus foibles ames sont les plus vindicatives & malicieuses, comme des femmes & enfans; les fortes & genereuses n'en sentent gueres, la mesprisent & desdaignent, ou pource que l'injure ne les touche pas, ou pource que l'injuriant n'est digne qu'on s'en remue, l'on se sent beaucoup au dessus de tout cela, *indignus Cæsaris ira*; les gresles, tonnerres & tempestes, & tout le bruit qui se faict en l'air, ne trouble ny ne touche les corps superieurs & celestes, mais seulement les inferieurs & caduques; ainsi les indiscretions & petulences des fols ne heurtent point les grandes & hautes ames: tous les grands, Alexandre, Cesar, Epaminondas, Scipion ont esté si esloignés de ven-

geance, qu'au contraire ils ont bien fait à leurs ennemis.

Secondement elle est cuifante & mordante, comme vn ver qui ronge le cœur de ceux qui en sont infectés, les agite de jour, les reveille de nuit.

Elle est aussi pleine d'injustice, car elle tourmente l'innocent, & adjouste affliction : c'est à faire à celuy qui a fait l'offense de sentir le mal & la peine que donne au cœur le desir de vengeance, & l'offense s'en va charger, comme s'il n'auoit pas assez de mal de l'injure là receüe, tellement que souuent & ordinairement cependant que cestuy-cy se tourmente à chercher les moyens de la vengeance, celuy qui a fait l'offence rit & se donne du bon temps. Mais elle est bien plus injuste encores aux moyens de son execution, laquelle souuent se fait, par trahisons & vilains artifices.

Finalement l'execution outre qu'elle est penible, elle est tres-dangereuse; car l'experience nous apprend que celuy qui cherche à se venger, il ne fait pas ce qu'il veust, & son coup ne porte pas; mais ordinairement il aduient ce qu'il ne veut pas, & pensant creuer vn œil à son ennemi, il se creue tous les deux: le voila en crainte de la justice & des amis de sa partie, en peine de se cacher & fuir de lieu en autre,

Au reste, tuer & acheuer son ennemy, ne peut estre vengeance, mais pure cruauté, qui vient de couardise & de crainte; se venger c'est le battre, le faire bouquer & non pas l'acheuer: le tuant l'on ne luy faict pas ressentir son courroux, qui est la fin de la vengeance. Voila pourquoy l'on n'attaque pas vne pierre, vne beste, car elles sont incapables de gouster nostre reuanche. En la vraye vengeance il faut que le vengeur y soit pour en recevoir du plaisir, & le vengé pour sentir & souffrir du desplaisir & de la repentance. Estant tué il ne s'en peust repentir, voire il est à l'abry de tout mal, ou au rebours le vengeur est souuent en peine & en crainte. Tuer donc est tesmoignage de couardise & de crainte, que l'offensé se ressentant du desplaisir nous recherche de pareille: l'on s'en veust defaire du tout, & ainsi c'est quitter la fin de la vengeance, & blesser sa reputation; c'est vn tour de precaution & non de courage, c'est y proceder seurement & non honorablement, *qui occidit longè, non vlciscitur nec gloriam acquiritur.*

Auis & remedes particuliers contre ce mal
sont l. 3. c. 34.



CHAPITRE XXXII.

Cruauté.

C'EST un vilain & detestable vice que la cruauté & contre nature, dont aussi est il appelé inhumanité.

La cruauté vient & est fille de couardise ; la vaillance s'exerce seulement contre la résistance, & s'arreste voyant l'ennemy à sa mercy, *Romana virtus parcere subjectis, debellare superbos* ; la lascheté ne pouuant estre de ce roolle, pour dire qu'elle en est, prend pour sa part le sang & le massacre : les meurtres des victoires s'exercent ordinairement par le peuple & officiers du bagage. Les cruels, aspres & malicieux sont lasches & poultrons : les tyrans sont sanguinaires, pource qu'ils craignent, & ne peuvent s'asseurer qu'en exterminant ceux qui les peuvent offenser, dont ils s'attaquent à tous jusques aux femmes, car ils craignent tous, *cuncta ferit dum cuncta timet* : les chiens couards mordent & dechirent dans la maison les peaux des bestes sauvages, qu'ils n'ont ausé attaquer aux champs. Qui rend les guerres çviles & populaires si cruelles, sinon que c'est la canaille & lis du peuple qui les meine ? l'Empereur Maurice

aduerty qu'un soldat Phocas le deuoit tuer , s'enquist qui il estoit & de quel naturel , & luy ayant esté dict par son gendre Philippes , qu'il estoit lasche & couard , il conclud qu'il estoit meurtrier & cruel. Elle vient aussi de malignité interne d'ame , qui se plaist & delecte au mal d'autrui , monstres , comme Caligula.

CHAPITRE XXXIII.

Tristesse,

TRISTESSE est vne langueur d'esprit, & vn descouragement engendré par l'opinion que nous sommes affligés de grands maux : c'est vne dangereuse ennemie de nostre repos ; qui flectrit incontinent nostre ame , si nous n'y prenons garde , & nous oste l'vsage de discours & le moyen de pouruoir à nos affaires , & avec le temps enrouille & moistit l'ame , abatardit tout l'homme , endort & assoupist sa vertu , lors qu'il se faudroit esuciller pour s'opposer au mal qui le meine & le presse. Mais il faudroit descourir la laideur & folie , & les pernicieux effects , voire l'injustice qui est en ceste passion couarde , basse & lasche , afin d'apprendre à la hayr & fuir de toute sa puissance , comme tres-indigne des sages ,

felon la doctrine des Stoiciens. Ce qui n'est pas du tout tant aisé à faire , car elle s'excuse & se couvre de belles couleurs de nature , pieté , bonté , voire la pluspart du monde tasche à l'honorer & fauoriser ; ils en habillent la sagesse , la vertu , la conscience.

Or premierement tant s'en faut qu'elle soit naturelle , comme elle veut faire croire , qu'elle est partie formelle & ennemie de la nature , ce qui est aisé à monstrier. Quant aux tristes-tes ceremonieuses & dueils publics tant affectés & pratiqués par les anciens , & encores à present presque par tout , quelle plus grande imposture & plus vilaine happelourde pourroit on trouuer par tout ailleurs ? combien de feintes & mines contrefaites & artificielles , avec coust & despenſe , & en ceux là à qui le fait touche & qui jouent le jeu , & aux autres qui s'en approchent & font les officieux ? Mais encores pour accroistre la fourbe on louë des gens pour venir pleurer & jeter des cris & des plainctes , qui sont au ſceude tous toutes feintes & extorquées avec argent , larmes qui ne sont jettées que pour estre veuës , & tarissent si tost qu'elles ne sont plus regardées , où est ce que nature apprend cela ? Mais qu'est ce que nature abhorre & condamne plus ? c'est l'opinion (mere nourrisſe , comme dict est , de la plus part des passions) tyrannique , fausse & populaire , qui enseigne qu'il faut pleurer en tel

cas. Et si l'on ne peut trouuer des larmes & tristes mines chés soy, il en faut achepter à beaux deniers comptans chés autrui; tellement que pour bien fatisfaire à ceste opinion, faut entrer en grande despense, de laquelle Nature, si nous la voulions croire, nous descharge-roit volontiers. Est ce pas volontairement & tout publiquement trahyr la raison, forcer & corrompre la nature, prostituer sa virilité, & se moquer du monde & de soy mesme, pour s'afferuir au vulgaire, qui ne produict que erreur, & n'estime rien qui ne soit fardé & desguisé? Les autres tristesses particulieres ne sont non plus de la Nature, comme il semble à plusieurs, car si elles procedoient de la Nature, elles seroient communes à tous hommes, & les toucheroient à peu pres tous également: or nous voyons que les mesmes choses qui attristent les vns, resiouyssent les autres, qu'une prouince & une personne rit de ce dont l'autre pleure: que ceux qui sont pres des autres qui se lamentent, les exortent à se resoudre & quitter leurs larmes. Escoutés la plus part de ceux qui se tourmentent; quand vous aués parlé à eux, ou qu'eux mesmes ont prins le loisir de discourir sur leurs passions, ils confessent que c'est folie que de s'attrister ainsi, & louëront ceux qui en leurs aduersités auront fait teste à la fortune, & opposé vn courage masle & genereux à leurs afflictions. Et il est

certain que les hommes n'accoutument pas leur deuil à leur douleur, mais à l'opinion de ceux avec lesquels ils vivent : & si l'on y regarde bien, l'on remarquera, que c'est l'opinion, qui pour nous ennuyer nous représente les choses qui nous tourmentent, ou plustost qu'elles ne doivent; mais par anticipation, crainte & apprehension de l'aduenir, ou plus qu'elles ne doiuent.

Mais elle est bien contre nature, puis qu'elle enlaidist & efface tout ce que nature a mis en nous de beau & d'aymable, qui se font à la force de ceste passion, comme la beauté d'une perle se dissout dedans le viuaigne : c'est pitié lors que de nous voir, nous en allons la teste baissée, les yeux fichés en terre, la bouche sans parole, les membres sans mouuemens; les yeux ne nous seruent que pour pleurer, & diris que nous ne sommes rien que des statues suantes, & comme Niobe, que les Poëtes disent auoir esté conuertie en pierre par force de plourer.

Or elle n'est pas seulement contraire & ennemie de nature, mais elle s'attaque encores à Dieu, car qu'est elle autre chose qu'une plainte temeraire & outrageuse contre le seigneur de l'univers, & la loy commune du monde, qui porte que toutes choses qui sont sous le ciel de la lune sont muables & perissables? Si nous scauons ceste loy, pourquoy

Nous tourmentons-nous ? si nous ne la sçauons, dequoy nous plaignons nous , sinon de nostre ignorance de ne sçauoir ce que nature a escrit par tous les coings du monde ? Nous sommes icy non pour donner la loy , mais pour la receuoir , & suyure ce que nous y trouuons estably , & nous tourmentant au contraire , ne sert que nous donner double peine.

Après tout cela elle est tres-pernicieuse & dommageable à l'homme , & d'autant plus dangereuse , qu'elle nuist sous couleur de profiter ; sous un faux semblant de nous secourir , elle nous offence ; de nous tirer le fer de la playe , l'enfonce jusques au cœur : & ses coups sont d'autant plus difficiles à parer , & ses entreprises à rompre , que c'est un ennemi domestique , nourry & esleué chés nous , que nous auons mesmes engendré pour nostre peine.

Au dehors , par sa deformité & contenance nouvelle , toute alterée & contrefaite , elle deshonne & infame l'homme : prenés garde quand elle entre chés nous , elle nous remplit de honte , tellement que n'auons nous monstres en public , voire mesmes en particulier à nos amis : depuis que tous sommes une fois saisis de ceste passion , nous ne cherchons que quelque coin pour nous accroupir & muser de la veüe des hommes. Qu'est ce à dire cela ? sinon qu'elle se condamne soy mesmes , & recognoist combien elle est indécente ; ne diriez vous pas que

c'est quelque femme surprise en desbauche , qui se cache & craint d'estre recogneue ? Apres, regardés ses vestemens & ses habits de dueil , estranges & effeminés , qui monstrent que la tristesse oste tout ce qu'il y a de masse & genereux & nous donne toutes les contenance & infirmités des femmes. Aussi les Thraces habilloient en femmes les hommes qui estoient en dueil : & dict quelqu'un , que la tristesse rend les hommes eunuques : les loix Romaines premieres, plus massés & genereuses, deffendoient ces effeminées lamentations , trouuant horrible de se desnaturer de ceste façon , & faire chose contraire à la virilité , permettant seulement ces premieres larmes qui sortent de la premiere poincte , d'une fresche & rescente douleur , qui peuuent tomber mesmes des yeux des philosophes qui gardent avec l'humanité la dignité, qui peuuent tomber des yeux sans que la vertu tombe du cœur.

Or non seulement elle fane le visage , change & desguise deshonnestement l'homme au dehors ; mais penetrant jusqu'à la mouëlle des os , *Tristitia exsiccat ossa* , flectrit aussi l'ame , trouble son repos , rend l'homme inepte aux choses bonnes & dignes d'honneur , lui ostant le goust , l'enuie & la disposition à faire chose qui vaille & pour soy & pour autrui , & non seulement à faire le bien , mais encores à le recevoir. Car mesmes les bonnes fortunes qui luy arriuent luy

desplaisent ; tout s'aigrit en son esprit , comme les viandes en l'estomach desbauché : Bref ennelle nostre vie , & empoisonne toutes nos actions.

Elle a ses degrés , la grande & extreme , ou bien qui n'est pas du tout telle de soy , mais qui est arriuée subitement par surprinse & chaude allarme , faislit , translit , rend perclus de mouvement & sentiment comme vne pierre , à l'instar de ceste miserable mere Niobe.

*Dirigit visu in medio , calor ossa reliquit ,
Labitur , & longo vix tandem tempore fatur .*

Dont le peintre representant diversément , & par degrés le dueil des parens & amis d'Iphigenia en son sacrifice ; quand ce vient au pere , il le peignit le visage couuert , comme ne pouvant l'art suffisamment exprimer ce dernier degré de dueil : voire quelquesfois tue tout à fait : la mediocre ou bien la plus grande , mais qui par quelque laps de temps s'est relasché , s'exprime par larmes , sanglots , soursirs , plainctes.

Curæ leues loquuntur , ingentes stupent.

Aduis & remedes particuliers contre ce mal sont
l. 3. c. 29.



CHAPITRE XXXIV.

Compassion.

NOUS soupirons avec les affligés , compatissons à leur mal , ou pource que par vn secret consentement nous participons au mal les uns des autres , ou bien que nous craignons en nous mesmes ce qui arriue aux autres.

Or c'est passion d'ame foible ; c'est une sottise & feminine pitié , qui vient de mollesse & foiblesse d'ame esmeuë & troublée ; elle loge volontiers aux femmes , enfans , aux ames cruelles & malicieuses (qui sont par consequent laches & couardes , comm' a esté dict en la cruauté) qui ont pitié des meschans qui sont en peine , dont elle produict des effects injustes , ne regardant qu'à la fortune , estat & condition presente , & non au fonds & merite de la cause.

Auis particuliers contre ce mal sont l. 3. c. 30.

CHAPITRE XXXV.

Crainte.

LA crainte est l'apprehension du mal aduenir , laquelle nous tient perpetuellement en ceruelle , & deuance les maux dont la fortune nous menace.

C'est une passion fausse & malicieuse , & ne peust rien sur nous qu'en nous trompant & seduisant : elle se sert de l'aduenir , où nous ne voyons goutte , & nous jette là dedans comme dedans un lieu obscur , ainsi que les larrons font la nuit , afin d'entreprendre sans estre recognus , & donner quelque grand effray avec peu de subject ; & là elle nous tourmente avec des masques de maux , comme l'on faict des fées aux petits enfans ; maux qui n'ont qu'une simple apparence, & n'ont rien en soy pour nous nuire, & ne sont maux que pource que nous les pensons tels. C'est la seule apprehension que nous en auons , qui nous rend mal ce qui l'est pas , & tire de notre bien mesmes , du mal pour nous en affliger. Combien en voyons nous tous les jours qui, de craincte de deuenir miserables , le sont deuenus tout à faict , & ont tourné leurs vaines peurs en certaines miseres ? Combien qui ont perdu leurs amis pour s'en deffier ? Combien de malades de peur de l'estre ? Tel a tellement appréhendé que sa femme luy faussoit la foy , qu'il en est seiché de langue ; tel a tellement appréhendé la poureté , qu'il en est tombé malade. Bref , il y en a qui meurent de la peur qu'ils ont de mourir : & ainsi peut on dire de tout ce que nous craignons ou de la pluspart ; la crainte ne sert qu'à nous faire trouuer ce que nous fuyons. Certes la craincte est de tous maux le plus grand &

le plus fascheux ; car les autres maux ne sont maux que tant qu'ils sont , & la peine n'en dure que tant que dure la cause ; mais la crainte est de ce qui est , & de ce qui n'est point , & de ce qui par aduventure ne sera jamais , voire quelquesfois de ce qui ne peut du tout estre. Voila donc une passion ingenieusement malicieuse & tyrannique , qui tire d'un mal imaginaire des vraies & bien poignantes douleurs , & puis fort ambitieuse de courir au deuant des maux , & les deuancer par pensée & opinion.

La crainte non seulement nous remplit de maux , & souuent à fausses enseignes , mais encore elle gaste tout le bien que nous auons , & tout le plaisir de la vie , ennemie de nostre repos : il n'y peut auoir de plaisir de jouir du bien que l'on craint de perdre ; la vie ne peut estre plaisante , si l'on craint de mourir : le bien , disoit un ancien , ne peut apporter plaisir , sinon celuy à la perte duquel l'on est préparé.

C'est aussi vne estrange passion indiscrete & inconsiderée ; elle vient aussi souuent de faute de cœur ; elle vient des dangers , & souuent elle nous jette dedans les dangers. Car elle engendre vne faim inconsiderée d'en sortir , & ainsi nous estonne , trouble & empesche de tenir l'ordre qu'il faut pour en sortir ; elle apporte vn trouble violent , par lequel l'ame effrayée se retire en soy mesme , & se debat

pour ne voir le moyen d'eiter le danger qui se presente. Outre le grand descouragement qu'elle apporte , elle nous faïst d'un tel estonnement , que nous en perdons le jugement , & ne se trouue plus de discours en nous , nous fait fuir sans qu'aucun nous poursuiue , voire souuent nos amis & le secours ; *adeo pavor etiam auxilia formidat* : Il y en a qui en sont venus insensés , voir mesme les sens n'ont plus leur vsage ; nous auons les yeux ouuerts & n'en voyons pas ; on parle à nous & nous n'escoutons pas ; nous voulons fuir & ne pouuons marcher.

La mediocre nous donne des aisles aux talons , la plus grande nous cloue les pieds & les entraue. Ainsi la peur renverse & corrompt l'homme entier & l'esprit : *pavor sapientiam omnem mihi ex animo expellorat* ; & le corps , *obstupui , steteruntque comæ , vox faucibus hæsit* : Quelquefois tout à coup pour son seruice , elle se jette au desesper , nous remet à la vaillance , comme la Legion Romaine sous le Consul Sempronius contre Annibal. Il y a bien des peurs & frayeurs sans aucune cause apparente , & comme d'une impulsion celeste , qu'ils appellent terreurs paniques : *Terrores de cælo , arescentibus hominibus præ timore* , telle qu'aduint une fois en la ville de Carthage : des peuples & des armées entieres en sont quelquesfois frappées. *Aduis & remedes particuliers contre ce mal* sont l. 3 , c. 28.



Q U A T R I E M E C O N S I D E R A T I O N

DE L'HOMME, QUI EST PAR SA VIE.



C H A P I T R E , X X X V I ,

*Æstimation , Brefuete , Description de la vie
humaine & ses parties.*

C'EST vn premier & grand poinct de sagesse, de sçauoir bien justement estimer la vie, la tenir & conseruer, la perdre ou quitter, la garder & conduire autant & comm' il faut: il n'y a peut-être chose en quoy l'on faille plus & où l'on soit plus empesché. Le vulgaire sot, imperit, l'estime un souuerain bien, & la prefere à toutes choses, jusqu'à la racheter & l'allonger de quelque delay, à toutes les conditions que l'on voudra, pensant qu'elle ne sçauroit estre trop cherement achetée: car c'est tout; c'est son mot: *vitâ nihil carius*; il estime & ayme la vie pour l'amour d'elle mesme; il ne vist que pour viure. Ce n'est merueille s'il faut en tout le reste, & s'il est tout

confit en erreurs , puis que dès l'entrée & en ce premier point fondamental , il se mesconte si lourdement. Elle pourroit bien aussi estre trop peu estimée , par insuffisance ou orgueilleuse mescognoissance ; car tombant en bonnes & sages mains , elle peut estre instrument très-vtile à soy & à autrui. Et ne puis estre de cest aduis prins tout simplement , qui dict qu'il est tres-bon de n'estre point , & que la meilleure vie est la plus courte : *optimum non nasci aut quam citissime aboleri*. Et n'est assez ni sagement dict : quel mal , & qu'importe quand je n'eusse jamais esté ? On lui peut repliquer : où seroit le bien qui en est venu ; & n'estant adueni , ne fust-ce pas esté mal ? C'est espece de mal que faute de bien , quel qu'il soit encores que non nécessaire : ces extremités sont trop extremes & vicieuses , bien qu'inégalement : mais semble il bien vray ce qu'a dict un Sage : que la vie est vn tel bien que personne n'en voudroit , si l'on estoit bien aduertie que c'est , auant la prendre. *Vitam nemo acciperet , si daretur scientibus*. Bien va que l'on y est dedans , auant qu'en voir l'entrée ; l'on y est porté tout auueugleté : or se trouuant dedans , les uns s'y acoquinent si fort , qu'à quelque prix que ce soit , ils n'en veulent pas sortir ; les autres ne font que gronder & se despiter ; mais les Sages voyant que c'est vn marché qui est fait sans eux (car l'on ne vit , ny l'on ne meure pas

quand ny comme l'on veut) ; que bien qu'il soit rude & dur , ce n'est toutesfois pour tousiours , sans regimber & rien troubler , s'y accommodent comme ils peuuent , & s'y conduisent tout doucement , faisans de necessité vertu , qui est le traict de sagesse & habilité , & ce faisant , vivent autant qu'ils doyuent , & non pas tant qu'ils peuuent , comme les fots ; car il y a temps de viure & temps de mourir : & un bon mourir vaut mieux qu'un mal viure , & vist le sage tant que le viure vaut mieux que mourir ; la plus longue vie n'est pas tousiours la meilleure.

Tous se plaignent fort de la brefueté de la vie humaine , non seulement le simple populaire , qui n'en voudroit jamais sortir ; mais encores qui est plus estrange , les grands & sages en font le principal chef de leurs plaintes. A vray dire , la plus grand partie d'icelle estant diuertie & employée ailleurs , il ne reste quasi rien pour elle , car le temps de l'enfance , vieillesse , dormir , maladies d'esprit ou de corps , & tant d'autre inutile & impuissant à faire chose qui vaille , estant desalqué & rabattu , le reste est peu . toutesfois sans y opposer l'opinion contraire qui tient la brefueté de la vie pour un tres-grand bien & don de nature ; il semble que ceste plainte n'a gueres de justice ne de raison , & vient plustost de malice. Que seruiroit vne plus lon-

que vie ? pour simplement viure , respirer , manger , boire , voir ce monde ? que faut il tant de temps ? Nous auons tout veu , sçeu , gousté en peu de temps , le sçachant , le vouloir tousiours ou si long temps practiquer & tousiours recommencer ; à quoy est bon cela ? Qui ne se fauleroit de faire tousiours vne mesme chose ? s'il n'est fascheux , pour le moins est il superflu : c'est vn cercle roulant où les mesmes choses ne font que reculer & s'approcher ; c'est tousiours recommencer & retistre mesme ouurage. Pour y apprendre & profiter dauantage , & paruenir à plus ample cognoissance & vertu ? ô les bonnes gens que nous sommes , qui ne nous cognoistroit ? nous mesnageons tres-mal ce que l'on nous baille , & en perdons la pluspart , l'emploians non seulement à vanité & inutilité , mais à malice & au vice , & puis nous allons crier & nous plaindre , que l'on ne nous en baille pas assés. Et puis que sert ce tant grand amas de science & d'experience , puis qu'il en faut enfin desloger , & deslogeant tout à vn coup oublier & perdre tout , ou bien mieux & autrement sçauoir tout ? Mais dis tu , il y a des animaux qui triplent & quadruplent la vie de l'homme ; je laisse les fables qui sont en cela , mais soit ainsi , aussi y en a-il , & en plus grand nombre , qui n'en approchent pas , & ne vivent le quart de l'homme , & peu y en a-il qui

arriuent à son terme. Par quel droit, raison ou priuilege faut il que l'homme viue plus long temps que tous ? pource qu'il employe mieux & à choses plus hautes & plus dignes sa vie ? Par ceste raison il doit moins viure que tous ; il n'y a point de pareil à l'homme, à mal employer sa vie, en meschanceté, ingratitude, dissolution, intemperance & tout desfreiglement de mœurs, comme a esté dict & monsté cy dessus en la comparaison de luy avec les bestes, tellement que comme je demandois tantost, à quoy seruiroit vne plus longue vie, maintenant je dis, & quels maux au monde, si la vie de l'homme estoit fort longue ? que n'entreprendroit-il puis que la brefueté qui luy coupe le chemin & luy rompt le dé comme l'on dict, & l'incertitude d'icelle qui oste tout courage, ne le peust arrester, viuant comme s'il auoit tousiours à viure ? Il craint bien d'une part se sentant mortel, mais il ne se peut tenir de conuoiter, esperer, entreprendre comme s'il estoit immortel. *Tanquam semper victuri vivitis, nunquam vobis fragilitas vestra succurrit : omnia tanquam mortales timetis, tanquam immortales concupiscitis.* Et puis qu'a besoin nature de toutes ces belles & grandes entreprinſes & occupations, pour lesquelles tu penſes t'appartenir vne plus longue vie qu'à tous animaux ? Il n'y a donc point de ſubject à l'homme de ſe plaindre, mais

bien de se courroucer contre luy : nous auons assez de vie , mais nous n'en sommes pas bons mefnagers ; elle n'est pas courte , mais nous la faisons : nous n'en sommes pas necessiteux , mais prodigues , *non inopes vita sed prodigi*. Nous la perdons , dissipons & en faisons marché , comme de chose de neant & qui regorge , nous tombons tous en l'vne de ces trois fautes : l'employer mal , l'employer à rien , l'employer en vain , *magna vitæ pars elabitur male agentibus , maxima nihil agentibus , tota aliud agentibus*. Personne n'estudie à viure , l'on s'occupe plustost à toute autre chose , l'on ne sçauroit rien bien faire par acquit , sans soin & attention. Les autres reseruent à viure jusques à ce qu'ils ne puissent plus viure ; à jouir de la vie , alors qu'il n'y aura plus que la lie & le marc : quelle folie & misere ? voire y en a qui ont plustost achevé que commencé à viure , & s'en vont sans y auoir bien pensé , *quidam vivere incipiunt cum definendum ; quidam ante desiverunt quam inciperent , inter cetera mala hoc quoque habet stultitia , semper incipit vivere*.

La vie presente n'est qu'une entrée & issue de comedie , vn flux perpetuel d'erreurs , vne tisseure d'aduentures , vne suite de miseres diuerfes enchainées de tous costés ; il n'y a que mal qui coule , que mal qui se prepare , & le mal pousse le mal , comme la vague

pousse l'autre , la peine est toujours presente, & l'ombre de bien nous deçoit ; la bestise & l'aveuglement possede le commendement de la vie , le milieu est tout en peine & travail , la fin en douleur , mais toute entiere en erreur.

La vie humaine a ses incommodités & miseres , communes , ordinaires & perpetuelles : elle en a aussi de particulieres & distinctes , selon que ses parties , aage , & saisons sont differentes , enfance , jeunesse , virilité , vieillesse , chacune a ses propres & particulieres tares.

La plupart du monde parle plus honorablement & fauorablement de la vieillesse , comme plus sage , meure , modérée , pour accuser & faire rougir la jeunesse comme vitieuse , fole , desbauchée ; mais c'est injustement , car à la verité les deffauts & vices de la vieillesse sont en plus grand nombre , & plus grands & importuns que de la jeunesse ; elle nous attache encores plus de rides en l'esprit qu'au visage , & ne se voit point d'ames qui en vieillissant ne sentent l'aigre & le moisi : avec le corps l'esprit s'vse & s'empire , & vient enfin en enfantillage , *bis pueri senes*. La vieillesse est vne maladie neccessaire & puissante , qui nous charge imperceptiblement de plusieurs imperfections ; on veut appeller sagesse vne difficulté d'humeurs , vn chagrin & dégoust
des

des choses presentes, vne impuissance de faire comme deuant, la sagesse est trop noble pour se seruir de tels officiers, vieillir n'est pas assagir, ny quitter les vices, mais seulement les changer, & en pires. La vieillesse condamne les voluptés, c'est pource qu'elle est incapable de les gouter : comme le chien d'Esope, elle dict qu'elle n'en veut point, c'est pource qu'elle n'en peut jouyr; elle ne les laisse pas proprement, ce sont elles qui la desdaignent; elles sont tousiours eniouées & en feste, il ne faut pas que l'impuissance corrompe le jugement, lequel doit en la jeunesse cognoistre le vice en la volupté, & en la vieillesse la volupté au vice. Les vices de la jeunesse sont temerité, promptitude indiscrete, desbauche, & desbordement aux voluptés, qui sont choses naturelles, prouenant de ce sang bouillant, vigueur & chaleur naturelle, & par ainsi excusables, mais ceux de la vieillesse sont bien autres. Les legers sont une vaine & caduque fierté, babyl ennuyeux, humeurs espineuses & insociables, superstition, soyn des richesses lors que l'vsage en est perdu, vne sottise auarice & crainte de la mort, qui vient proprement non de faute d'esprit & de courage, comme l'on dict, mais de ce que le vieillard s'est longuement accoustumé, accommodé & comme acoquiné à ce monde, dont il l'ayme tant, ce qui n'est aux jeunes,

Outre ceux cy il y a enuie , malignité , injustice , mais ce qui a de plus sot & ridicule en elle , est qu'elle se veut faire craindre & redoubter , & pource tient elle vne morgue austere & desdaigneuse , pensant par là extorquer crainte & obeissance ; mais elle se faict mocquer d'elle : car ceste mine fiere & tyrannique est receuë avec moquerie & risée de la jeunesse qui s'exerce à l'affiner & l'amuser , & par dessein & complot luy celer & desguiser la verité des choses. Il y a tant de fautes d'une part en la vieillesse , & tant d'impuissance de l'autre , & est si propre au mespris , que le meilleur acquest qu'elle puisse faire , c'est d'affection & amitié , car le commandement & la crainte ne sont plus ses armes. Il luy sied tant mal de se faire craindre : & quand elle le pourroit , encores doit elle plustost se faire aymer & honorer.





CINQUIEME ET DERNIERE
CONSIDERATION
DE L'HOMME,

*Par les varietez & differences grandes qui
sont en luy, & leurs comparaisons.*



CHAPITRE XXXVII.

De la difference & inégalité des hommes en general.

IL n'y a rien en ce bas monde, où il se trouue tant de differences qu'entre les hommes, & differences si esloignées en même subject & espece. Si l'on en veut croire Pline, Herodote, Plutarque, il y a des formes d'hommes en certains endroits, qui ont fort peu de ressemblance à la nostre : & y en a de mestiffes & ambiguës entre l'humaine & la brutale. Il y a des contrées où les hommes sont sans teste, portans les yeux & la bouche en la poitrine, où ils sont androgynes, où ils marchent de quatre pattes, où ils n'ont qu'un œil au front, & la teste plus semblable à celle d'un chien qu'à la nostre, où ils sont moitié poisson par embas

& vivent en l'eauë, où les femmes accouchent à cinq ans & n'en vivent qu'huit : où ils ont la teste si dure & le front, que le fer n'y peut mordre & rebouche contre, où ils se changent naturellement en loups, en jumens, & puis encores en hommes, où ils sont sans bouche, se nourriffans de la fenteur de certaines odeurs, où ils rendent la semence de couleur noire. Et de nostre temps nous auons descouuert & touché à l'œil & au doigt, où les hommes sont sans barbe, sans vsage de feu, de bled, de vin; où est tenue pour la plus grande beauté ce que nous estimons la plus grande laideur, comme a esté dict deuant. Quant à la diuersité des mœurs se dira ailleurs. Et sans parler de toutes ces estrangetez, nous sçauons que quant au visage, il n'est possible trouuer deux visages en tout & par tout semblables; il peut aduenir de se mesconter & prendre l'un pour l'autre à cause de la ressemblance grande, mais c'est en l'absence de l'un : car en presence de tous deux, il est aisé de remarquer la difference quand bien on ne la pourroit exprimer. Aux ames y a bien plus grande difference, car non seulement elle est plus grande sans comparaison d'homme à homme, que de beste à beste : mais (qui est bien encherir) il y a plus grande difference d'homme à homme que d'homme à beste : car vn excellent animal est plus approchant de l'homme de la plus basse marche,

que n'est cest homme d'un autre des grand & excellent. Ceste grande difference des hommes vient des qualités internes & de la part de l'esprit, où y a tant de pieces, tant de ressorts que c'est chose infinie, & des degrés sans nombre. Il nous faut ici, pour le dernier, apprendre à cognoistre l'homme, par les distinctions & differences qui sont en luy: or elles sont diuerfes selon qu'il y a plusieurs pieces en l'homme, plusieurs raisons & moyens de les considerer & comparer. Nous en donnerons icy cinq principales, auxquelles toutes les autres se pourront rapporter, & generalement tout ce qui est en l'homme, esprit, corps, naturel, acquis, public, priué, apparent, secret: & ainsi ceste cinquiesme & derniere consideration de l'homme aura cinq parties, qui seront cinq grandes & capitales distinctions des hommes, sçauoir la

Premiere naturelle, & essentielle, & vniuerselle de tout l'homme, esprit & corps.

La seconde naturelle & essentielle principalement, & aucunement acquise de la force & suffisance de l'esprit.

La tierce accidentale de l'estat, condition & deuoir, tirée de la superiorité & inferiorité.

La quatriesme accidentale de la condition & profession de vie.

La cinquiesme & derniere des faueurs & defaueurs de la nature & de la fortune.

K 3

CHAPITRE XXXVIII.

Premiere distinction & difference des hommes , naturelle & essentielle , tirée de la diuerse assiette du monde.

LA premiere plus notable & vniuerselle distinction des hommes , qui regarde l'esprit & le corps , & tout l'estre de l'homme , se prend & tire de l'assiette diuerse du monde , selon laquelle le regard & l'influence du ciel & du Soleil , l'air , le climat , le terroir sont diuers. Aussi sont diuers non seulement le teint , la taille , la complexion , la contenance , les mœurs , mais encores les facultés de l'ame , *plaga cœli non solum ad robur corporum , sed & animorum facit. Athenis cœlum ex quo etiam acutiores Attici , crassum Thæbis , idco pingues Thebani & valentes.* Dont Platon remercioit Dieu qu'il estoit né Athenien & non Thebain.

Tales sunt hominum mentes , quali pater ipse Iuppiter auctifera lustravit lampade terras.

Ainsi que les fruiçts & les animaux naissent diuers selon les diuerses contrées , aussi les hommes naissent plus ou moins belliqueux , justes , temperans , dociles , religieux , chastes , ingenieux , bons , obeissans , beaux , sains , forts. C'est pourquoy Cyrus ne voulust accorder aux Perses d'abandonner leurs pays aspre & bossu , pour aller en un autre doux &

plain, disant que les terres grasses & molles font les hommes mols, & les fertils les esprits infertils.

Suyuant ce fondement nous pouuons en gros partager le monde en trois parties, & tous les hommes en trois sortes de naturel : nous ferons donc trois assiettes generales du monde, qui sont les deux extremités de midy & nort, & la moienné. Chaque partie & assiette sera de soixante degrés, l'une de midy est souz l'Æquateur, trente degrés deça & trente delà, c'est à dire tout ce qui est entre les deux Tropiques, vn peu plus, où sont les regions ardentes & les Meridionaux, l'Afrique & l'Æthiopie au milieu d'Orient & d'Occident, l'Arabie Calicut, les Moluques, les laues, la Taprobane vers Orient, le Peru & grands mers vers Occident. L'autre moyenne est de trente degrés outre les Tropiques tant deça que de là vers Poles, où sont les regions moyennes & temperées, toute l'Europe avec la mer mediterrannée, au milieu d'Orient & Occident toute l'Asie tant petite que grande, qui est vers Orient, avec la Chine & le Iappon, & l'Amerique occidentale. La tierce qui est de trente degrés, qui sont les plus près des deux Poles de chaque costé, où sont les regions froides & glaciales, peuples Septentrionaux, la Tartarie, Moscoule, Estotilam, & la Magellane, qui n'est pas encores bien descouuerte.

Suyuant ce partage general du monde ,
aussi sont differens les naturels des hommes
en toutes choses , corps , esprit , religion ,
mœurs , comme se peut voir en ceste petite
table. Car les

1. <i>Au corps.</i>	Septentrionaux sont Hauts & grands, pitui- teux, sanguins, blancs & blonds, socia- bles, la voix for- te, le cuir mol & velu , grands mangeurs & beuveurs & puis- sants.	Moyens sont me- diocres & tem- perezen toutes ces cho- ses come neutres, ou bien partici- pans vn peu de	Meridionaux sont petits, me- lancholiques , froids & secs , noirs , solitai- res , la voix grosse , le cuir dur avec peu de poil & cresp- pu , abstinen- s foibles.
2. <i>Es- prit.</i>	Grossiers , lourds , stupi- des , fots , faci- les , legers , in- constants.	ces deux extremi- tez & tenans plus de	Ingenieux , sa- ges , prudens , fins , opinia- tres.
3. <i>Re- ligion.</i>	Peu religieux & deuotieux.	la regi- on , de	Superstitieux , contemplatifs.
4. <i>moeurs.</i>	Guerriers, vail- lans , penibles, chastes , ex- empts de jalou- sie , cruels & inhumains.	laquelle ils sont plus voi- sins.	Non guerriers, & lasches, pail- lards , jaloux , cruels & in- humains.

Toutes ces differences se prouuent aisément, Quant à celles du corps elles se cognoissent à l'œil, & s'il y a quelques exceptions, elles sont rares & viennent du mélange des peuples, ou bien des vents, des eaux, & de la situation particuliere des lieux, dont vne montagne sera vne notable difference en mesme degré, voire mesme pays & ville: ceux de la ville haute d'Athenes estoient tout d'autre humeur, dict Plutarque, que ceux du port de Pyrée, vne montagne du costé de Septentrion rendra la vallée qui sera vers le midi toute meridionale, & au contraire aussi.

Quant à celles de l'esprit, nous sçauons que les arts mecaniques & ouurages de main sont de Septentrion, où ils sont penibles: les sciences speculatiues sont venues du midy. Cæsar & les Auciens appellent les Ægyptiens tres-ingenieux & subtils; Moyse est dict instruit en leur sagesse, la Philosophie est venue de là en Grece, la majorité commence plustost chés eux, à cause de l'esprit & finelle, les gardes des Princes, mesmes meridionaux, sont de Septentrion comme ayans plus de force & moins de finesse & de malice: ainsi les meridionaux sont sujets à grandes vertus & grands vices, comm'il est dit d'Annibal: les Septentrionaux ont la bonté & simplicité. Les sciences moyennes & mixtes, politiques, loix & eloquences sont aux nations mitoyennes, ausquelles ont florì les grands empires & polices.

Pour le troisieme point, les religions sont venues du midy, *Ægypte*, *Arabie*, *Chaldée*; plus de superstition en *Affrique* qu'au reste du monde, tesmoins les vœux tant frequens, les temples tant magnifiques: les Septentrionaux, dit *Cæsar*, peu soucieux de religion, sont attentifs à la guerre & à la chasse.

Quant aux mœurs, premierement touchant la guerre, il est certain que les grandes armées, arts, instrumens & inuentions militaires sont venues de Septentrion: les peuples de là, *Scythes*, *Gots*, *Vandales*, *Huns*, *Tartares*, *Turcs*, *Germain*s ont battu & vaincu toutes les autres nations, & rauagé tout le monde, dont est tant souuent dict, que tout mal vient d'*Aquilon*. Les duels & combats sont venus de là; les Septentrionaux adorent le glaive fiché en terre, dit *Solinus* inuincible aux autres nations, voire aux *Romains* qui ont vaincu le reste, & ont esté destruits par eux, aussi s'affoiblissent & s'alangourissent au vent de *Su*, & allant vers *Midy* comme les Meridionaux venans au *Nort*, redoublent leurs forces. A cause de leur fierté guerriere, ils ne peuuent souffrir qu'on leur commande par prauerie, ils veulent la liberté, au moins les commandemens effectifs. Touchant la chasteté & la jalousie, en Septentrion vne seule femme à vn homme, dict *Tacitus*, encores suffiselle pour plusieurs, dit *Cæsar*, nulle jalousie, dit *Munster*, où les hommes & femmes se

baignent ensemble avec les estrangers. En Midy la Polygamie est par tout receüe , toute l'Afrique adore Venus, dit Solinus : les Meridionaux meurent de jalousie , à cause de quoy ils ont les Eunuques gardiens de leurs femmes , que les grands Seigneurs ont en grand nombre comme des harats.

Quant à la cruauté les extremités sont semblables , mais pour diuerses causes , comme se verra tantost aux causes : les punitions de la rouë & les empalemens de vifs , venus de Septentrion : les inhumanités des Moscouites & Tartares sont toutes notoires. Les Allemans dist Tacite , ne punissent les coupables juridiquement , mais les tuent cruellement comme ennemis. Ceux de Midy aussi escorchent tout vifs les criminels , & leur appetit de vengeance est si grand , qu'ils en deviennent furieux s'ils ne l'affouissent : Au milieu sont benins & humains : les Romains punissoient les plus grands crimes du bannissement simple, les Grecs vsoyent de breuuage doux de ciguë pour faire mourir les condamnés. Et Ciceron dit que l'humanité & la courtoisie est partie de l'Asie mineur , & deriuée au reste du monde.

La cause de toutes ces differences corporelles & spirituelles , est l'inequalité & difference de la chaleur naturelle interne , qui est en ces pays & peuples : sçauoir forte & vehemente aux Septentrionaux , à cause du grand froid

externe, qui la resserre & renferme au dedans, comme les caues & lieux profonds sont chauds en hyuer & les estomacs, *ventres hyeme calidiors*: foible aux meridionaux, estant dissipée & attirée au dehors, par la vehemence de l'externe, comme en esté les ventres & lieux de dessous terre sont froids : Moyenne & temperée en ceux du milieu. De ceste diuersité, dis-je, & inequalité de chaleur naturelle viennent ces differences, non seulement corporelles, ce qui est aisé de remarquer, mais encores spirituelles. Car les Meridionaux, à cause de leur temperament froid, sont melancholiques, & par ainsi arrestés, constants, contemplatifs, ingenieux, religieux, sages. Car la sagesse est aux animaux froids comme aux Elephans, que comme le plus melancholique de tous animaux, est le plus sage, docile, religieux, à cause du sang froid. De ce temperament melancholique aduient aussi que les Meridionaux sont paillards, à cause de la melancholie spumeuse, abradente, & salace, comme il se void aux lieures. Et cruels, par ce que ceste melancholie abradente presse violement les passions & la vengeance. Les Septentrionaux pituiteux & sanguins de temperament tout contraire aux Meridionaux, ont les qualités toutes contraires, sauf qu'ils conuiennent en vne chose, c'est qu'ils sont autli cruels & inhumains, mais c'est par vne autre raison, sçauoir par deffaut de jugement,

dont comme bestes ne sçauent commander & se contenir. Ceux du milieu sanguins & choleres sont temperes, d'une belle humeur, joyeux, disposés, actifs.

Nous pourrons encores plus exquisement & subtilement représenter le diuers naturel de ces trois sortes de peuples, par application & comparaison de toutes choses, comme se pourra voir en ceste petite table, où se voit que proprement appartient, & se peut rapporter aux.

Septentrionaux	Moyens	Meridionaux	
Le sens commun.	Discours & ratiocination.	Intellect.	<i>Qualités d'ame.</i>
Force comme des ours & bestes.	Raison & justice d'hommes.	Finesse de regards & religion de gens divins.	
Mars { guerre Lune { chasse.	Jupiter { Empe- reurs Mercure. { Ora- teurs	Saturne, { Con- tem- Venus. { plation, amour	<i>Planetes.</i>
Art & manufacture.	Prudence, cognoissance du bien & du mal.	Science du vray & du faux.	
Ouvriers artisans, soldats. Executer & obeir.	Magistrats pouruoians juger, commander.	Pontifes, philosophes contempler.	<i>Actions & parties de republique,</i>
Jeunes, malhabiles.	Hommes faits mineurs d'affaires.	Vieillards graves, sages pensifs.	

Les autres distinctions plus particulieres se peuvent rapporter à ceste cy generale de Midy & Nort : l'on peut rapporter aux conditions des Septentrionaux ceux d'occident , & ceux qui vivent aux montagnes , guerriers , fiers , amoureux de liberté , à cause du froid qui est aux montagnes. Aussi ceux qui sont esloignés de la mer , plus simples & entiers. Et au contraire , aux conditions des Meridionaux l'on peut rapporter les orientaux , ceux qui vivent aux vallées , effeminés , delicats , à cause de la fertilité , d'où vient la volupté. Aussi les maritimes trompeurs & fins à cause du commerce & du trafic avec diuerfes sortes de gens & nations.

Par tout ce discours il se voit qu'en general ceux de Septentrion sont plus aduantagez au corps , & ont la force pour leur part , & ceux du Midy en l'esprit , & ont pour eux la finesse ; ceux du milieu ont de tout , & sont temperés en tout : Aussi s'apprend par là que leurs mœurs ne sont à vray dire ny vices ny vertus , mais œuvres de nature : laquelle du tout corriger & du tout renoncer , il est plus que difficile , mais adoucir , temperer , & ramener à peu pres les extrémités à la modération , c'est l'œuvre de vertu.

CHAPITRE XXXIX.

Seconde distinction & difference plus subtile des esprits & suffisance des hommes.

CESTE seconde distinction qui regarde l'esprit & la suffisance, n'est pas si apparente & perceptible comme les autres, & vient tant du naturel, que de l'acquis, selon laquelle y a trois sortes de gens au monde, comme trois classes & degrés d'esprits. En l'un & le plus bas sont les esprits foibles & plats, de basse & petite capacité, nés pour obeir, servir & estre menés, qui en effect sont simplement hommes. Au second & moyen estage sont ceux qui sont de mediocre jugement, font profession de suffisance, science, habilité, mais qui ne le sentent & ne se jugent pas assés, s'arrestent à ce que l'on tient communement, & l'on leur baille du premier coup, sans dauantage s'enquerir de la verité & source des choses, voire pensent qu'il ne l'est pas permis; & ne regardent point plus loin que là où ils se trouuent, pensent que par tout est ainsi, ou doit estre: que si c'est autrement, ils faillent & sont barbares. Ils s'asservissent aux

opinions & loix municipales du lieu, où ils se trouvent deslors qu'ils sont esclôs, non seulement par obseruance & vsage, ce que tous doiuent faire, mais encores de cœur & d'ame : & pensent que ce que l'on croit en leur village, est la vraye touche de verité, & la seule ou bien la meilleure reigle de bien viure. Ces gens sont de l'escole & du ressort d'Aristote, affirmatifs, positifs, plus dogmatistes, qui regardent plus l'vtilité que la verité, ce qui est plus propre à l'vsage & trafic du monde, qu'à ce qui est bon & vray en foy. En ceste classe y a tres-grand nombre & diuersité de degrés, les principaux & plus habiles d'entr'eux gouernent le monde, & ont les commandemens en main. Au troisieme & plus haut estage sont les hommes douëz d'un esprit vif & clair, jugement fort, ferme & solide, qui ne se contentent d'un ouy dire, ne s'arrestent aux opinions communes & receuës, ne se laissent gagner & preoccuper à la creance publique, de laquelle ils ne s'estonnent point, sçachant qu'il y a plusieurs bourdes, faussetés, & impostures receuës au monde avec approbation & applaudissement, voire adoration & reuerence publique : mais examinent toutes choses qui se proposent, sondent meurement & cherchent sans passion les causes, motifs, & ressorts jusques à la racine, aymanz mieux

douter & tenir en suspens leur creance, que par vne trop molle & lasche facilité, ou legereté, ou precipitation de jugement, se paistre de fausseté, & affirmer ou se tenir assurez de chose de laquelle ils ne peuuent auoir raison certaine. Ceux cy sont en petit nombre, de l'eschole & ressort de Socrates & Platon, modestes, sobres, retenus, considerans plus la verité & realité des choses, que l'vtilité, & s'ils sont bien nés, ayans avec ce dessus la probité & le reglement des mœurs, ils sont vrayement sages, & tels que nous cherchons icy. Mais pource qu'ils ne s'accordent pas avec le commun quant aux opinions, voyent plus clair, penetrent plus auant, ne sont si faciles, ils sont soubçonnés & mal estimés des autres, qui sont en beaucoup plus grand nombre, & tenus pour fantasques & Philosophes, c'est par iniure qu'ils vsent de ce mot. En la premiere de ces trois classes y a bien plus grand nombre qu'en la seconde, & en la seconde qu'en la troisieme. Ceux de la premiere & derniere, plus basse & plus haute ne troublent point le monde, ne remuent rien, les vns par insuffisance & foiblesse, les autres par grande suffisance, fermeté, & sagesse. Ceux du milieu font tout le bruiet, & les disputes qui sont au monde, presumptueux, tousiours agitez & agitants. Ceux de la plus

basse marche, comme le fonds, la lie, la sentine, ressemblent à la terre qui ne fait que recevoir & souffrir ce qui vient d'en haut. Ceux de la moyenne ressemblent à la region de l'air, en laquelle se forment tous les meteoires, & se font tous les bruits & alterations, qui puis tombent en terre. Ceux du plus haut estage ressemblent à l'Æther & plus haute region voisine du ciel, seraine, claire, nette & paisible. Ceste difference d'hommes vient en partie du naturel, de la premiere composition & temperament du cerueau, qui est fort different, humide, chaud, sec, & par plusieurs degres, dont les esprits & jugements sont ou fort solides, courageux ou foibles, craintifs, plats : En partie de l'instruction & discipline, aussi de l'experience & hantise du monde, qui sert fort à se desniaiser, & mettre son esprit hors de page. Au reste il se trouue de toutes ces trois sortes de gens, souz toute robe, forme & condition, & des bons & des mauuais, mais bien diuersement.

L'on fait encores vne autre distinction d'esprits & suffisances, car les vns se font voye eux mesmes & ouverture, se conduisent seuls. Ceux cy sont heureux de la plus haute taille, & bien rares ; les autres ont besoin d'aide, mais ils sont encores doubles, car

les vns n'ont besoin que d'estre esclairés , c'est assés qu'il y aye vn guide & vn flambeau qui marche deuant , ils suyront volontiers & bien ayfément. Les autres voulant estre tirés , ont besoin de compulsoire , & que l'on les prenne par la main. Je laisse ceux qui par grande foiblesse , comme ceux de la plus basse marche , ou par malignité de nature , comme il y en a en la moyenne , qui ne sont bons à suyure , ny ne se laissent tirer & conduire : gens desesperés.



CHAPITRE XL.

Troisieme distinction & difference des hommes accidentale , de leurs degrés , estats & charges.

CESTE distinction accidentale , qui regarde les estats & charges , est fondée sur deux principes & fondemens de la societé humaine , qui sont commander & obeyr , puissance & subjection , superiorité & inferiorité , *imperio & obsequio omnia constant*. Ceste distinction se

verra premierement mieux en gros, en ceste table,

Divi- sion pre- miere & ge- nera- le.	1 Priuée, laquelle est aux	Famil- les & mesna- ges, & est de quatre façons.	Mariage, du mary à la femme, ceste cy est la source de la societé hu- maine.
			Paternelle, des parens sur les enfans, ceste-cy est vrayment naturelle.
Toute puis- sance & sub- jecti- on est ou	2 Publi- que, la- quelle est ou	Herite, double scauoir des	Scigneurs sur leurs esclaves.
			Maistres sur leurs servi- teurs.
			Patronelle, des patrons sur leurs affranchis, de laquelle l'vsage est peu frequent.
			Corps & colleges, communautés civiles sur les particuliers mem- bres de la communauté.
		Souueraine, qui est de trois facons & sont trois sortes d'estats (Cunctas nationes, & urbes, populus, ut primo- res, aut, singuli re- gunt) scauoir	Monarchie d'un.
			Aristocratie de peu.
		Subalterne, qui est en ceux qui sont superieurs & inferieurs, pour diverses raisons, lieux personnes, comme sont les	Democratie de tous.
			Seigneurs par- ticuliers en plu- sieurs degres, Officiers de la souveraineté, qui sont en gran- de diuersité.

Ceste puissance publique , soit souveraine , soit subalterne , reçoit des subdivisions qu'il faut sçavoir. La souveraine , qui est triple , comme dict est , pour le regard de la maniere du gouvernement , est encores triple , c'est à dire chacune de ces trois est conduite en trois façons , dont est dicté royale , ou seigneuriale , ou tyrannique : royale en laquelle le souverain (soit il un ou plusieurs , ou tous) obeissant aux loix de nature , garde la liberté naturelle , & la propriété des biens aux subjects. *Ad reges potestas omnis pertinet , ad singulos proprietas : omnia rex imperio possidet , singuli dominio :* seigneuriale , où le souverain est seigneur des personnes & des biens , par le droit des armes , gouvernant ses subjects comme esclaves : tyrannique où le souverain mesprisant toutes loix de nature , abuse des personnes & des biens de ses subjects , differant du seigneur , comme le voleur de l'ennemy de guerre. Des trois estats souverains le monarchique ; & des trois gouvernemens le seigneurial sont les plus anciens , grands , durables , augustes , comme anciennement Assyrie , Perse , Égypte , & maintenant Étiopie , la plus ancienne qui soit , Moscovie , Tartarie , Turquie , le Peru. Mais le meilleur & le plus naturel estat & gouvernement est la Monarchie royale : les aristocraties fameuses sont jadis Lacedemone & maintenant Venise ; les Democraties , Rome , Athe-

nes , Cartage , royales en leur gouvernement.

La puissance publique subalterne , qui est aux seigneurs particuliers , est de plusieurs sortes & de grés , principalement cinq , sçavoir : seigneurs tributaires , qui doivent tribut seulement.

Feudataires , vassaux simples , qui doivent foy & hommage pour le fief : ces trois peuvent estre souverains.

Vassaux liges , qui outre la foy & hommage , doivent encores service personnel , dont ils ne peuvent estre vraiment souverains.

Subjects naturels , soit vassaux ou censiers ou autrement , lesquels doivent subjection & obeissance , & ne se peuvent exempter de la puissance de leur souverain , & sont seigneurs.

La puissance publique subalterne , qui est aux officiers de la souveraineté , est de plusieurs sortes , & pour le regard de l'honneur & de la puissance , reuiennent à cinq de grés.

Premier & plus bas des infames qui doivent demourer hors la ville , executeurs derniers de la justice.

2. De ceux qui n'ont ny honneur ny infamie , sergants , trompettes.

3. Qui ont honneur sans cognoissance & puissance , notaires , recepueurs , secretaires.

4. Qui ont avec honneur , puissance & cognoissance , mais sans jurisdiction , les gens du Roy.

5. Qui ont jurisdiction , & par ainsi tout le

reste , & ceux cy s'appellent proprement Magistrats , desquels y a plusieurs distinctions , & principalement ces cinq qui sont toutes doubles.

- | | | | |
|------|---|------|----------------------|
| 1. { | Majeurs , Senateurs | 2. { | Politiques |
| en { | Mineurs , Iuges. | en { | Militaires. |
| 3. { | Ciuits | 4. { | Titulaires en office |
| en { | Criminels. | en { | formé , |
| | | | Commissaires. |
| 5. { | Perpetuels, comme doiuent estre les moins | | |
| en { | dres , & en nombre. | | |
| | Temporels & muables , comme doiuent estre les grands. | | |

DES ESTATS ET DEGREZ DES HOMMES
EN PARTICULIER, SUIVANT CESTE
PRECEDENTE TABLE. ,

. *Aduertissement.*

IC y est parlé en particulier des pieces de ceste table , & distinction de puissances & subjections (commençant par les priuées & domestiques) c'est à dire de chaque estat & profession des hommes pour les cognoistre ; c'est icy le livre de la cognoissance de l'homme , car les deuoirs d'un chacun seront au troisieme liure en la vertu de justice , où de mesme ordre tous ces estats & chapitres se reprendront. Or auant

y entrer faut sommairement parler du commander & obeyr, deux fondements & causes principales de ces diuersités d'estats & charges.

CHAPITRE XL I.

Du commander & obeyr.

CE sont, comme a esté dit, deux fondements de toute société humaine, & de la diuersité des estats & professions. Ces deux sont relatifs, se regardent, requierent, engendrent & conseruent mutuellement l'un l'autre : & sont pareillement requis en toute assemblée & communauté, mais qui sont obligés à vne naturelle enuie, contestation & mesdisance ou plainte perpetuelle. La populaire rend le souverain de pire condition qu'un charretier, la monarchique le met au dessus de Dieu. Au commander est la dignité, la difficulté (ces deux vont ordinairement ensemble) la bonté, la suffisance, toutes qualités de grandeur. Le commander, c'est à dire la suffisance, le courage, l'autorité est du ciel & de Dieu, *imperium non nisi divino fato datur : omnis potestas à Deo est* : dont dict Platon que Dieu n'establit point des hommes, c'est à dire de la commune sorte & suffisance, & purement humaine, par
dessus

deffus les autres ; mais ceux qui d'une touche diuine , & par quelque finguliere vertu & don du ciel , surpassent les autres dont ils font appellés *heroes*. En l'obeyr est l'vtilité , l'aifance , la neceffité , tellement que pour la conseruation du public , il est encores plus requis que le bien commander , & est beaucoup plus dangereux le desuy d'obéir ou le mal obeir , que le mal commander. Tout ainfi qu'au mariage , bien que le mary & la femme soient également obligés à la loyauté & fidelité , & l'ayent tous deux promis par mefmes mots , mefmes ceremonies & folemnités , si est ce que les inconueniens sortent fans comparaison plus grands de la faute & adultere de la femme que du mary : auffi bien que le commander & obeir soient pareillement requis en tout estat & compaignie , si est ce que les inconueniens font bien plus dangereux de la desobeiffance des subjects que de la faute des commandans. Plusieurs estats ont longuement roulé & affés heureusement duré sous detres-mefchans princes & magistrats , les subjects s'y accommodans & obeiffans : Dont vn sage interrogé pourquoy la republique de Sparte estoit si floriffante ; si c'estoit pource que les Roys commandoient bien ? mais plustost , dict il , pource que les citoyens obeiffent bien. Mais si les subjects refusent d'obeir & secouent le joug , il faut que l'estat donne du nés à terre

Tome I.

L

C H A P I T R E X L I I.

Du mariage.

C O M B I E N que l'estat du mariage soit le premier & plus ancien , le plus important , & comme le fondement & la fontaine de la société humaine , d'où sourdent les familles , & d'elles les republiques , *Prima societas in conjugio est , quod principium urbis , seminarium rei-publicæ* , si est ce qu'il a esté desestimé & descrié par plusieurs grands personnages , qui l'ont jugé indigne de gens de cœur & d'esprit , & ont dressé ces objects contre luy.

Premierement ils ont estimé son lien & son obligation injuste , vne dure & trop rude captivité , d'autant que par mariage l'on attache & s'assubjectit par trop au soing & aux humeurs d'autrui. Que s'il aduient d'auoir mal rencontré, s'estre mescompté au choix & au marché , & que l'on aye prins plus d'os que de chair , l'on demoure misérable toute sa vie. Quelle iniquité & injustice pourroit estre plus grande, que pour vne heure de fol marché , pour une faute faite sans malice & par mesgarde , & bien souuent pour obeyr & suyure l'aduis d'autrui , l'on soit obligé à une peine perpetuelle ? Il vaudroit mieux se mettre la corde au col , & se jetter en la mer la teste la premiere , pour finir ses

jours bientoſt, que d'eſtre touſiours aux peines d'enfer & ſouffrir ſans ceſſe à ſon coſté la tempeſte d'une jalouſie, d'une malice, d'une rage & manie, d'une beſtiſe opiniaſtre, & autres miſerables conditions : dont l'un a dit que qui auoit inventé ce nœud & lien de mariage, auoit trouué vn bel & ſpécieux expedient, pour ſe venger des humains, une chauſſetrape ou un filet pour attraper les beſtes, & puis les faire languir à petit feu. L'autre a dict que marier vn ſage avec vne folle, ou au rebours, c'eſtoit attacher le viſ avec le mort, qui eſtoit la plus cruelle mort inuentée par les tyrans, pour faire languir & mourir le viſ par la compaignie du mort.

Par la ſeconde accusation, ils diſent que le mariage eſt vne corruption & abaſtardiſſement des bons & rares eſprits, d'autant que les flat-teries & mignardises de la partie que l'on aime, l'affection des enfans, le ſoin de ſa maiſon, & aduencement de ſa famille, relaschent, deſtrempent & ramolliſſent la vigueur & la force du plus viſ & généreux eſprit qui puiſſe eſtre, teſmoins Samſon, Salomon, Marc Antoine, dont au pis aller il ne faudroit marier que ceux qui ont plus de chair que d'eſprit, vigoureux au corps & foibles d'ame, les attacher à la chair, & leur bailler la charge des choſes petites & baſſes, ſelon leur portée. Mais ceux qui foibles de corps ont l'eſprit grand, fort & puiſſe

fant , est-ce pas grand dommage de les enfermer & garotter à la chair & au mariage , comme l'on fait les bestes à l'estable ? Nous voyons mesmes cela aux bestes. Car les nobles qui sont de valeur & de seruice , cheuaux , chiens , l'on les esloigne de l'accointance de l'autre sexe , l'on ne met aux harats que les bestes de moindre estime. Aussi ceux qui sont destinés , tant hommes que femmes , à la plus venerable & sainte vocation , & qui doiuent estre comme le chresme & la moüelle de la chrestienté , les gens d'église & de religion , sont exclus du mariage. Et c'est pource que le mariage empesche & destourne les belles & grandes eleuations d'ame , la contemplation des choses hautes , celestes & diuines , qui est incompatible avec le tabut des affaires domestiques , à cause de quoy l'Apostre prefere la solitude de la continence au mariage. L'vtile peut bien estre du costé du mariage ; mais l'honneste est de l'autre costé.

Puis il trouble les belles & saintes entreprises , comme saint Augustin recite qu'ayant descigné avec quelques autres siens amis , dont il y en auoit de mariés , de se retirer de la ville & des compagnies , pour vaquer à l'estude de sagesse & de vertu , leur dessein fut bientoist rompu & interuertý , par les femmes de ceux qui en auoient , & a dit aussi vn sage , que si les hommes se pouuoient passer de femmes ,

qu'ils seroient visités & accompagnés des Anges.

Plus le mariage empesche de voyager parmy le monde & les estrangers , soit pour apprendre à se faire sage , ou pour enseigner les autres à l'estre , & publier ce que l'on sçait : Bref le mariage non seulement apoltronit ou accroupit les bons & grands esprits , mais priue le public de plusieurs belles & grandes choses , qui ne peuvent s'exploiter demeurant au sein & au gyron d'une femme , & autour des petits enfans. Mais ne fait-il pas beau voir ? & n'est-ce pas grand dommage , que celuy qui est capable de gouverner & policer tout un monde , s'amuse à conduire une femme & des enfans ? Dont respondit vn grand personnage , quand l'on luy parla de se marier , qu'il estoit né pour commander aux hommes , & non à vne femmellette, pour conseiller & gouverner les Roys & Princes , & non pas de petits enfans.

A tout cela l'on peut dire que la nature humaine n'est pas capable de perfection & de chose où n'y ait à redire , comm'a esté dict ailleurs : ses meilleurs remedes & expediens sont tousiours vn peu malades meslés d'incommodités : ce sont tous maux necessaires : ça esté le meilleur que l'on a peu aduiser pour sa conseruation & multiplication. Aucuns comme Platon & autres ont voulu subtiliser & inuenter des moyens pour euitier ces espines : mais outre qu'ils ont faict & forgé des choses en l'air,

qui se pouuoient bien tenir longuement en vſage ; encores leurs inuentions , quand elles feront mises en pratique , ne ſeroient pas ſans pluſieurs incommodités & difficultés. L'homme les cauſe & les produict luy meſmes par ſon vice & intemperance , & par ſes paſſions contraires , & n'en faut pas accuſer l'eſtat , ny autre que l'homme , qui ne ſçait bien vſer d'aucune choſe. Et peut on dire encores qu'à cauſe de ces eſpines & difficultés , c'eſt une eſchole de vertu , un apprentiſſage & un exercice familier & domeſtique , & diſoit Socrates le docteur de ſageſſe , à ceux qui luy objectoient la teſte de ſa femme , qu'il apprenoit par là en ſa maiſon , à eſtre conſtant & patient par tout ailleurs , & à trouuer douces les pointures de la fortune. Et puis enfin on ne contredict pas que celuy qui ſ'en paſſe ne faſſe encores mieux. Mais à l'honneur du mariage , le chreſtien dict que Dieu l'a inſtitué au Paradis terreſtre , auant toute autre choſe , en l'eſtat d'innocence & perfection , voila quatre recommandations ; la quatrieme paſſe tout & ſans replique. Depuis le fils de Dieu l'a approuué & honoré de ſa preſence , ſon premier miracle , & miracle fait en faueur dudit eſtat , & des gens mariés , & l'a honoré de ce priuilege, qu'il ſert de figure de ceſte grande vnion de lui avec ſon Eglife , & pource il a eſté appellé Myſtere & grand.

A la verité , le mariage n'eſt point choſe in-

différente ou mediocre ; c'est du tout un grand bien ou grand mal , vn grand repos ou vn grand trouble , vn Paradis ou vn enfer ; c'est vne tres-douce & plaisante vie , s'il est bien fait ; vn rude & dangereux marché , & vne bien espineuse & poissante liaison , s'il est mal rencontré ; c'est vne conuention où se verifie bien à poinct ce que l'on dict , *homo homini deus , aut lupus.*

Mariage est vn ouurage basti de plusieurs pieces ; il y faut vn rencontre de beaucoup de qualités , tant de considerations , outre & hors les personnes mariées. Car quoy qu'on die , l'on ne se marie seulement pour soy , la posterité , la famille , l'alliance , les moyens y poissent beaucoup : voila pourquoy ils s'en trouue si peu de bons , & ce qui s'en trouue si peu , c'est signe de son prix & de sa valeur , c'est la condition des plus grandes charges : la Royauté est aussi pleine de difficultés , & peu l'exercent bien & heureusement. Mais ce que nous voyons souuent qu'il ne se porte pas bien , cela vient de la licence & desbauche des personnes , & non de l'estat & institution du mariage , dont il se trouue plus commode aux ames bonnes , simples , & populaires , où les délices , la curiosité , l'oisiueté le troublent moins : les humeurs desbauchées , les ames turbulentes & detraquées ne sont pas propres à ce marché.

Mariage est vn sage marché , vn lien & vne

cousture faincte & inuiolable , vne conuention honorable : s'il est bien façonné & bien pris , il n'y a rien plus beau au monde , c'est vne douce societé de vie , pleine de constance , de fiance , & d'un nombre infini d'vtils & solides offices , & obligations mutuelles : c'est vne compaignie non point d'amour , mais d'amitié. Ce sont choses fort distinctes que l'amour & l'amitié , comme la chaleur de fieure & maladie , la chaleur naturelle & saine. Le mariage a pour sa part l'amitié , l'vtilité , la justice , l'honneur , la constance , un plaisir plat voirement , mais sain , ferme , & plus vniuersel. L'amour se fonde au seul plaisir , & l'a plus vif , aigu & cuisant : peu de mariages succedent bien , qui sont commencés & acheminés par les beautés & desirs amoureux ; il y faut des fondemens plus solides & constants , & y faut aller d'aguet : ceste bouillante affection n'y vaut rien , voire est mieux conduict le mariage par main tierce.

Cecy est bien dict sommairement & simplement : Pour vne plus exacte description , nous sçaurons qu'au mariage y a deux choses qui luy sont essentielles , & semblent contraires , mais ne le sont pas , sçauoir : vne equalité , comme sociale & entre pareils , & vne inegalité , c'est à dire superiorité & inferiorité. L'equalité consiste en vne entiere & parfaicte communication , & communauté de toutes choses , ames ,

volontés, corps, biens, loy fondamentale du mariage : laquelle en aucuns lieux s'estend jusques à la vie & la mort, tellement que le mary mort, faut que la femme suyue incontinent. Cela se pratique en aucuns lieux par loix publiques du pays & souuent de si grand ardeur, qu'estant plusieurs femmes à vn mary, elles contestent & plaident publiquement à qui aura l'honneur d'aller dormir (c'est leur mot) avec leur espoux, alleguant pour l'obtenir & y estre preferées, leur bon seruice, qu'elles estoient les mieux aimées, & ont eu de luy le dernier baiser, ont eu enfans de luy.

*Et certamen habent lethi, quæ viva sequatur
Conjugium, pudor est non licuisse mori.
Ardent viâtrices, & flammæ pectora præbent
Imponuntque suis ora petusta viris.*

En autres lieux s'obseruoit, non par les loix publiques, mais par les pactes & conuentions du mariage, comme fust entre Marc Antoine & Cleopatra. Ceste equalité aussi consiste en la puissance qu'ils ont sur la famille en commun, dont la femme est dictée compaignone du mary, dame de la maison & famille, comme le mary le maistre & seigneur : Et leur autorité conjointe sur toute la famille, est comparée à l'Aristocratie.

La distinction de superiorité & inferiorité, consiste en ce, que le mary a puissance sur

la femme, & la femme est subiecte au mary: Cecy est selon toutes loix & polices, mais plus ou moins selon la diuersité d'icelles. Par tout la femme, bien qu'elle soit beaucoup plus noble & plus riche, est subiecte au mary: Ceste superiorité & inferiorité est naturelle, fondées sur la force & suffisance de l'un, foiblesse & insuffisance de l'autre. Les Theologiens la fondent bien sur d'autres raisons tirées de la bible, l'homme a esté fait le premier, de Dieu seul & immédiatement, par expres, pour Dieu son chef, & à son image, & parfait, car nature commence tousiours par chose parfaite: la femme faicte en second lieu, apres l'homme, de la substance de l'homme, par occasion & pour autre chose, *mulier est vir occasio natus*, pour seruir d'aide & de second à l'homme, qui est son chef, & par ainsi imparfaicte. Voila par l'ordre de la generation. Celuy de la corruption & de peché, prouue le mesme, la femme a esté la premiere en preuarication, & de son chef a peché, l'homme second, & à l'occasion de la femme; la femme donc derniere au bien, & en la generation, & occasionnée; premiere au mal, & occasion d'iceluy, est justement assubjectie à l'homme premier au bien, & dernier au mal.

Ceste superiorité & puissance maritale a esté en aucuns lieux telle que la paternelle sur la

vie & la mort comme aux Romains par la loy de Romulus , & le mary pouuoit tuer la femme en quatre cas , adultere , supposition d'enfans , fausses clefs , & auoir beu du vin. Aussi chez les Grecs , dit Polybe , & les anciens Gaulois , dict Cæsar , la puissance maritale estoit sur la vie & la mort de la femme. Ailleurs & là mesme depuis , ceste puissance a esté moderée : mais presque toute la puissance du mary & la subjection de la femme porte que le mary est maistre des actions & veus de sa femme , la peut corriger de paroles & tenir aux ceps , (la battre de coups est indigne de femme à honneur , dict la loy) & la femme est tenue de tenir la condition , suyvre la qualité , le pays , la famille , le domicile & le rang de mary , doibt accompagner & suyure le mary par tout , en voyage , en exil , en prison , errant , vagabond , fugitif. Les exemples sont beaux de Sulpitia , suiuant son mary Lentulus , proscrit & relegué en Cicile, A Erithrée son mary Phalaris banny , Ipsicrates femme du Roy Mithridates vaincu par Pompée s'en allant & errant par le monde. Aucuns adjoûtent à la guerre & aux prouinces , où le mary est enuoyé avec charge publique. Et la femme ne peust estre en jugement , soit en demandant ou deffendant , sans l'autorité de son mary , ou du luge à son refus , & ne peut appeller son mary en jugement sans permission du Magistrat.

Le mariage ne se porte pas de mesme façon & n'a pas mesmes loix & regles par tout, selon les diuerfes religions & nations il a ses regles ou plus lasches & larges, ou plus estroictes, selon la Chrestienté la plus estroicte de toutes, le mariage est fort subiect & tenu de court. Il n'a que l'entrée libre, sa durée est toute contraincte, dependant d'ailleurs que de nostre vouloir. Les autres nations & religions, pour rendre le mariage plus aisé, libre & fertile, reçoient & pratiquent la polygamie & la repudiation, liberté de prendre & laisser femmes, accusent la Chrestienté d'auoir tollu ces deux, & par ce moyen prejudicié à l'amitié & multiplication, fins principales du mariage : d'autant que l'amitié est ennemie de toute contraincte, & se maintient mieux en vne honneste liberté. Et la multiplication se faict par les femmes : comme nature nous monstre richement aux loups, desquels la race est si fertile en la production de leurs petits, jusques au nombre de douze ou treize, & surpassant de beaucoup les autres animaux vtiles, desquels on tue si grand nombre tous les jours & si peu de loups, & toutesfois c'est la plus sterile de toutes. Ce qui vient de ce que de si grand nombre, il y a vne seule femelle, qui le plus souuent profite peu & ne porte point, estouffée par la multitude des masses concurrens & affamés, la plus grande partie

desquels meurt sans produire, à faute de femmes. Aussi void on combien la polygamie profite à la multiplication parmy les nations qui la reçoivent, Juifs, Mahumetans, & autres Barbares, qui font des amas de trois à quatre cents mille combatans. Au contraire le Christianisme tient plusieurs personnes attachées ensemble, l'une des parties estant sterile, quelquesfois toutes les deux : lesquels colloqués avec d'autres, l'un & l'autre laisseroit grande posterité. Mais au mieux toute sa fertilité consiste en la production d'une seule femme : finalement reprochent que ceste restriction Chrestienne produit des desbauches & adulteres : mais à tout cela l'on respond, le Christianisme ne considere pas le mariage par des raisons purement humaines, naturelles, temporelles, mais le regarde d'un autre visage, & a ses raisons plus hautes & nobles, comme il a esté dit : joint que l'experience monstre en la pluspart des mariages que la contraincte sert à l'amitié, principalement aux ames simples & debonnaires, qui s'accomodent facilement où ils se trouuent attachés : Et quant aux desbauches, elles viennent du dereglement des mœurs, qu'aucune liberté n'arreste. Et de fait les adulteres se trouuent en la Polygamie & repudiation ; tesmoin chés les Juifs & David qui ne s'en garda, pour tant de femmes qu'il eust : & au contraire ont esté long tems incog-

nus en des polices bien réglées, où n'y auoit Polygamie ny repudiation, tesmoin Sparte & Rome long tems apres sa fondation; il ne s'en faut donc pas prendre à la religion, qui n'enseigne que toute netteté & continence.

La liberté de la polygamie, qui semble aucunement naturelle, se porte diuerfement selon les diuerfes nations & polices. Aux vnes toutes les femmes à vn mary viuent en commun, & sont en pareil degré & rang, & leurs enfans de mesmes; ailleurs il y en a vne qui est la principale & comme maïstresse, & les enfans heritent aux biens, honneurs & titres du mary; les autres femmes sont tenues à part, & portent en aucuns lieux titre de femmes legitimes, & ailleurs sont concubines, & leurs enfans pensionnaires seulement.

L'usage de la repudiation de mesmes est different, car chés aucuns, comme Hebreux, Grecs, Armeniens, l'on n'exprime point la cause de la separation, & n'est permis de reprendre la femme vne fois repudiée, bien est permis de se remarier à d'autres; mais en la loy Mahumetane, la separation se fait par le Iuge, avec cognoissance de cause (sauf que ce fust par consentement mutuel) laquelle doit estre adultere, sterilité, incompatibilité d'humeurs, entreprise sur la vie de sa partie, choses directement & capitalement contraires à l'estat & institution du mariage; & est loysé

ble de se reprendre toutes & quantes fois qu'ils voudront. Le premier semble meilleur, pour tenir en bride les femmes superbes & les fascheux maris : le second, qui est d'exprimer la cause, deshonne les parties, empesche de trouuer party, descouure plusieurs choses qui deuroient demeurer cachées. Et aduenant que la cause ne soit pas bien verifiée, & qu'il leur faille demeurer ensemble, s'esluyuent empoisonnemens & meurtres souuent incognus aux hommes, comm'il fut descouuert à Rome auparauant l'vsage de la repudiation, où vne femme surprise d'auoir empoisonné son mary en accuse d'autres, & celles cy d'autres, jusques à soixante dix de mesme crime, qui furent toutes executées : mais le pire a esté que l'adultere demeure presque par tout sans peine de mort, & seulement y a diuorce & separation de compaignie, introduit par Iustinien, homme du tout possédé de sa femme, qui fist passer tout ce qu'elle peut à l'aduantage des femmes, d'où il sort vn danger de perpetuel adultere, desir de la mort de sa partie, le delinquant n'est point puni ; l'innocent injurié demeure sans reparation.

Du deuoir des mariez, voyés l. 3. c. 12.



CHAPITRE XLIII.

Des parens & enfans.

IL y a plusieurs fortes & degrés d'autorité & puissance humaine, publique & priuée, mais il n'y en a point de plus naturelle ny plus grande, que celle du pere sur les enfans (je dis pere, car la mere qui est subiecte à son mary, ne peut proprement auoir les enfans en sa puissance & subjection) mais elle n'a pas tousiours ny en tous lieux esté pareille. Anciennement presque par tout elle estoit absolue & vniuerselle sur la vie, la mort, la liberté, les biens, l'honneur, les actions & deportemens des enfans, comme sont de plaider, se marier, acquerir biens, sçauoir est chés les Romains par la loy expresse de Romulus, *parentum in liberos omne jus esto relegandi, vendendi, occidendi*, exceptés seulement les enfans au deffous trois ans, qui ne peuuent encores auoir mesdiét ny mesfaiét, laquelle loy fust renouuellée depuis par la loy des douze tables, par laquelle estoit permis au pere de vendre ses enfans jusques à trois fois, chés les Perfes selon Aristote, chés les anciens Gaulois, comme diét Cæsar & Prosper, chés les Moschouites & Tartares, qui peuuent vendre jusques à la

quatriesme fois. Et semble qu'en la loy de nature ceste puissance aye esté, par le faict d'Abraham voulant tuer son fils. Car si cela eust esté contre le deuoir & hors la puissance du pere, il n'y eust jamais consenty: & eust jamais pensé que ce fust esté Dieu, celuy qui le luy mandoit, s'il eust esté contre la nature: & puis nous voyons qu'Isaac n'y a point résisté, ny allegué son innocence, sçachant que cela estoit en la puissance du pere. Ce qui ne desroge aucunement à la grandeur de la foy d'Abraham, car il ne voulut sacrifier son fils, en vertu de son droit ou puissance, ny pour aucun de merite d'Isaac, mais purement pour obeyr au commandement de Dieu. En la loy de Moyse de mesme, sauf quelque modification: Voila quelle a esté ceste puissance anciennement en la pluspart du monde, & qui a duré jusques aux Empereurs Romains. Chés les Grecs elle n'a pas esté si grande & absolüe, ny aux Ægyptiens; toutesfois s'il aduenoit que le pere eust tué son fils à tort & sans cause, il n'estoit point puny, sinon d'estre enfermé trois jours pres du corps mort.

Or les raisons & fruiet d'une si grande & absolue puissance des peres sur leurs enfans, tres-bonne pour la culture des bonnes mœurs, chasser les vices, & pour le bien public, estoient premierement de contenir les enfans en crainte & en deuoir: puis à cause qu'il y a

plusieurs fautes grandes des enfans, qui demeu-
roient impunies au grand prejudice du public,
si la cognoissance & punition n'estoit qu'en la
main de l'autorité publique, soit pource
qu'elles sont domestiques & secrettes, ou qu'il
n'y a point de partie & poursuyuant. Car les
parens qui le sçauent & y sont plus interessés,
ne les descrieront pas, outre qu'il y a plu-
sieurs vices, desbauches, insolences qui ne
se punissent jamais par justice. Ioinct qu'il
suroient plusieurs choses à demeler, & plu-
sieurs differens entre les parens & enfans, les
freres & sœurs, pour les biens ou autres
choses, qu'il n'est pas beau de publier, qui
sont assoupies & esteintes par ceste autorité
paternelle. Et la loy n'a point pensé que le
pere abusast de ceste puissance, à cause de
l'amour tant grande qu'il porte naturellement
à ses enfans, incompatibles avec la cruauté,
qui est cause qu'au lieu de les punir à la
rigueur, ils intercedent plustost pour eux,
quand ils sont en justice, & n'ont plus grand
tourment, que voir leurs enfans en peine:
& bien peu ou point s'en est-il trouué, qui
se soit serui de ceste puissance, sans tres-
grande occasion, tellement que c'estoit plus-
tost vn espouuantail aux enfans, & tres-vtile,
qu'une rigueur de faict.

Or ceste puissance paternelle s'est quasi de
foy mesme perdue & abolie, (car ç'a esté plus

par desacoustumance, que par loy expresse) & a commencé de décliner à la venue des Empereurs Romains. Car des le temps d'Auguste ou bien tost apres, elle n'estoit plus en vigueur, dont les enfans deuindrent si fiers & insolens contre leurs peres, que Seneque parlant à Neron disoit, qu'on auoit veu punir plus de parricides depuis cinq ans derniers, qu'en sept cents ans auparauant, c'est à dire depuis la fondation de Rome, Auparauant s'il aduenoit que le pere tuast ses enfans, il n'estoit point puni, comme nous apprenons par exemples de Fuluius Sénateur, qui tua son fils pource qu'il estoit participant à la conjuration Catilinaire ; & de plusieurs autres Sénateurs, qui ont fait les procès criminels à leurs enfans en leurs maisons, & les ont condamnés à mort, comme Cassius Tratius, ou à exil perpetuel, comme Manlius Torquatus son fils Syllanus. Il y a bien en des loix apres, qui enoignent que le pere doit presenter à la justice ses enfans delinquans, pour les faire chastier, & que le juge prononcera la sentence telle que le pere voudra, qui est encores vn vestige de l'antiquité, & voulant oster la puissance au pere, ils ne l'osent faire qu'à demy, & non tout ouuertement. Ces loix posterieures approchent de la loy de Moyse, qui veut qu'à la seule plainte du pere, faite deuant le juge, sans autre cognoissance de cause, le

filz rebelle & contumax soit lapidé, requerrant la presence du j. ge, afin que la punition ne se face secretement ou en cholere, mais exemplairement. Et ainsi selon Moyse la puissance paternelle est plus libre & plus grande, qu'elle n'a esté depuis les Empereurs: mais depuis sous Constantin le grand, & puis Theodoze, finalement sous Iustinien ell'a esté presque du tout esteinte. De là est aduenü que les enfans ont appris à refuser à leurs parens obeissance, leurs biens & leurs secours, & à plaider contr'eux: chose honteuse de voir nos Palais pleins de tels procès. Et les en a on dispensés, sous pretexte de deuotion & d'offrande, comme chés les Iuifs des auparauant Iesus Christ, comm' il leur reproche: & depuis en la Chrestienté, selon l'opinion d'aucuns, voire les tuer ou en se deffendant, ou s'ils se rendent ennemis de la republique: combien que jamais il n'y scauroit auoir assés juste cause de tuer ses parens, *nullum tantum scelus admitti potest à patre, quod sit parricidio vindicandum, & nullum scelus rationem habet.*

Or l'on ne sent pas quel mal & prejudice il est aduenü au monde du raualllement & extinction de la puissance paternelle. Les republiques ausquelles ell'a esté en vigueur, ont fleuri. Si l'on y cognoissoit du danger & du mal, l'on la pouuoit aucunement moderer & regler, mais de l'abolir, comme elle est, il n'est ny beau,

ny honneſte, ny expedient, mais bien dommageable, comme nous venous de dire.

Du deuoir reciproque des parens & enfans, voyés l. 3. c. 14.

CHAPITRE XLIV.

Seigneurs & esclaves maistres & seruiteurs.

L'V S A G E des esclaves & la puissance des seigneurs ou maistres sur eux bien que ce soit chose vsitée par tout le monde, & de tout temps (sauf depuis quatre cents ans qu'elle s'est relaschée, mais qui se retourne mettre sus) la generalité ou vniuersalité n'est pas certaine preuue ny marque infaillible de nature, tesmoins les sacrifices des bestes, spécialement des hommes, obserués & tenus pour acte de pieté par tout le monde : qui toutesfois sont contre nature. La malice humaine passe tout, force nature, faict passer en force de loy tout ce qu'elle veut : n'y a cruauté ny meschanceté si grande, qu'elle ne face tenir pour vertu & pieté.

Il y en a de quatre sortes, naturels, nés d'esclaves, forcés & faicts par droit de guerre, justes dictés de peine à cause de crime, ou de debte, dont ils sont esclaves de leurs creanciers, au plus sept ans selon la loy des Iuifs, mais tousiours jusques au payement ailleurs, volontaires qui sont de plusieurs sortes, comme

ceux qui jouënt à trois dés , ou vendent à pris d'argent leur liberté , comme jadis en Allemagne , & encores maintenant en la Chrestienté mesmes , ou qui se donnent & vouent esclaves d'autrui à perpetuité , ainsi que practiquoient anciennement les Juifs , qui leur perçoient l'oreille à la porte en signe de perpetuelle servitude. Et ceste sorte de captivité volontaire est la plus estrange de toutes , & la plus contre nature.

C'est l'avarice qui est cause des esclaves forcés , & la poltronnerie cause des volontaires : les seigneurs ont esperé plus de gaing & de profit à garder qu'à tuer. Et de faict la plus belle possession , & le plus riche bien estoit anciennement des esclaves. Par là Crassus devint le plus riche des Romains , qui avoit outre ceux qui le servoient , cinq cents esclaves qui rapportoient tous les jours gain & profit de leurs mestiers & arts questuaires. Apres en avoir tiré long service & profit , encores en faisoit il argent en les vendant.

C'est chose estrange de lire les cruautés exercées par les seigneurs contre les esclaves , par l'approbation mesmes ou permission des loix : ils leur faisoient labourer la terre , enchainés comme encores en Barbarie , coucher dedans les creux & fosses , estants venus viells ou impotents & inutiles estoient vendus , ou bien noyés & jettés dedans les estangs , pour la nourriture des poissons : non seulement pour

vne petite & legiere faute, comme casser vn verre, on les tuoit, mais pour le moindre soubçon, voire tout simplement pour en auoir le passetemps, comme fist Flaminius l'vn des hommes de bien de son temps. Et pour donner plaisir au peuple, ils estoient contraints de s'entretuer publiquement aux arenes : si le maistre estoit tué en sa maison par qui que ce fust, les esclaués innocents estoient tous mis à mort; tellement que Pedanius Romain estant tué, bien que l'on sceust le meurtrier, si est ce que par ordonnance du Senat quatre cents esclaués siens furent tués.

C'est aussi d'autre part chose estrange, d'entendre les rebellions, elevations & cruautés des esclaués contre les seigneurs en leur rang. quand ils ont peu, non seulement en particulier par surprinse, trahyson, comme vne nuit en la ville de Tyr, mais en bataille rangée par mer & par terre dont est venu le proverbe *Autant d'ennemis que d'esclaués.*

Or comme la religion Chrestienne & puis la Mahumetane a creu, le nombre des esclaués a descreu, & la seruitude a relasché, d'autant que les Chrestiens & puis les Mahumetans ont affranchy tous ceux qui se sont mis de leur religion : & estoit vn moyen pour les y appeller, tellement qu'enuiron l'an douze cents, il n'y auoit presque plus d'esclaués au monde, sinon où ces deux religions n'auoient point encores d'autorité,

Mais comme le nombre des esclaves a diminué, le nombre des pures mendiants & vagabonds a creu, car tant d'esclaves affranchis fortis de la maison & subjection des seigneurs, n'ayans dequoy viure & faisans force enfans, le monde a esté remply de pures.

La pauvreté puis apres les a faicts retourner en servitude : & estre esclaves volontaires, jouans, tronquans, vendans leur liberté, afin d'auoir leur nourriture & vie asseurée, ou mettre leurs enfans à leur aise. Outre ceste cause & ceste servitude volontaire, le monde est retourné à l'usage des esclaves, parce que les Chrestiens & mahumetans se faisans la guerre sans cesse, & aux Payens, & gentils Orientaux & Occidentaux, bien qu'à l'exemple des Juifs n'ayent point d'esclaves de leur nation, ils en ont des autres nations, lesquelles encores qu'ils se mettent de leur religion, les retiennent toutesfois esclaves par force.

La puissance & autorité des maistres sur leurs seruiteurs, n'est gueres grande ny impérieuse, & ne peut aucunement prejudicier à la liberté des seruiteurs, mais seulement peuvent ils les chastier & corriger avec discretion & moderation. Elle est encores moindre sur les mercenaires, sur lesquels ils n'ont aucun pouuoir, ny correction.

Le deuoir des maistres & seruiteurs est l. 3. c. 15.

Fin du tome premier.

